



白氏長慶集卷第四十八

唐太子少傅刑部尚書致仕贈尚書右僕射太原

白居易樂天著

明後學松江馬元調巽甫校

中書制誥一

舊體○凡二十七道

張徹宋申錫可竝監察御史制

勅舊制副丞相缺中執憲得出入御史缺則於內外史

中考覈其實封奏其名以補之今御史中丞僧孺奏其

官張徹某官宋申錫皆方直強毅可監察御史章下丞

相府丞相亦曰可朕其從之竝可監察御史

楊子留後殷彪授金州刺史兼侍御史河陰令
韋同憲授南鄭令韋弁授絳州長史三人同

制

勅某官殷彪等今之郡守古侯伯也今之邑令古子男也於吏有君臣之道焉於人有父母之道焉郡邑之間承上率下者州長史也凡此之官與吾共理使吾人安而無怨者其在吏良而政平乎金秦之郡也奏告專達得行異政以彪清平信惠臨事能守大小之職率著名績故仍憲簡俾往牧之南鄭梁之邑也上有賢師無憂掣肘以同憲河陰有政可以移用故換銅印俾往宰之

而絳爲名藩弁實良士命之贊貳亦叶其宜宜各悉心修舉三職可依前件

馮宿除兵部郎中知制誥制

勅吾聞武德暨開元中有顏師古陳叔達蘇頲稱大手筆掌書王命故一朝言語煥成文章朕承祖宗思濟其美凡選一才補一職皆不敢輕易其庶幾前事乎刑部郎中馮宿爲文甚正立意甚明筆力雄健不浮不鄙况立身守事端方精敏而我誥命忽思潤色之聽諸人言曰宿也可宿立朝歷御史博士郡守尚書郎在仕進途不爲不遇然不登茲選未足其心故吾于今歸汝職業

仍遷秩爲五兵郎中勉繼顏陳無辱吾舉可尚書兵部
郎中知制誥

鄭覃可給事中制

勅給事中之職凡制勅有不便於時者得封奏之刑獄
有未合於理者得駁正之天下寃滯無告者得與御史
糾理之有司選補不當者得與侍中裁退之率是而行
號爲稱職固不專於掌侍奉讚詔令而已中大夫行諫
議大夫雲騎尉滎陽縣開國男食邑三百戶鄭覃清節
直行正色寡言先臣之風藹然猶在自居首諫益勵蹇
諤擢領是職必有可觀亦欲天下聞之知吾獎骨鯁之

臣來諫諍之道也可給事中散官勲如故

韋審規可西川節度副使御史中丞李虞仲崔

戎姚向溫會等並西川判官皆賜緋各檢校

省官兼御史制

勅西川曰益部地有險府有兵礙戎屏華號爲難理故
吾命文昌爲帥長俾鎮撫焉次命審規爲上介俾左右
焉又命虞仲戎向會等爲庶寮俾咨度焉進言者謂文
昌賢而審規輩才以才佐賢蜀必理矣輟三署吏贊丞
相府假憲官職加臺郎暨一命再命之服以遣之其於
張大光榮與四方征鎮之賓寮不侔矣爾等苟佐吾丞

相以善政聞使吾無一方之憂吾寧久遺汝於諸侯乎
爾其勉之可依前件

魏博軍將呂晃等從弘正到鎮州各加御史大
夫賓客等制

勅去年冬命侍中弘正建大將軍旗鼓移鎮於成德軍
而晃以下四十有一人實從魏來或驅或殿被堅執銳
可謂有勞宜以官坊之寮憲府之職隨其名秩序而寵
之可依前件

張平叔可戶部侍郎判度支制

時長慶二
年三月制

勅故事君使臣其道不一或先勞而後受賞或先加寵

而後責功蓋宜便有後先時事有緩急故耳朝議大夫
守鴻臚卿兼御史大夫判度支上柱國賜紫金魚袋張
平叔國之材臣也計能折秋毫吏畏如夏日司會逾月
綱條甚張況師旅未息調食方急倚成取濟非爾而誰
故自大鴻臚換居人部造膝而授不時而遷其要無他
是欲急吾事而望倚爾功也公卿以降羣有司盈庭然
問曰與吾坐而決事丞相以下不過四五而主計之臣
在焉非智能則事不可成非諒直則吾難近噫職局之
外得不思稱官望而厭我心乎可守尚書戶部侍郎判
度支散官勲賜如故

李虞仲可兵部員外郎崔戎可戶部員外郎制
勅劔南西川節度判官朝散大夫檢校尚書戶部郎中
兼侍御史上柱國賜紫金魚袋李虞仲西川觀察判官
朝議郎檢校刑部員外郎兼侍御史雲騎尉賜緋魚袋
崔戎等去年春朕憂西南事授丞相文昌鉞鎮撫之次
選郎吏有才實如虞仲輩者往贊理之故其制云苟佐
吾丞相以善政聞寧久遺汝於諸侯乎今蜀政成矣蜀
人安矣是汝輩職修事舉而奉吾詔書甚謹也前言在
耳安可弭忘並命爲郎主吾信賞虞仲可行尚書兵部
員外郎戎可尚書戶部員外郎散官勳如故

牛僧孺可戶部侍郎制

勅戶部侍郎周之地官小司徒也掌天下田戶之圖生
齒之籍賦役貨幣之政今以待國用而質歲成元和以
還日益寵重善其職者多登大任中茲選者莫匪正人
誰其稱之我有邦彥朝議郎守御史中丞上柱國賜紫
金魚袋牛僧孺自舉賢良踐臺閣秉潤色筆提糾繆綱
而書命無繁詞決事無留獄受寵有憂色納忠多苦言
朕心知之何用不可夫以人會之重如彼僧孺之賢若
此俾居是職不亦宜乎可守尚書戶部侍郎散官勳如
故

庾承宣可尚書右丞制

勅朝議大夫守尚書刑部侍郎驍騎尉庾承宣管我太宗文皇帝嘗謂尚書丞百職綱維事一失中則天下有受其弊者因命戴胄魏徵及杜正倫劉洎輩繼領是職分居左右官修事理人到于今稱之故吾前命崔戎持左綱今命承宣操右轄衆口籍籍頗爲得人況承宣端諒勤敏周知典故必能爲我紐有條之綱柅妄動之輪坐曹得出入郎官立朝得奏彈御史會政決要扶樹理本無俾戴魏劉社專美於貞觀中可守尚書右丞散官勲如故

張聿可衢州刺史制

勅中散大夫行尚書工部員外郎上柱國吳縣開國男食邑三百戶張聿內外庶官同歸共理牧守之任最親吾人蓋施張舉措由其心賞罰威福懸其手若一日失其職一郡非其人而名未達於朝聽之間爲害已甚矣選授之際得不慎夫以爾聿前領建溪有理行次臨沔郡著能名用爾所長副吾所急宜輟郎署往頒詔條來暮之聲佇入吾耳可使持節衢州刺史散官勲如故

辛丘度可工部員外郎李石可左補闕李仍叔可右補闕三人同制

勅朝散大夫右補闕內供奉飛騎尉辛丘度等朕詔丞相求方畧忠讜之士置于左右而播等以石暨仍叔應詔言其爲人厚實蹇直嘗以文行謀畫容於幕府之間臨事敢言當官能守可使束帶同升諸朝又言丘度介潔靜專不交勢利宜加推獎以勸其徒况久次者轉遷後來者登進皆適所用平章可之可依前件

魏博軍將薛之縱等十四人各授官爵制

勅薛之縱等去年冬授愬鉞俾自徐鎮潞而愬與其麾下同德食不求飽席不暇煖節鎮殿定一如所委此誠愬之忠畧然所賴之縱等焦心勦力同濟厥功而頒賞之功可依前件

裴度李夷簡王播鄭絪楊於陵等各賜爵并迴授爵制

勅禮云臣下竭力盡忠以立功於國者必報之以爵祿此言上之不虛取于下也而司空度等咸以忠力作股肱心膂之臣大節大勞書在甲令然則功如是忠如是高爵重秩予何愛焉故能統御之初先行信賞詔主爵者合爲奏書或加寵進封或延恩任子次勤第品咸按舊章行乎敬之無忝予一人之嘉命可依前件

鄭餘慶楊同懸等十人亡母追贈郡國夫人制
勅餘慶亡母某氏等夫德不旌則勸善之典缺矣親不
顯則揚名之道廢矣凡今公卿大夫至于元士濟濟然
抱忠履信立我朝者皆聖善之教燕翼之方所致也自
家刑國有所從來不大封崇是忘報施朕去年仲月統
御之初發號推恩先降是命豈直光前慰後而已哉亦
欲使天下爲母者聞庶幾乎善統其家慈訓其子厚人
倫而美教化也可不務乎

李寘授咸陽令制

勅某官李寘近者西夷犯塞詔諸將出師司計臣俊言

寘有應辨才可司饋餉故自京府掾假臺郎憲職以命
之屬寇遁師旋未展其用況在公族推有器幹今授銅
印俾宰咸陽夫庶官之任爲急西郊咫尺佇爾能聲可
京兆府咸陽縣令

劉縱授秘書郎制

勅某官劉縱徒步詣闕上獻封章又自敘其先臣陳許
間事皆歷歷可聽公侯子弟多溺於驕邪爾能讀書學
文自可嘉獎圖籍之府命爾爲郎豈唯振滯求能且不
欲使勲勞之後棲棲於塵土中可秘書省秘書郎

程羣授坊州司馬制

勅程羣嘗從事於鎮冀之間病免所職垂老之歲棄爲窮人俛俛無歸有足傷者夫一夫不獲若納諸隍此聖王用心推已及物今宜與羣祿食使飽暖其身亦猶晉君不能忘情于絳老也往佐中部爾其念哉可坊州司馬

海州刺史王元輔加中丞制

勅海州刺史王元輔漢制二千石有政績者就中加命秩不即改移蓋欲使吏久於官而人安於化也今元輔爲郡頗有理名廉使上聞奏課居最宜加中憲旌而寵焉庶使與君共理者聞而知勸可兼御史中丞

楊潛可洋州刺史李繁可遂州刺史史備可濠州刺史制

勅朝散大夫守尚書金部郎中上柱國楊潛温厚靜專有端士之操朝議大夫前使持節吉州諸軍事吉州刺史上柱國李繁精強博敏有才子之稱將仕郎前使持節光州諸軍事守光州刺史雲騎尉史備變通健決有良吏之用而能本於文學輔以政事爲郎見其行爲郡聞其聲夫洋更梁之險遂居蜀之腴濠控淮之要三者皆名郡而委之三吏得不思勤儉教導勞來安緝膏雨吾土襦袴吾人者乎潛可使持節洋州諸軍事守洋州

刺史散官勲如故繁可使持節都督遂州諸軍事守遂州刺史備可使持節濠州諸軍事守濠州刺史充團練渦口西城等使官勲如故

張洪相里友畧並山南東道判官同制

勅朝議郎守太常博士上柱國張洪前瀛漢等州都團練判官朝議郎侍御史內供奉上柱國賜緋魚袋相里友畧等元翼以大節大忠綽聞朝野授鉞開府殿我漢南而又求賢乞能以自參貳則其賓寀宜有以稱之故求吾俊造之英勲烈之胄達朝儀而練戎事者與焉今以洪之知國禮奉家聲以友畧之富藝文飽軍旅兩中

是選合而命之優秩寵章無所愛惜時無古今代有忠賢苟致吾元翼於牟杜間別有陟明之典在洪可檢校尚書職方員外郎兼侍御史充山東南道節度判官仍賜緋魚袋散官勲如故友畧可檢校尚書屯田員外郎兼侍御史充山南東道觀察判官散官勲如故

姚成節右神策將軍知軍事制

勅朝議郎前使持節成州諸軍事守成州刺史充本州守捉使賜紫魚袋姚成節嘗爲天平軍裨將當劉悟之立忠勲也謀成事集爾有助焉雖授一城未足酬獎况聞信厚勤恪宜於爪牙肘腋間居之管漢文帝以宋昌

忠勞擢拜將軍掌宿衛今吾用汝猶前志也環拱之職
得不勉歟可毅果校尉守右神策將軍知軍事賜如故
高鉞等一十人亡母鄭氏等太君制

勅起居郎高鉞亡母滎陽郡太君鄭氏等予有侍臣咸
士之秀者或左右以書吾言動前後以補吾闕遺森然
在庭各舉其職爰思乃教知所從來豈非善稟於親行
成於內徙鄰斷織訓使然耶不追封邑之榮曷顯統家
之慶可依前件

柳公綽可吏部侍郎制

勅京兆尹兼御史大夫柳公綽長吏數易爲害甚多邇

來都畿未免斯弊或苛急而人重困或軟弱而姦不息
得其中者其公綽乎細大必躬親剛柔不吐茹甚稱厥
職惜而不遷然智者常憂忠者常勞亦非吾以平施御
臣下之道也尚書六職天官首之辯論官材澄汰流品
比諸內史選妙秩清詢衆用能無易公綽爾宜飾躬承
命以裴王崔毛爲心苟副吾言用稱乃職而今而後亦
何往而不適哉可尚書吏部侍郎

孔戣可散騎常侍制

勅管齊桓公心體懈怠則隰朋侍漢成帝親重儒術則
劉向從今之常侍是其選矣稱其任者唯正人乎吏部

侍郎孔戣言行謹直風操端莊肅然禮容清廟之器始
自筮仕迄于天官虛舟爲心利刃在手全才具美時論
多之可使珥貂立吾左右從容侍從以備顧問隰朋劉
向豈遠乎哉可右散騎常侍

王公亮可商州刺史制

勅尚書司門郎中王公亮茂於學精於文文學之外有
枿思積切毫符佛切荆符佛切鐘之用自佐戎律領郡符持憲爲郎
皆稱厥職吾前命劉遵古張平叔爲商州刺史繼有善
政人用乂安今爾代之守而勿失况商土瘠商人貧可
以靜理而阜安不宜改張而易轍以爾精敏當自得中

可商州刺史

韋觀可給事中庾敬休可兵部郎中知制誥同
制

勅職之要莫先乎駁正文之選莫難於司言將使朝綱
有條朕命惟允在二者得人而已中大夫使持節蘇州
諸軍事守蘇州刺史上都騎尉韋觀精微專直通乎事
典可使平奏議而坐左曹朝散大夫尚書禮部郎中上
柱國庾敬休溫裕端明飾以辭藻可使書誥命而專右
席而輪轅鑿柄各適所宜夫惟刺史守列城郎官應列
宿選任倚注非不榮重然吾左右前後方求正人如觀

敬休不宜疎遠亦猶有聲之玉無類之珠不置於珮服
掌握之間皆非其所也宜自敬謹無忝吾言覲可行給
事中散官勲如故敬休可尚書兵部郎中知制誥散官
勲如故

白氏長慶集卷第四十八

白氏長慶集卷第四十九
唐太子少傅刑部尚書致仕贈尚書右僕射太原
白居易樂天著

明後學松江馬元調巽甫校

中書制誥二 舊體凡三十道

李愬贈太尉制

勅故特進行太子少保上柱國涼國公食邑三千戶食
實封五百戶李愬在建中歲泚賊叛逆惟太師晟實仗
大順翦而誅之在元和朝蔡寇充斥惟爾愬實奮奇策
虜而戮之父子之功書于甲令俱為第一焯

職畧呼切焯

切當時矧爾一登將壇六換鉄鉞坐論巖廊之道卧理
 保傅之事方深倚望奄忽淪謝是用當食累歎視朝三
 輟豈不以爪牙之威缺立月切於外股肱之痛軫於中者
 乎而弔奠之命賙六鳳切賙符過切之數雖加常等未表殊
 恩宜以太尉之秩贈上公之袞斂俾爾被哀榮服忠孝
 從先太師於九原也不其盛歟嗚呼美終必復禮無不
 答昔爾之勤勞如彼今吾之寵飾如此君臣報施可謂
 兩臻其極焉爾靈有知欽我追命可贈太尉仍令所司
 備禮冊命賜絹二千匹布七百端米粟一千石委度支
 送

田布贈右僕射制

勅朕聞古之臣子有忍死効節為忠者有不傷髮膚全
 歸為孝者有不顧性命引決為忠者但問所操所蹈何
 如耳豈繫去就生死之間耶噫今有重義如泰山輕生
 如鴻毛死而不朽者安得不褒揚寵飾使天下聞之所
 以勸孝心激忠腸然後薄者敦懦者立幸生者耻格也
 故魏博等州節度觀察處置等使起復寧遠將軍守右
 金吾大將軍負外置同正負檢校工部尚書兼魏州大
 都督府長史御史大夫賜紫金魚袋田布其父太尉甚
 賢此子鎮陽之亂弘正歿焉而布枕戈嘗膽誓報冤耻

故吾以大將軍之旗鼓鈇鉞先臣之土壤士卒盡用委
 付親加勉諭人鬼之憤期一洩而甘心焉既而激發魏
 師出疆臨敵事有不得已者布亦末如之何卒至於刳
 心自明遺疏自列謝君於天上報父於地下可謂田氏
 有孝子國家有烈臣則吾之知臣弘正之知子明矣聳
 動人聽盡迄力切傷我懷故廢臨朝所以示哀也加禮命
 所以示榮也哀榮恩禮至則至矣嗚呼曾未足以顯爾
 之節不厭吾之心乎可贈尚書右僕射賜布帛三百段
 米粟二千石委度支逐便支遣

韋貫之可工部尚書制

勅河南尹韋貫之善馭者齊六轡善理者正六官六官
 成則百事舉故吾選賢任舊以次第補之而六卿材吾
 已得五闕一不可待汝而成貫之以正行明誠為先朝
 輔始以直進終以直退道有消長德無緇磷及帥湘潭
 尹河洛而廉平清一之政繼聞于京師名簡吾心善入
 我耳宜置朝右以之厚時風况今之尚書漢公卿也言
 動可否屬人耳目焉固不專率四屬程百工備位於冬
 官而已可工部尚書

太子詹事劉元鼎可大理卿兼御史大夫克西
 番盟會使右司郎中劉師老可守本官充盟

白集 卷四十九
會副使通事舍人大僕丞李武可守本官兼
監察御史充盟會判官三人同制

勅太子詹事劉元鼎等夫選可任而任之則用無不適
擇可勞而勞之則事無不成蓋君使臣臣事君之大端
也屬西夷乞盟求可以莅之者歷選多士吾得三人今
以元鼎之博通師老之誠諒武之恭敏合而爲用不亦
可乎爾宜臨之以莊示之以信儀形辭氣皆有可觀必
能率服彼戎不獨益敬吾使法卿憲秩寵之以遣可依
前件

許季同可祕書監制

勅大理卿許季同國朝以來有劉得威張文瓘唐臨爲
大理卿有魏徵虞世南顏師古爲祕書監設官之重得
賢之盛人到于今稱之今季同以明慎欽恤理刑獄以
文學博雅長圖籍由廷尉而長祕府論者榮之宜自重
其官自遠其道又思與劉張唐魏虞顏爲比不亦自多
乎可祕書監

張元夫可禮部員外郎制

勅殿中侍御史張元夫官有秩清而選妙者其儀曹員
外郎之謂乎凡殿內御史雖文才秀出功課高等者滿
歲而授猶曰美遷有如元夫連膺二選歷彼踐此僉以

白集 卷四十九 四
爲宜况怒飛青冥翔集禁陛由茲去者十八九焉汝知之乎思有以稱可尚書禮部員外郎

楊嗣復可庫部郎中知制誥制

勅權知兵部郎中楊嗣復朕聞前代制誥中書令侍郎舍人通掌之國朝以來或以他官兼領惟其人是用不限於資秩職署焉予以爲然多繇是選前所命者時稱得人研實覈名次第及汝汝嗣復根於義訓播爲令器文煥發而才秀出不當汨沒於郎吏間况貞元中汝父爲中書舍人甚稱厥職今使汝繼書吾命成一家言堂烜况遠切國華在於此舉爾宜兢兢祇勵無隕其名可庫

部郎中知制誥

張平叔可京兆少尹知府事制

勅商州刺史張平叔爲人廉直爲政簡惠前後歷掾邑宰郡守而去思來暮之謠繼聞於人聽焉及副鹽鐵官刺商雒郡會課報政亦甲於他官自貞元以來用三科取士奉詳明政術可以理人之詔而得其名有其實者幾何人哉平叔居其一也能効若是何用不減故事內史缺未補閒亞尹得行大京兆事試可而卽真者往往有之故其選任日益難重爾宜稱所舉慎厥職無墮大以勤小無急弱以緩強夕念朝行遵吾約束可京兆少

白集
卷四十九
尹知府事

康日華贈坊州刺史

勅漢令軍中士有不幸死者得以棺斂傳送若是而已
猶四方歸心焉矧吾褒贈以榮之惻隱以將之顯其忠
撫其後亦所以激生者節豈獨慰逝者魂乎左神策軍
赴行營正將試太常卿康日華領王師死王事軍書置
奏朕甚悼焉可贈坊州刺史

張籍可水部員外郎制

勅登仕郎守國子博士張籍文教興則儒行顯王澤流
則歌詩作若上以張教流澤為意則服儒業詩者宜稍

進之頃籍自校秘文而訓國胄今又覆名揣稱以水曹
郎處焉前年以來凡歷文雅之選三矣然人皆以爾為
且豈非篤於學敏於行而貞退之道勝也與之寵名者
可以獎夫不汲汲於時者可守尚書水部員外郎散官
勲如故

何士乂可河南縣令制

勅漢朝郎官出宰百里故今京邑令缺多命尚書郎補
焉朝議郎尚書水部員外郎何士乂慎檢和易介然有
常守而勿失可使從政然能佩弦以自導帶星以自勤
則緩急勞逸之間必使適宜而會理矣以爾舒退故吾

進之可守河南縣令散官如故

崔植一子官廻授姪某制

勅丞相植典職樞務亦旣逾歲而能明我目達我聰左右我躬以底于道况屬郊祀攝贊大儀寵錫之間植宜加等而念其猶子乞用推恩旣叶舊章允膺新命其姪某可某官

王起等賜勲制

勅中書舍人王起等朕臨御之始慶賞遂行卿士大夫迺加勲秩自武騎尉以上十有二轉自起以下十有四人咸賜以勲舉書于籍可依前件

蕭俛除吏部尚書制

勅古者君使臣以禮臣事君以忠季代已還鮮由茲道先皇帝創於是故在位十五載凡解相印者殆二十人多寵爲大僚或付以兵柄矧予小子宜有加焉而輔弼之臣嘗經一日造吾膝沃吾心則思與之始終厚申恩禮不唯勸感來者且不敢失墜先志也尚書右僕射蕭俛忠蕭孝敬佐吾爲理以勤事國以疾退身本末初終不失其道旣免樞務倚爲右揆加恩超等復吾前言而俛繼上讓章至於三四敦諭煩切陳乞彌堅是用正命爲選部尚書而冠六卿統百職尚可以表吾寵重亦所

白集 卷四十九
以成爾謙光爾宜欽厥止慎厥終無忝我褒揚之命可
吏部尚書

溫堯卿等授官賜緋充滄景江陵判官制

勅溫堯卿等今之俊又先辟于征鎮次升于朝廷故幕
府之選下臺閣一等異日入爲大夫公卿者十八九焉
荆門景域南北大府而堯卿等或已參軍要或方受兵
書各命以官分試其事名秩章綬分而寵之夫千里之
行始於足下苟自強不息亦何遠而不屆哉可依前件
神策軍及諸道將士某等一千九百人各賜上

柱國勳制

勅古之善爲國者勞不忘而賞不濫有賞一人而爲僭
者有千百人而不爲費者其要在當否而已不繫於衆
寡也朕自統御已來忽忽有念念天下材力之將勇敢
之士進有征討之苦退有守捍之勤藏之中心何嘗暫
忘而亟因大慶恩洽普恩某等若干人咸進勳級並可
上柱國

李彤授檢校工部郎中充鄭滑節度副使王源

中授檢校刑部員外郎充觀察判官各兼侍

御史賜緋紫制

勅萬年令李彤徒紅切侍御史王源中等舜以五長綬四

國若今之節制也周以十聯率諸侯若今之廉察也國
 家合為一柄付有功諸侯故其陪臣選任益重或輟朝
 籍授簡書者徃徃而有况承元有大忠于國受重任于
 外使其承上莅下敬始善終實在庶察叶力以濟今以
 彤宰京邑有理劇之用如水在器撓之不濁以源中立
 憲府有糾正之能如刃發劘割之無滯一可以倅七醉切
 戎事一可以佐輶余招切車二職交修在此一舉臺郎憲
 吏金印銀章加乎爾身無忝我命可依前件

柳公綽父子温贈尚書右僕射竇侔父叔向贈
 工部尚書薛伯高父懌贈尚書司封郎中元

宗簡父鋸贈尚書刑部侍郎皇甫鏞父愉贈
 尚書右僕射韋文恪父漸贈太子少保王正
 雅父翊贈太子太師范季睦父彥贈禮部郎

中八人亡父同制

勅古人有云樹欲靜而風不止子欲養而親不待向無
 顯揚褒贈之事則何以旌先臣德慰後嗣心乎故朕每
 施大恩行大慶而哀榮之命未嘗闕焉銀青光祿大夫
 行尚書吏部侍郎上護軍河東縣開國子柳公綽父温
 等咸有令子集于中朝資父事君移忠自孝本於嚴訓
 酬以寵名賜命追榮各高其等嗚呼存者不匱徃者有

知斯可以載揚蘭陔居亥切之光輟風樹之歎耳可依前件

李宗河可渭南令李玘可京兆府戶曹制

勅李宗河等夫綱一提則群目舉源一澄則眾流清故朝廷命官師選寮屬亦得其人矣按內史公綽奏宗河學古修已練達道理乃乞為旬縣令玘勵節徇公通詳典故乞為天府掾况渭南封圻之守邑戶曹賦籍之要司位雖未高職亦不細宜乎以三語自試以一同自効無俾爾長貽失舉之責焉可依前件

兵部郎中知制誥馮宿侍御史裴注義武軍行

軍司馬御史中丞蕭籍饒州刺史齊照鄧州

刺史渾鍼呼對切並可朝散大夫同制

勅某官馮宿等凡品秩之制有九自五而上謂之貴階而宿司吾言注持吾憲籍照以降皆著勤由朝議郎一進而及此此之所以為貴者蔭及子命及妻豈唯腰白金服赤第敷勿切從大夫之後而已寵數既重思有以稱之並可朝散大夫

太常博士王申伯可侍御史鹽鐵推官監察御

史裏行高諧河東節度叅謀兼監察御史崔

植並可監察御史三八同制

勅某官王申伯學優行茂飾以詞藻執禮定議多得其中某官高諧溫莊潔白不交勢力某官崔植外和內直通知政典在倫輩內而人皆謂之滯淹唯是三子之才吾得於御史中丞僧孺御史吾耳目官也非清明勁正不泥不撓者安可使辨淑慝振紀律廣吾之聰明焉並命同升無忝是舉可依前件

溫造可起居舍人充鎮州四面宣尉使制

勅殿中侍御史溫造嘗糾天府不曠官馳軺車不辱命况爲人外和內決以兼濟爲心拔居殿中以備時使會吾憂兩河閒事求可諭朝旨慰人心者使焉揆効酌能汝中吾選故不待滿歲擢爲右史出則銜吾命入則記吾言獎任不輕思有所立可依前件

高芳穎等四人各贈刺史制

勅故某官高芳穎等昔文王葬枯骨之無知也但惻隱之心不忍棄也故天下皆歸仁焉况捐軀之魂死節之骨見危授命朕甚憫之深州故小將高某等四人皆從戰陣連歿王事褒贈之數宜其有加並命追榮以光地下可依前件

崔咸可洛陽縣令制

勅度支員外郎崔咸漢以四科辟士求多略不惑強明

決斷者任三輔令故今兩京令缺亦擇尚書郎有才理者補之而成在郎署中推為利用加以詞學緣飾吏能操割洛陽必有餘力然宰大邑如烹小鮮人擾則疲魚擾則餒寬猛吐茹其鑒于茲可洛陽令

周愿可衡州刺史尉遲銳可漢州刺史薛鯤可河中少尹三人同制

勅前復州刺史周愿等夫勞者之思休息病者之思救療人之本情也今兵戈甫定物力未豐如聞湘衡巴漢之間人猶疲困宜擇良二千石俾休息而救療之而愿銳鯤等前以符竹分鎮三郡皆有善政達乎朝廷舉課考能無愧是選息勞救病其有望於汝乎河中吾之股肱郡也貳尹職而佐府事者亦在得人命鯤處之無荒厥職可依前件

楊景復可檢校膳部員外郎鄆州觀察判官李綬可監察御史天平軍判官盧載可協律郎天平軍巡官獨孤涇可監察御史壽州團練副使馬植可試校書郎涇源掌書記程昔範可試正字涇源判官六人同制

勅某官楊景復等士子不患無位患已不立苟有所立人必知之惟爾等六人蘊才業文咸士之秀者果為賢

侯交辟俾朕得聞其姓名是用各進其秩分授以職若修飾不已籌謀有聞則鴻漸之資當從此始而景復稟訓祇命頗著令稱故因滿歲特假臺郎古者公臣之良入補王職朝獎非遠爾其勉之可依前件

前廬州刺史殷祐可鄭州刺史制

勅某官殷祐夫吏寬信則人人不偷吏廉明則人人盡力吾觀祐之爲政其近之乎前守廬江能率是道歲會課第甲於他州俾精前功且佇來効宜換符竹移牧鄭人在春秋時鄭爲侯國武公善於其職子產遺愛於人無古今更有能否聽吾用汝汝其嗣之可鄭州刺史

李德循除膳部員外郎制

勅尚書郎自奏議彌綸外凡邦之牲豆之品醴膳之數實糾理之命文昌長佐春官卿以朝散大夫守祕書丞上柱國李德循籍訓于台庭業官于書府揆才考第得補爲郎司膳缺員爾宜專掌可尚書膳部員外郎餘如故

張正甫可同州刺史制

勅馮翊吾左輔也分理浩穰汝兩切率先風化故其選次任內史一等而冠四方岳牧之首焉宜求吏課高位望重者分部共理以夾輔京師尚書右丞賜紫金魚袋張

正甫自登臺閣爲人謹直物論時望敬而重之及領藩部爲政寬簡將吏黎庶信而愛之所謂朝廷正臣郡國良吏常有惠政加于是邦迨茲五年去思猶在故輟臺轄再委郡符宜敬服新命增修舊政俾吏畏如夏日人歸如流水慎于終始典于厥官可持節同州諸軍事守同州刺史充本州防禦使散官勲如故

崔瑄可職方郎中侍御史知雜制

勅近歲已來副相多缺朝綱國紀專委中憲而侍御史一人得總臺事以左右之今御史中丞德裕以中散大夫行尚書吏部員外郎上柱國崔瑄守文無害莅事惟精在郎署中推其才理奏補是職請觀其能因而可之仍加寵秩操執舉措爾無自輕可行尚書職方郎中兼侍御史知雜散官勲如故

白氏長慶集卷第五十

唐太子少傅刑部尚書致仕贈尚書右僕射太原

白居易樂天著

明後學松江馬元調巽甫校

中書制誥三 舊體凡二十八道

耕新迴鵲可汗文

維長慶元年歲次辛丑四月庚寅朔二十一日庚戌皇
帝若曰唐有天下垂二百載列聖垂拱八荒卽敘舟車
之所及日月之所照威綏仁董罔不嚮化惟北之氣積
厚而靈靈發象生生爲豪傑義信武烈代爲名王南西

東方亦有君長較雄鬪智莫之與京國朝已來寢漬風
澤或効功伐或申婚媾同和協比以託于今今朕不德
祇嗣大統推義布信以初爲常矧乎柔遠申恩睦鄰展
禮茲惟舊典垂自祖宗虔奉恭行安敢失墜咨爾九姓
迴鶻君登里羅羽錄沒密施句主錄毗伽可汗地生奇
特天賜勇智英姿所莅雄略所加諸戎雜虜愛畏柔服
風靡山立清寧一方宜人有土受天百祿時推代嗣實
來告予曰予一人實鄰冊命是用遣使朝議大夫檢校
左散騎常侍兼少府監御史大夫雲騎尉賜紫金魚袋
裴通副使朝議大夫守少府少監兼御史中丞襲魏國
公食邑三千戶賜紫金魚袋賈璘離珍切等持節備物冊
爲登里羅羽錄沒密施句主錄毗伽可汗於戲善必有
鄰德無不答此崇恩禮則彼竭信誠克係大義永藩中
夏昭昭天地實聞斯言

冊迴鶻可汗加號文

維長慶元年歲次辛丑某月朔某日皇帝若曰北方之
強代有君長作殿玄朔賓于皇唐粵我祖宗錫乃婚媾
五聖六紀二邦一家此無北伐之師彼無南牧之馬兵
匣鋒刃使長子孫叶德保和以至今日咨爾迴鶻君登
里羅羽錄沒密施句主錄毗伽可汗義智忠肅武決勇

健天之所授時而後生故東漸海夷西亘山狄惠寧威制鱗帖草偃聲有聞於天下氣無敵於荒外而能事大圖遠納忠貢誠請仍舊姻誓嗣前好朕惟睦鄰是務柔遠爲心旣降和親之命遂申飾配之禮禮物大備寵章有加喜動陰山光增昴宿夫以迴鶻雄傑如彼慶榮若此雖自貴曰天驕子未稱其盛雖自尊曰天可汗未稱其美宜賜嘉號以大誇將來今遣使某官某副使某官某等持節加冊爲信義勇智雄重貴壽天親可汗於戲釐降展親大德也進冊加號大名也宜乎思大德稱大名懋哉始終欽若唐之休命

韋綬從右丞授禮部尚書薛放從工部侍郎授刑部侍郎丁公著從給事中授工部侍郎三人同制

勅尚書右丞韋綬等朕在東宮時先皇帝垂慈聖之德念予冲蒙選端士通儒使講貫今古自禮樂刑政暨君臣父子之道博我約我日就月將俾予今不至墻面克荷丕訓大揚耿光實綬放公著之力也故朕嗣位未逾時月或自郡邸或自省署徵擢寵用爲丞郎給事官雖超拜職亦俱舉師道光而心愈讓人爵貴而心益恭宜更褒升重酬輔導以綬精粹辯博有先儒之風可作秩

宗以放端明慎重行君子之道可居憲部以公著檢敬
 規度得有司之體可貳冬官於戲貞百工平五刑典三
 禮皆重任清秩予無愛焉蓋欲表三子道不虛行而明
 予一人德無不報也綬可禮部尚書放可刑部侍郎公
 著可工部侍郎餘並如故

李諒除泗州刺史兼團練使當道兵馬留後兼

侍御史賜紫金魚袋張愉可岳州刺史同制

勅扼淮壓湘之列城曰泗與岳舟車會焉軍戎屯焉是
 二郡守則易為政先是分領者多會有政歲時罷去長
 吏數易人必重困宜擇良二千石救而養之以諒自澄

城長訖尚書郎中間又再為州牧三宰劇縣皆苦心卹

隱煦嫗及物操刃決滯蠹駘霍號切有聲而愉亦學古入

仕甚自修飾河西有政次於諒焉故命愉守岳命諒守

泗仍以戎職留事憲簡章綬一加於諒諒其聽之哉異

日吾將以重官劇職處爾爾安得不副吾所急用爾所

長更宜以難理之郡自試爾各依前件

裴廙授殿中侍御史制

勅某官裴廙夷益切貞觀初張行成為殿中侍御史糾劾

巡察時以為能朕思弘貞觀之風故選御史府官亦先

其精敏剛正者以爾廙動循道理語必信直勵其志節

有類行成因授厥官無忝吾舉可殿中侍御史

裴通除檢校左散騎常侍兼御史大夫充迴鶻

弔祭册立使制

勅語曰使於四方不辱君命可謂士矣况馳輶軒奉璽書稱天子之使以耀焜絕域者豈容易其選哉少府監裴通溫敬忠實加之謹敏有言語可任以專對有辯識可委以便宜屬北方君長來告代嗣求可以將命展禮申吾哀榮之恩者其任不細頗難其人擇臣者君而通可使命為副丞相而加金貂之貴授册與節臨軒遣之庶乎遠而有光華且欲使絕俗殊鄰益敬吾使也可依

前件

元稹除中書舍人翰林學士賜紫金魚袋制

勅仲尼曰志有之言以足志文以足言言之無文行而不遠故吾精求雄文達識之士掌密命立內廷甚難其人爾中吾選尚書祠部郎中知制誥賜緋魚袋元稹去年夏拔自祠曹負外試知制誥而能

師銜繁詞刻楚切

弊句使吾文章言語與三代同風引之而成綸綍勿

切垂之而為典訓凡秉筆者莫敢與汝爭能是用命爾

為中書舍人以司詔令嘗因暇日前席與語語及時政

甚開朕心是用命爾為翰林學士以備訪問仍以章綬

寵榮其身一日之中三加新命爾宜率素履思永圖敬終如初足以報我可中書舍人翰林學士賜紫金魚袋

孔戣渠為切授尚書左丞制

勅漢詔丞相歲舉質直忠厚遜讓者蓋所以急賢俊扶政教厚風俗也然則退藏疎賤之士苟有一善尚搜而揚之况任久位崇才全望重而不致於急官要職者安可以紀綱庶政而羽儀朝廷焉正議大夫守右散騎常侍上柱國賜紫金魚袋孔戣自十年來歷中臺左曹國庠卿寺洎藩守近侍之職各以其任皆有可稱矧又貞白端莊淡然自立進無矜滿之色居無墮替之容求之

周行不可多得若戣者宜尚扶政教厚風俗之選也尚書丞掌決百事樞轄六曹晉魏已還右卑於左惟有立者可以糾吏惟無瑕者可以律人無以易戣徃恭乃位可尚書左丞散官勲賜如故

授柳傑等四人官充鄭滑節度推巡制

勅試太子司議郎柳傑等古者公府得自選吏屬今仍古制亦命領征鎮者必先禮聘而後升聞矧鄭滑帥承元輸忠仗順炳焉有大節於國奉上莅下實藉寮案以左右之而傑等或緣飾詞華或貯畜才行揣摩思誠以待已知宜展籌謀用光慰薦傑可某官充鄭滑節度推

官

韓愈等二十九人亡母追贈國郡太夫人制

勅王者有褒贈之典所以旌往而勸來也其有淑順之德標表母儀者聖善之訓照燭于道者又有名高秩尊祿養之不逮者霜降露濡孝思之罔極者非是典也則何以顯其教而慰其心焉國子祭酒韓愈母某氏等蘊德累行積中發外歸于華族生此哲人爲我蓋臣率由茲訓教有所自恩不可忘是用啓郡國之封極哀榮之飾嗚呼歿而無知則已苟有知者則顯揚之孝追寵之榮可以達昊天而貫幽窆矣往者來者監予心焉可依

前件

授駱峻太子司議郎梧州刺史賜緋魚袋兼改名玄休制

勅某官駱峻桂林守土臣式方言梧爲要郡兵後人困乞廉貞吏以撫之又言峻守道抱器可以起用朕方思良吏以活元元適副所求卽可其奏宮寮郡印命服嘉名四者與之足爲優異峻宜副所舉慎所爲無以滋章爲聰明無以鹵莽爲高簡勉率中道往安梧人可梧州刺史

劉總弟約等五人並除刺史賜紫男及姪六人

除贊善洗馬衛佐賜緋同制

勅某官劉約等惟爾先父太師濟經武秉哲為國元臣
 鎮陽之役實歿王事茂勲大節書于旂常惟爾兄司空
 總象賢纂戎以續名業納忠于王室振耀其家聲而爾
 約等亦能稟守其風忠恭孝友念義方之訓而不墮居
 貴介之地而不驕况兼器能皆可任用授郡符而加命
 服者五升朝序而佐環衛者六朱轡子數切紫綬煥赫相
 望勲德之家於斯為盛嗚呼昔武子有遺愛晉人憐其
 子趙季有篤行漢朝寵其弟今以濟之仗順積善宜鍾
 慶於子孫以總之翰忠立愛可延賞於弟姪多與爵祿

予無惜焉欲使天下知爾父兄忠順之若彼而國家報
 施之如此可依前件

王元輔可左羽林衛將軍知軍事制

勅國家設十二衛猶漢之有南北軍而左右羽林尤稱
 親重自諸衛而移鎮者謂之美遷左神武將軍王元輔
 生勲伐之家通吏理之事佐戎臨郡率著能名以掌勾
 陳而護建章備巡警而嚴羽衛大將軍事假而行之宜
 勵初終副茲寵任可依前件

尚書工部侍郎集賢殿學士丁公著可檢校左

散騎常侍越州刺史浙東觀察使制

勅古者通守守土刺史按部從宜務簡今則合之故任
 日崇而選日重非廉平簡直兼愷悌之德者曾不足中
 吾選焉某官丁公著嘗以學行禮法誨予一人報德圖
 勞連加寵擢起曹書殿兼而委之二職增修三命益敬
 朕以浙河之左抵于海隅全越奧區延袤千里宜得良
 帥俾之澄清徃分吾憂無出爾右假左貂而帖中憲操
 郡印而握兵符勉哉是行佇聞報政可依前件

鄭綱

伊真切

可吏部尚書制

勅天官太宰秩序常尊自昔迄今冠諸卿首非位望崇
 盛者不可以處之而朕即位以來凡命故相領者三矣

迨此而四可不重乎東都留守防禦使檢校刑部尚書
 兼御史大夫滎陽縣開國公鄭綱有邴吉之寬裕子產
 之恭惠合而為用藩輔四朝故事遺愛留于官次國之
 都府半在東周委以保釐人安吏肅重煩耆德入領冢
 卿昔魏用崔琰毛玠典吏曹一時之士以廉節自勵國
 朝以宋景李义掌選部亦能遏絕訛偽振張紀綱官無
 古今得人則理吾言及此欲爾繼之可吏部尚書

重授李晟

時征切

通事舍人制

勅李晟昔管仲云升降揖讓進退閑習臣不如隰朋今
 之通事舍人近此選也而晟常中此選善於其職故相

白集 卷五十一
導通奏之節宣揚拜起之儀引而贊之不聞失禮既終
喪紀宜服官常可使束帶曳裾爲吾謁者可通事舍人

徐登授醴泉令制

勅徐登京兆尹言登前爲涇陽令清廉簡直奉法愛人
請補醴泉再考其績昔子路理蒲仲尼誨曰愛而恕可
以容困溫而斷可以抑姦今醴泉人與蒲相類宜用此
道往訓養之歲時之間期於報政可醴泉縣令

王汶加朝散大夫授左贊善大夫致仕制

勅王汶善修其身爲時良士善訓其子爲國憲臣况以
時制之年知終請老不加優秩何厚吾風禮大夫七十

而致仕故我以朝散贊善二大夫之爵加乎爾身惟秩
與年兩皆得禮以茲退去亦足爲榮可依前件

元公度授華陰令制

勅元公度吾欲理化萬方故自近始前授太宗正登

切印綬使牧華人翻能副吾此心選吏責課言公度廉

明有守乞宰華陰當道東西往來先是爲邑者多飾廚
傳舍奉賓客以沽名譽而不親吾人爾能革之足爲良
宰敬長畏法無慢乃官可華陰縣令

唐州刺史韋彪授王府長史楊歸厚授唐州刺

史劉旻授雅州刺史制

勅韋彪等善官人者先考其能然後授以事使輪轅鑿
柄各適其用則群職庶政得以交修今以處宦久年高
勤於爲政俾從優逸入補王官以歸厚文行器能辱在
巴峽勵精爲理績茂課高區區萬州豈盡所用且移大
郡稍展奇才以旻早著戎功通詳吏事西南物土罔不
周知習俗從宜宜守嚴道分命以職各用所長度乎咸
修乃官同底于理可依前件

鄭綰烏重胤馬總劉悟李佑田布薛平等亡母
追封國郡太夫人制

勅經曰立身揚名以顯父母孝之終也而綰等學文武
之道以飾厥躬可謂善立身矣居將相之位以光大其
門可謂能揚名矣夫自家所以刑國本立而後道生必
待我哀榮之恩方成爾始終之孝是用啓封追號各顯
乃親慰後光前孝道備矣可依前件

奉議郎殿中侍御史內供奉飛騎尉賜緋魚袋
盧商可劔南西川雲南安撫判官朝散大夫
行開州開江縣令楊汝士可殿中侍御史內
供奉充劔南西川節度叅謀二人同制

勅劔南西川雲南安撫判官奉議郎殿中侍御史內供
奉飛騎尉賜緋魚袋盧商等士之束髮立身爲知已用

也無遠近無勞逸但問所務者何從者誰耳今蜀之帥
潞之長皆勤於述職妙於揀賢多得其雋材樂告以善
道故以叅其選焉或從事有勞或卽戎奔命輟玄黃之
著述振銅墨之滯淹以良士而贊賢侯宜乎多成功而
鮮敗事矣勉思所立各服乃官

李演贈太子少保制

勅夫生立勲勤下以忠事上也歿加褒飾上以義答下
也忠義臻其分哀榮極其恩而君臣之道全矣故奉天
定難功臣開府儀同三司檢校兵部尚書兼左衛上將
軍御史大夫李演忠信以爲幹義勇以爲器器與幹合
鞶成將材故出長諸侯入統七萃拊循警衛朕甚賴之
方深倚仗遽此淪謝茲予所以當宁興念廢朝軫懷聞
鞶鼓而長太息者也追崇之命宜有加焉可贈太子少
保

李諒授壽州刺史薛公幹授泗州刺史制

勅泗州刺史李諒等詩云愷悌君子人之父母朕三復
斯言往往興嘆安得循吏俾父母吾人乎吾前命諒爲
泗守未卽路會壽守植卒因改諒守壽命公幹守泗諒
之理課前詔詳矣公幹自尚書郎連領二郡政平法一
甚便於人加以有理戎之材可付留事故輟軍保仍憲

秩而兼寵之夫壽與泗皆郡之大者也諒與公幹皆二千石之良者也以大郡委良吏不亦宜乎噫諒無忘澄城之理公幹無替毫城之政則愷悌之化吾有望於二郡焉諒可壽州刺史公幹可泗州刺史

柳公綽罷鹽鐵守本官兵部侍郎制

勅某官柳某昔先皇帝知爾有材元和已來應用不暇及領推管漕運之務屬陵寢郊丘之禮財給事集時乃之功宜有轉移以均勞逸况聞牢籠無遺利課督有常規今詔刑部尚書播代之亦令守而勿失朕將興理化先務根本凡百職事悉歸有司惟茲夏官實掌戎政簡稽調補今方其時司馬貳卿佐平邦國是爾本職無忘增修可守兵部侍郎

崔元備張惟素鄭覃陸灑韋弘景賜爵制

勅崔元備等禮莫重於復土事莫大於慎終使朕以孝敬之誠獲貢于先帝實賴左右侍從之臣服勤祗事展四體而竭一心誠俾予無悔賞不敢忘爵不敢愛爾宜疏封服命而揚之可依前件

劉約授棣州刺史制

勅前齊州刺史兼御史中丞劉約故太保濟之子太尉總之弟也吾常思濟之功總之忠而嘉約之謹厚累遷

至齊州刺史在官無敗事罷秩有去思念舊錄能宜當
寵用況公侯之後約有通才封域之間棣爲要郡委之
共理誰曰不然可使持節棣州諸軍事棣州刺史依前
御史中丞散官勲如故

李肇可中散大夫郢州刺史王鎰可郎州刺史

溫造可朝散大夫三人同制

勅朝請大夫使持節澧州諸軍事澧州刺史上柱國賜
紫金魚袋李肇等乃者李景儉使酒獲戾而肇等與之
會飲失於檢慎宜有所懲由是左遷分爲郡守今首坐
者旣復班列緣累者亦當徵還但以長吏數易其弊頗

甚况聞三郡皆有政能人方便安不宜遷換故吾以采
章階級並命而就加之蓋漢制進爵秩降璽書慰勞良
二千石之旨也爾當是命得不勉哉

二千五百五十五
章前姓立命而始之益美而小致其利聖書揚揚
甚火回三味者其非人方更及不立聖非古昔公氣

白氏長慶集卷第五十一

唐太子少傅刑部尚書致仕贈尚書右僕射太原

白居易樂天著

明後學松江馬元調巽甫校

中書制誥四

新體祭文冊文附凡五十道

贈劉總太尉冊文

維長慶元年四月某日皇帝若曰朕聞古有履忠仗順
生而大有為者又有功成身退歿而永不朽者非正氣
令德閒生挺出則高名大節孰能兼之哉故天平軍節
度使檢校司徒兼侍中楚國公劉總降自天和生為人

傑得君於先帝叶運於昌時纂戎弓裘守土燕薊迨此一紀北方晏然有開必先納欵于我沈斷大事奮揚奇謀捧幽都四封之圖挈盧龍三軍之籍盡獻闕下高謝人間感動君臣驚激忠義顧妻子若脫屣視富貴如浮雲惟道是從奉身以退仲連事成而蹈滄海子房名遂而追赤松賢明所歸今古一致朕方改授兵柄移鎮鄆郊命作司徒倚爲左相期奮乃志將沃朕心而天不憖遺邦失柱石夫臣戴君如元首則君視臣如股肱股肱或虧何痛如是茲朕所以廢朝軫念備禮加恩庸建爾于上公益褒贈之崇重者也嗚呼爾總尚知之乎今遣

使其官某副使其官某持節冊贈爾爲太尉

傅良弼可鄭州刺史制

勅金紫光祿大夫使持節沂州諸軍事行沂州刺史兼御史中丞騎都尉傅良弼燕冀之間紛擾之際多壘失守孤城保全介于險中率乃麾下轉戰郊野來覲闕庭狗義滅親忘家喪子忠勤勇烈人所難能若不褒陞何勸來者海沂剖竹未足報功溱洧頒條可兼觀政敬承後命無替前勞可使持節鄭州諸軍事行鄭州刺史兼御史大夫散官勲如故

河北權鹽使檢校刑部郎中裴弘泰可權知貝

州刺史依前權鹽使制

勅某官裴弘泰以幹蠱之才領鹽鹵之務管權條制動皆得宜觀其所能若有餘地可假兼職俾之牧人而河北列城久乏良吏俗多思理政不難施亦猶凍餒之人易為衣食今予命爾煦而飫之襦袴之謹佇入吾耳可兼知貝州刺史

崔陵可河南尹制

勅河洛千里都畿在焉俾之又安屬在尹正鳳翔隴州節度觀察處置等使正議大夫檢校禮部尚書兼鳳翔尹御史大夫上柱國開國男食邑三百戶賜紫金魚袋

崔陵有精敏之用潔直之操施于有政由是知名始資

州縣之勞卒致公卿之位况刺部有理行主計無憊若

切違尹右輔而鎮西郊蓋獎能報勤之旨也昔吳公為

河南守謹身廉平人服教化袁安為河南尹政令清肅

號為嚴明誰其嗣之無易陵者往為表則勿替能名可

檢校禮部尚書兼河南尹散官勳封賜如故

侯丕可霍丘縣尉制

勅賜太常寺奉禮郎翰林待詔上護軍侯丕夫執藝以事上奉詔而處中其於出入謹身夙夜祗命比他局署實倍恭勤既寵之以職名又優之以祿俸蓋先勞後食

之義也汝其承之可守壽州霍丘縣尉依前翰林待詔
勲如故

崔楚臣可兼殿中侍御史制

勅成德軍節度押衙銀青光祿大夫檢校太子賓客兼
監察御史崔楚臣材膺爪士職在牙旗每祗命以奉辭
必竭誠而得禮既嘉詳敏亦念恭勤式示寵名宜遷憲
秩可殿中侍御史餘如故

王庭湊曾祖五哥之可贈越州都督祖未怛活
可贈左散騎常侍父昇朝可贈禮部尚書制

勅成德節度鎮興深趙等州觀察處置等使金紫光祿
大夫檢校工部尚書兼鎮州大督府長史大夫上柱國
太原縣開國男食邑三百戶王庭湊曾祖故忠武將守
左武衛大將軍負外置同正負兼試太常卿五哥之等
鬼神有知履孝敬者福祿至王侯無種仗忠信者富貴
來我有列臣本於良胤奮發而勵節許國感激而揚名
顯親夫教必有初德無不報安有收其材而遺其本愛
其後而忘其先乎是用褒崇以弘寵澤庶使聞者起孝
作忠可依前件

崔羣可祕書監分司東都制

勅前武寧軍節度徐泗濠等觀察處置等使正議大夫

白集 卷五十一
檢校兵部尚書使持節徐州諸軍事兼徐州刺史御史大夫上柱國賜紫金魚袋崔羣天受至寶爲國重器始自修已移於事君輔弼藩宣不失其道及離征鎮召赴闕庭方登道途遂遘疾恙正在頤養之際豈任朝謁之勞誠宜許以便安不可闕其祿食而移秩外史分曹東周加寵優賢無易於此且有後命俟其有瘳可祕書監分司東都散官勳賜如故

董昌齡可許州長史制

勅將仕郎權知泗州長史兼殿中侍御史賜緋魚袋董昌齡頃爲宰邑今贊郡符皆聞約已之名每展在公之

節稽其器局允謂廉能議以稍遷用彰勤効可許州長史兼侍御史散官勳如故

柳經李褒並泗州判官制

勅徵事郎前河南縣尉柳經儒林郎試太子通事舍人李褒等瀕淮列城泗州爲要控轉輸之路屯式遏之師故府有寮軍有倅選擇補署得聞於朝廷而經等皆有所長宜當是選守臣置奏因而可之仍加秩命用示優寵經可監察御史充泗州團練副使散官如故褒可試太常寺協律郎充武寧軍節度泗州兵馬留後判官仍改名銜散官勳如故

白集 卷五十二
張諷等四人可兼御史中丞侍御史監察御史
同制

勅義成軍節度馬步都知兵馬使光祿大夫檢校太子詹事兼侍御史上柱國張諷等御史府自中執憲暨察視之官皆顯秩也唯懷材而展効者可以授焉爾等昨領偏師出疆赴難指蹤而去摩壘而還忠勇勤勞宜有加獎故以憲職第而寵之可依前件

啖異可滁州長史許志雍可永州司戶崔行儉可隋州司戶並准赦量移制

勅守袁州司馬貞外置同正貞啖異等有司奉新制明舊章凡負疵瑕必霑慶澤况爾等各有才用多淹歲時譴累重輕遞從恩貸班資遠邇率以例遷如聞進修豈忘牽復可依前件

程執撫亡父懷信贈太保李佑亡父景略贈太子少傅柏耆亡父良器贈太子少保白餘盛亡父孝德贈太保同制

勅中散大夫檢校右散騎常侍兼右神武軍大將軍知軍事御史大夫上柱國河東縣開國男食邑三百戶賜紫金魚袋程執撫父贈太子太保懷信等咸有忠勳播爲先德悉承義訓垂在後昆故吾令臣皆乃愛子襲弓

白集 卷五十一
表而稟詩禮猶水木之有本源將使天下之爲人子者
感恩天下之爲人父者知勸宜加寵贈以表顯揚可依
前件

嚴謨可桂管觀察使制

勅漢置部刺史掌奉詔條糾吏理蓋今觀察使職耳桂
林秦郡也東控海嶺右扼蠻荒自隋迄今不改戎府地
遠則權重俗殊則理難馭而化之非才不可朝議大夫
前守秘書監驍騎尉賜紫金魚袋嚴謨嘗守商洛刺黔
巫州部縣道謚然安理是能用寬猛相濟之政撫夷夏
襟居之人故也跡其往効式是南邦况爾操行端和文
學精茂賓寺書府善於其官勉副前言俟申後命可使
持節都督桂林諸軍事守桂州刺史兼御史中丞桂州
本管都防禦觀察處置等使散官勲如故

杜式方可贈禮部尚書制

勅生有寵祿歿有褒崇此王者所以明終始之恩厚君
臣之道也故桂州本管都防禦觀察等使正議大夫使
持節都督桂州諸軍事守桂州刺史兼御史中丞上柱
國南陽縣開國男賜紫金魚袋杜式方慶襲台庭任當
垣翰服名教乃保家之子樹風聲爲守土之臣盡禮事
君勞心奉職奄忽淪逝念之惻然况近屬連姻遠藩捐

館聞訃之命實悼中心贈飾之恩宜加常等俾趨榮於
八座用賁寵於九原可贈禮部尚書仍賻符過切布帛二
百段米粟二百石委度支逐便支遣

武昭除石州刺史制

勅某官武昭王師伐蔡爾在行間致命奮身挑戰當寇
忠憤所感卒獲生全求之軍中不可多得司馬以爾信
直謹厚可領邊城爾宜酬乃已知副我朝獎撫獯戎雜
居之俗安離石重困之人勉而莅之其任不細可石州
刺史

梁希逸除蔚州刺史制

勅某官梁希逸頃為蔡將陷在賊庭知有君臣不顧妻
子率其所屬當戰陣前反旆倒戈翻然歸我忘家之士
希逸有之聞從司空再平淮右指蹤銜命皆稱所使可
以移用俾之守疆北邊列城蔚為衝要雄右軍號務兼
錢刀時流切勤選能俾乃兼領宜思來効以續前勞可
蔚州刺史兼橫野軍使并知本州鑄錢事

盧元勳除隰州刺史制

勅盧元勳乃者鎮帥身喪正承元納款之際柏耆將命
之初軍情洶然未知嚮化而元勳挺身奮臂出於眾中
指明安危分別逆順顏色不撓聲氣甚勵言行事立朕

甚多之雖有優升未酬義烈宜以一郡寵而旌之用勸
四方聞其風者可隰州刺史

陳顯示揚孝直除滑州長史制

勅揚孝直早以材力從戎異方專習武經通知吏事承
元移鎮孝直實來詢謀驅馳有所裨助軍郡之佐寵秩
非輕用答忠勞以明勸獎可滑州長史

張嘉泰可延州長史制

勅前丹州司馬張嘉泰一從戎旅多歷歲時奉職有勞
率身無過軍部長佐資秩不卑自丹轉延頗爲優穩題
輿便道往守乃官可延州長史

魏玄通除深王府司馬制

勅魏玄通有禦侮之才扞城之略服勤戎職善守邊州
訓旅牧人有可稱者夫文武迭用出入序遷所以關才
能而均勞逸也爾宜解綬郡邸曳裾王門飾躬慎儀以
奉朝謁可依前件

楊造等亡母追贈太君制

勅通事舍人楊造翰林待詔某亡母等生播徽華爰留
儀範訓保家之子爲有國之臣或相禮彤庭或待詔金
馬咸居禁近率有忠勤風樹之心必憂深而思遠蓼蕭
之澤宜自葉而流根並啓邑封各從子貴揚名之孝與

汝成之可依前件

張值李翱等二十人亡母追贈郡縣夫人制

勅壽州刺史張植亡母某氏等夫忠於上者教有所自仁於下者恩有所延孝理之風實繇此作當今良二千石皆與朕共理雖祿不逮養而名可顯親將慰匪我之心宜流自葉之澤俾從子貴咸贈邑封

陳中師除太常少卿制

勅尚書吏部郎中兼侍御史陳中師早以體物之文待問之學中鄉里選第甲乙科及筮仕立身皆有本末不背俗以矯逸不趨時以沽名從容中道自致聞望累踐

郎署再叅憲司官無卑崇事無簡劇如玉在佩動必有聲為時所稱何用不可朕以立國之本禮樂為先今之太常兼掌其事貳茲職者不亦重乎歷代迄今謂之清選往復是命佇觀有成予方急才爾寧久次可太常少卿

衢州刺史鄭群可庫部郎中齊州刺史張士階可祠部郎中同制

勅某官鄭群等今之正郎班望頗重中外要職多繇是選故其所選不得不慎必循名實而後命之群與士階久典名郡謹身化下有循吏之風會課陟明宜當是選

白集 卷五十一
國之大事在祀與戎一掌祠曹一司武庫各領其要爾
宜敬之群可庫部郎中士階可祠部郎中

元稹可太子左諭德依前入蕃使制

勅通事舍人元稹東宮之有諭德猶上臺之有騎省也
清班優秩所選非輕朕前遣使臣往修戎好以稹言信
行敬命爲介焉揚旌出疆反駕奔命有所啓奏多叶便
宜乃知得人可以卒事故加是命以寵勸之可太子左
諭德依前入蕃使

盧昂量移虢州司戶長孫鉉量移遂州司戶同
制

勅萬州司戶參軍盧昂等頃負疵瑕各從譴謫或遠竄
荒裔或未復班資旣逢蕩滌之恩俾及轉遷之命况聞
修省以克已固將校試而用能吾無棄人汝宜自勅可
依前件

李石楊穀張殷衡等並授官充涇原判官同制

勅李石等用武之地曰涇與原合爲一鎮控扼夷虜朕
授布鉞責其成功布乃祇惕受命思有以自輔者因上
言石穀殷衡等學業才畫堪置幄中分務列官咸可其
請而布憂邊甚切選士必精爾宜各竭所能爲知已用
可依前件

李演除左衛上將軍制

勅王者法勾陳設環列非勲勤之將信近之臣則何以久張爪牙轉置肘腋者也某官李演嘗從德宗皇帝南蒐于梁籍名功臣謂之定難洎出分戎律入拱宸居內外周旋不懈于位交戰之下周廬肅然今之轉遷示益親信移領左廣仍叅夏卿夫八屯之警巡七萃之勤惰爾為其正盡得察之宜惜前勞無墮乃力可依前件

康昇讓可試太子司議郎知欽州事兼充本州

鎮遏使陳倓

徒監切

可試太子舍人知巒州事

兼充本州鎮遏使李顥可試太子通事舍人

知賓州事兼賓澄巒橫貴等五州都遊弈使

馮緒可試太子通舍事人知田州事充左江

都知兵馬使滕殷晉可試右衛率府長史知

灋州事兼充左江都知兵馬使五人同制

勅容州本貫經略招討左押衙兼右廂兵馬使康昇讓等有奉職徇公之勤有理戎殄寇之効其帥公素上章以聞吾方念勞爾宜受賞况容之諸郡有大小郡之兼職有重輕量能第功分命而往噫方藩雖遠朝聽甚卑有善必聞無功不錄吾言及此欲爾知之可依前件

西川大將賀若峇等一十二人授御史中丞殿

中監察及諸州司馬同制

勅丞相鎮蜀志在憂邊俾靜蕃蠻實資將校故加寵任以責成功其官某等若干人類例勲勞進登班秩憲官名重郡佐祿優參以命之足為榮獎爾宜恭承主帥慎守封疆戮力一心無落戎事可依前件

前右羽林將軍李彥佐服闋重除本官兼御史

中丞知軍事制

勅軍有羽林用法星象統之爪士以拱宸居某官某前以忠勞選登戎衛而能訓勇力之士以備時使申誰何之令以奉徼巡夙夜祗嚴不懈于位既終喪紀宜復官

常假中執憲之名行上將軍之事勉修舊職用副新恩可依前件

奉天縣令崔鄩可倉部員外郎判度支案制

勅奉天縣令崔鄩大凡南宮郎無非慎選者也况官之屬有堆案盈几之文有月計歲會之課故員外郎不可逾時缺不待滿歲遷事劇才難斷可知矣而鄩自操白簡宰赤縣繩舉違謬惠養鰥惇皆有善聲著于官次豈能於彼而不能於此乎爾宜率廩人佐計務決繁析滯期有可觀可依前件

翰林待詔李景亮授左司禦率府長史依前待

勅某官李景亮夫執藝事上者必揆日時計勞績而後
進爵秩以旌服勤况待詔官闈飾躬晨夜比於他職宜
有加恩官坊衛官以示優獎可依前件

故鹽州防狄兵馬使康太宗贈鄧州刺史制

勅故某官康太宗嘗習韜鈴夙稱拳勇使之訓旅能叶
武經使之守疆能著戎績永言殂謝宜及褒榮俾追寵
於朱轡庶知恩於黃壤可贈鄧州刺史

劉總外祖故瀛州刺史盧龍軍兵馬使張懿贈

工部尚書制

勅故某官張懿德善者將啓後人忠孝者克揚前列有
美必復宜其然乎而懿仗忠履義體仁養勇學究韜略
藝窮騎射負幽燕之勁氣雖振其名有將相之長才不
得其位命屈當代慶流後昆有外孝孫爲吾賢帥以忠
許國以順克家揚名顯親自義率祖推恩外族歸美前
修俾追八座之榮以輟九原之嘆可依前件

劉總外祖母李氏贈趙國夫人制

勅李氏族茂本枝行光內則柔明繕性和淑保身輔佐
良人克諧家道訓成賢女作相令門善積於中福延於
後段公威德當流慶於外孫令伯孝心願推恩於祖母

白集 卷五十一
式遵贈典用贊德芬宜從大國之封追正小君之命可
贈趙國夫人

蕭俛一子迴授三從弟伸制

勅吏部尚書蕭俛頃在台庭時逢郊禮大行慶澤先及
輔臣當延賞於胤嗣願推恩於友愛厥有典例因而從
之咨爾弟伸可恭成命可河中府叅軍

賈隣

離吟切

八迴鵲副使授兼御史中丞賜紫金

魚袋制

勅少府少監賈隣行人之官官必有介所以敬王事而
重國命也以爾隣稟訓台鼎飾躬摺紳自登班行多歷
年祀恪勤官次保守今名斯可以卒貳使臣諭申朝旨
宜假憲秩仍加命服以示兼寵俾之出疆况繼好二邦
奉辭萬里副車之任選亦不輕茲吾使能期爾復命可
依前件

張岷授廬州刺史兼御史中丞制

勅廬龍軍節度判官檢校刑部郎中張岷司徒總言爾
從事於幽薊之間有年歲矣嘗委事任備觀器用務叢
而益辦職久而彌勤頗出輩流宜加獎擢况公侯之嗣
幕府之英餘慶所鍾有才如是今以名郡寵而任之旌
善勸能仍兼中憲可廬州刺史

韓公武授左驍衛上將軍制

勅朝散大夫檢校左散騎常侍兼右金吾衛將軍御史大夫上柱國賜紫金魚袋韓公武我元老之令子也孝於家忠於國故出則秉旄鉞入爲執金吾寵任益崇謙敬彌著而勤於夙夜疾癘所侵上陳表章乞就頤養夫環衛之列心膂之臣雖親信之寄則同而勞逸之間或異宜輟繁重俾從便安可檢校左散騎常侍兼左驍衛上將軍御史大夫散官勲如故

姚元康等授官充推官掌書記制

勅朝散郎行祕書省祕書郎姚元康儒林郎試太常寺協律郎鄭懿等益部浮陽皆大征鎮也文昌全略皆賢將相也而能以禮聘士以職任才多聞得人咸樂爲用况爾等等籌謀文藻各負所長苟能贊察兼掌奏記孜孜不怠翩翩有聲慰薦褒升其則不遠元康可試左武衛倉曹參軍充劔南西川觀察推官散官如故懿可試左金吾衛兵曹參軍充橫海軍節度掌書記散官如故

楊玄諒等三十人加官制

勅右神策軍忻州行營兵馬使試太常卿楊玄諒等夫才不錄則勸善之道廢勤不賞則念功之典缺而玄諒輩凡三十人咸列禁戎遠從征討臨難有身先之勇奔

命無道弊之勞宜以祿秩酬其忠効所謂材不失選賞不逾時亦欲使爲善者不疑有功者速勸也可依前件

李益王起杜元穎等賜爵制

勅李益等去年春朕以陵寢事大哀惶疚心而益等齋慄奔走各率其職俾予孝道刑于四海何嘗一日而忘之卽命有司舉常典凡爵之高下視執事之重輕有司亦能遵我成命第而次之進給益封無有不當由益而下爾宜欽承可依前件

王計除萊州刺史吳暉

于鬼切

除蓬州刺史制

勅王計等咸以材略載筆從軍藝學智謀霈然足用多

歷年祀備嘗艱危進退周旋不聞失道司徒弘正諱奏以聞因以竹符分命試吏而萊蓬二郡各介一方牧人者但不擾其心不奪其力則雖華夷南北土物不同皆可以自足自遂矣宜用此道往安養之可依前件

義武軍奏事官虞候衛紹則可檢校秘書監職

如故制

勅某官衛紹則服勤藩鎮敷奏闕庭奉主帥之表章達軍府之情狀嘉其忠効宜可褒升俾洽新恩用充舊職可依前件

深州奏事官衛推試原王友韓季重可兼監察

御史充職制

勅某官韓季重上將臨戎陪臣將命詳其奏報頗盡事
情特加寵章用獎勞効王官憲職以示兼榮可依前件

袁幹可封州刺史兼侍御史制

勅安南兵馬使封州刺史兼監察御史袁幹委質藩方
悉知戎旅嘗驅寇盜累著功勞故命遷領郡符超升憲
簡足以安荒俗耀遠人敬而承之無替前効可封州刺
史

華州及陝府將士吉少華二千三百三十五人

各賜勲五轉制

勅某官吉少華等距河重鎮分陝近藩俾遏寇虞實資
士旅勞旣同力賞宜徧行次第其名書于勲籍可各賜
勲五轉

祭迴鶻可汗文

維長慶元年歲次辛丑月日皇帝遣使朝議大夫檢校
右散騎常侍兼少府監御史大夫雲騎尉賜紫金魚袋
裴通致祭于故愛登羅汨沒密施毗伽保義可汗之靈
粵以英武之姿雄奇之策撫有九姓制臨一方氣吞諸
戎名播上國况能嚮風納款繼好息人代為親鄰歲入
職貢方賴威略共清寰瀛倚為長城永固中夏而天殲

白集 卷五十一
驕子國喪名王奪氣色於陰山實精光於昴宿凶訃云
至悲懷用深故遣使臣往將國命展弔奠之禮申哀榮
之恩猶有明靈當鑒誠意尚饗

白氏長慶集卷第五十一

白氏長慶集卷第五十二
唐太子少傅刑部尚書致仕贈尚書右僕射太原人
白居易樂天著

明後學松江馬元調巽甫校

中書制誥五 新體凡五十道

京兆尹盧士玫除檢校左散騎常侍兼中丞瀛

漢三州觀察等使制

勅夫疆理天下壤制四方乘時省置何常之有故方隅
未寧務先經略則專委方伯以摠統之及兵革甫定思
弘風化則並命連帥以分理之朕常以幽薊一方環封

千里延袤廣莫專制實難屬元戎改轅新帥進律因而
置制以叶便宜蓋王者施張變通之要也京兆尹盧士
攻爲人端和爲政寬簡自尹京輦人甚便安今司徒總
籍甚爾名叶從人望河閒列郡乞委士攻因而可之必
易爲理况新造之府經始之政勞俸安輯是爾所能俾
耳左貂兼執中憲寵任不細勉哉是行可依前件

武寧軍軍將郭暈等五十八人加大夫賓客詹

白集事太常卿殿中監制

勅某官某頃以齊寇發狂王師致討武寧裨將五十八
人雖有元戎指蹤制勝實由衆校同心許國合力成功

宜以憲秩儲寮寺卿府監舉申賞典用益勲庸可依前
件

贈僕射蘇兆男三人妻兄一人並被蔡州誅戮

各贈太子贊善大夫等制

勅故某官男等淮寇之起爾陷其中能守父訓不失臣
節竟遇蠶蠶並爲鯨鯢葵將死而心傾劔雖埋而氣在
毒延禦侮禍及維私將賁幽魂宜追寵命俾贈青宮之
秩用伸赤族之寃可依前件

王士則除右羽林大將軍制

勅羽林所設上法星文軍衛之中號爲雄重稱茲選任

不易其人左驍衛將軍王士則勲戚之家義方之子發
身學劍餘力知書早踐班榮累叅環列職近而身彌檢
慎任久而心益恭勤卑以自居勞而不伐况一備禁衛
四爲偏將滯於久次宜有超升俾領上軍仍遷右廣統
良家之騎士訓期門之材官寵任不輕無墮於事可右
羽林軍大將軍

前穀熟縣令李季立授奉天丞兼監察御史充

迴鶻使判官制

勅某官李季立蕃國通聘使臣告行上請屬寮同役王
命以爾常爲令長頗有幹能加之恪恭可備選擇假威

憲職兼命邑丞足示優榮勉勤任使可依前件

李懷金等各授官制

勅博野鎮都虞候殿中監李懷金等戮力戎行叶謀王
事旣展扞城之効彌章奉國之心不加寵榮何勸忠勇
敬授爵命勉思令圖可依前件

王日簡可朝散大夫德州刺史制

勅前代州刺史代北軍使王日簡吾聞任有才則事集
獎有勞則功勸以日簡嘗爲代守軍睦人安旌効所能
可居要地是用超登階級遷領郡符勵精壹意其聽吾
言夫主憂則臣勞時危則節見今寇戎暴起封域未寧

是忠臣奮奇謀烈士展殊効之日也朝立功而夕受賞
汝其念之哉可德州刺史

薛元賞可華原縣令制

勅前大理丞薛元賞旬服之制也樹以尹正承以令長
上下有統而理化行焉以元賞前爲廷尉丞察獄評刑
頗聞敬慎寺卿奏課邑宰缺貞故移欽恤之心使布惠
和之化上承爾長下字吾人無或越思而乖統理可華
原縣令

王承林可安州刺史制

勅安陸古鄖國也介荆漢之間承軍旅之後宜得謹良
長吏以養理之也前相州刺史王承林比刺安陽勤修
其職錄勞獎善故申命焉况爾生勲伐之家早階寵祿
宜自修立以光大其門爾當思勤儉以檢身務廉平以
臨下率吏用禮勸人歸農勿偵丑正切勿佻一遵吾之約
束可安州刺史

嚴綬可太子少傅制

勅東朝保傅歷代尊崇漢擇名儒任先疎廣晉求耆德
選在山濤實資六傅之賢用弘三善之道檢校司徒兼
太子少保嚴綬文雅成器恭謙致用出領重鎮以帥諸
侯入爲具寮以長卿士歷踐中外備嘗艱虞殆三十年

白集 卷五十一
勤亦至矣况理心以體道知命而安時是謂教誨之人
可領調護之任由保遷傳爾其敬之可太子少傅

源寂可安王府長史

勅義成軍節度判官檢校兵部員外源寂早膺慰薦累
展才能謀畫有終恭勤無怠守臣推善列狀升聞可使
東帶立朝廷曳裾遊藩邸俾從賓佐入補王官

鄭枋可河中府河西主簿制

勅鄭滑觀察推官試太子通事舍人鄭枋名列士林職
叅軍府修身無闕從事有勞旣展効於卽戎宜試能而
補吏俾之劔邑庶有可觀可依前件

喬弁可巴州刺史制

勅權知巴州刺史喬弁前假竹符俾臨巴郡一意爲理
三年有成州人借留廉使置奏旣因會課宜及陟明九
仞之功無虧一簣無忸真授而忘初心可巴州刺史

薛戎贈左散騎常侍制

勅夫有名於時有勞於國盡忠以事上遺愛而及下則
必生享寵祿歿加褒崇所以旌善人而勸來者故浙東
觀察使越州都督兼御史中丞薛戎挺英於冠族擢秀
於士林凡踐官榮皆著聲績及授符節委之察廉自江
而東政成人又老而將智病且知終方覲闕庭忽捐館

白集 卷五十三
舍是用廢朝軫念加賻申恩俾增九原之光追備八貂之列可依前件

辛弁文可淄州長山縣令制

勅趙州臨城縣令辛弁文既有英材又知臣節遁逃寇難奔走道途言念忠勞宜加恩獎俾換銅墨移宰長山可依前件

知汴州院官侍御史盧蒙可檢校倉部員外郎

陝府院官盧台可兼侍御史鄭滑院官李克恭可試大理評事獨孤操可衛佐並依前知院事同制

勅鹽鐵官漕運職小大遠邇羅布於四方自丞相播兼領以來而撮大綱覆羣吏職以能進秩由課遷法無僭差人有懲勸今台蒙克恭操等咸當自舉分命以官勉副已知無忝成命可依前件

王智興可檢校右散騎常侍兼御史大夫充武

寧軍節度副使領本道兵馬赴行營制

勅沂州刺史御史大夫王智興李愿李愬之鎮武寧也汝為裨將勵節忘身濟成大功汝實有力獎其誠勅擢授郡符海沂之間又著聲績宜加新命以寵舊勞仍提銳師往副戎律夫將之撫眾如子弟則眾之視將如父

兄苟推赤心而無疑必蹈白刃而不悔勉親士卒佇翦
寇戎可依前件

田羣可起復守左金吾衛將軍貞外置兼澶州
刺史制

勅前左武衛將軍田羣忠謹立身韜鈴嗣業自參戎衛
尤見恭勤而燕薊之間澶爲要郡公侯之後羣有令名
俾分符竹之榮佇濟弓裘之美宜奪情禮起而用之

楊於陵母亡祖母崔氏等贈郡夫人制

勅大孝存乎始終殊恩被於幽顯追榮之命安可廢耶
戶部尚書楊於陵亡祖母崔氏等風範有初光塵未昧

發揮婦道標表母儀施及孝孫陟于高位夫蘊德者垂
裕于後揚名者光昭其先俾彰積慶於中故許推恩而
上各從寵贈用顯貽謀可依前件

邵同貶連州司馬制

勅朝議大夫守衛州刺史兼御史中丞邵同寵在專城
職當守土不承制命擅赴闕庭違越詔條叛離官次將
懲慢易宜舉憲章可連州司馬仍馳驛發遣

鄭公達可陝州司馬制

勅朝議郎守原王府長史上柱國賜緋魚袋鄭公達衆
推士行時許吏才自列班榮尤彰恭恪夙夜匪懈春秋

已高宜罷曳裾之勤往贊坐棠之理是為優秩用答令
名可守陝州大都督府右司馬散官勲賜如故

劉奉倫可起復謁者監制

勅朝議郎前行內侍省內謁者監上柱國賜紫金魚袋
劉奉倫古者有中涓謁者皆侍奉親近之臣也今之寵
秩亦由舊焉况奉倫有行藝可以飾身才幹可以掌務
監臨內署朝請中闈謹密端和甚宜厥職久於其事無
之實難宜加進秩之恩仍舉奪情之典勉承獎任勿替
初終可起復朝議大夫行內侍省內謁者監

王師閔可檢校水部員外郎徐泗濠等州觀察

判官制

勅前徐泗濠等州觀察支候朝議郎殿中侍御史內供
奉上騎都尉賜緋魚袋王師閔朕以師律授智與智與
以軍書辟師閔才既為知己用官不俟滿歲遷所以使
能而責理也然則贊廉察安戎旅既命之後吾有望於
爾焉勉副所從佇展來効可檢校尚書水部員外郎兼
殿中侍御史充徐泗濠等州觀察判官勲賜如故

薛從可右清道率府倉曹制

勅三品子薛從可惟汝父平守吾藩鎮能以忠力殄寇安
人疇庸既以啓封延賞亦宜及嗣勉承義訓無忝寵章

白集 卷五十三
可朝散郎行右清道率府倉曹參軍

義武軍行營兵馬使高從政等五人河東節度
行營兵馬使傅義等二十四人並破賊可御

史大夫中丞侍御史制

勅古者賞不逾時所以勸勲庸也爵有加等所以激忠
勇也而其官高從政等以義武之師統晉陽之甲前路
白刃中推赤心大摧賊徒連告戎捷超榮速賞爾實當
之故視軍功迺遷憲秩破竹之勢其思有終可依前件

故奉天定難功臣試殿中監陳日榮等一十二
人可贈商鄧唐隋等州刺史制

勅春秋崇褒善之義國家厚追榮之寵其身歿而名不
殞時去而恩未及者大司馬得稽勲籍舉而行之故某
官某等凡十二人按狀徵書宜加寵命飾終之典其可
廢乎可依前件

段斌宗惟明等除檢校大理太僕卿制

勅義武軍節度都押衙兼侍御史段斌衙前虞候檢校
太子賓客宗惟明等寇虞未平將校方用宜以爵賞勸
其忠勞而斌奔命獻俘惟明奉章告捷各勤乃事咸造
于庭並加寵榮以示優獎斌可試太僕卿依前兼侍御
史惟明可檢校大理卿餘各如故

戶部尚書楊於陵祖故奉先縣主簿楊冠俗可
贈吏部郎中於陵奏請迴贈制

勅故某官揚冠俗貽厥孫謀垂裕後世揚其祖美不忘
先也以冠俗之棲遲下位道屈於時以於陵之光大其
門慶鍾于後生不逮事歿有追榮宜加義率之心用舉
飾終之典可贈吏部郎中

故光祿卿致仕李恕贈右散騎常侍制

勅故某官某國老之子藩臣之兄嘗列棘以承家竟懸
車而捐館生加爵寵歿及褒榮茲惟舊章用慰幽窆

劉悟妻馮氏可封長樂郡夫人制

勅古者有策名命婦賜號夫人益積善於閨門而受封
於國邑也澤潞節度使劉悟妻馮氏傳芳茂族作合良
臣成此忠貞之功因於輔佐之力禮從夫貴慶叶家肥
俾開大郡之封以正小君之命可封長樂郡夫人

夏州軍將二人授侍御史制

勅某官某等早稱武藝久隸軍麾稟命元戎服勤王事
或千里移鎮從為紀綱或十乘啓行倚為肘腋歷年
月積成勤勞不加寵榮何勸忠効並命憲職宜敬承之
並可兼侍御史餘如故

日試詩百首田夷吾曹璠等授魏州兗州縣尉

制

勅乃者魏交二帥以田夷吾曹璠善屬文貢置闕下有
 司奏報明試以詩五言百篇終日而畢藻思甚敏文理
 多通賢侯薦延宜有升獎因其所貢郡縣各命以官而
 倚馬爰來衣錦歸去以文得祿亦足為榮可依前件

衛佐崔蕃授樓煩監牧使判官校書郎李景讓
 授東畿防禦巡官制

勅某官崔蕃等咸因文行自致班序或佐衛蘭錡或典
 校蓬山各從所之將展其用夫司牧垆野備禦都畿所
 以班馬政而遏寇虞也茲皆重務爾勉贊之可依前件

李愬李原薛平王潛馬摠孔戢崔能李翱李文

悅咸賜爵一級并迴授男同制

勅封爵之設在乎賞勸有以褒德有以序勤聳善興功
 實由茲道而某官李愬等或望崇台鼎或委重旌旄爰
 及藩條共分憂寄有勞於事無怠于心宜疏爵以啓封
 許推恩而及嗣祇受厥命永孚于休可依前件

故工部尚書致仕杜羔贈右僕射制

勅故某官杜羔生於仁族發為公器敦厚孝友本乎天
 性文學政事出於餘力自立朝右藹然素風司諫平刑
 駁議廉問凡所踐歷不懈于位以年致政以疾就第出

處進退皆叶時中遽此淪謝惻惻與念夫生有榮祿歿有寵贈所以極君道厚時風亦聖人有始卒之義也宜追端揆以申褒飾猶有精爽知吾不忘可贈尚書右僕射

姑工宿同書定其林無韻本對極
 幽州兵馬使劉悚除左驍衛將軍制以兄劉

勅某官劉悚夙負氣槩早習騎射才推燕趙之士學究孫吳之書加以忠厚可當任用况有令弟為吾信臣節著艱貞情鍾友愛夫寵寄於外莫重於藩垣委任於中莫親於禁衛加此一職寵示二人豈不為榮季出叔處可左驍衛將軍景範平王

前幽州押衙瀛州刺史劉令璆除工部尚書致

仕制

勅某官劉令璆渠尤切勲伐之家弓裘之嗣嘗修戎職亦領郡符迨此遲暮知有止足夫壯而奮發以忠事國老而知退以道安身人所難能理宜嘉尚俾超崇秩以寵高年可工部尚書致仕

盧衆等除御史評事制

勅幽州節度判官盧衆等幽薊重鎮盧龍舊軍是吾北門委在上將實資寮佐以濟謀猷爾等或叅務戎旃或專司奏記俱因事任各展才能而御史府官廷尉寺吏

用申褒獎以勸忠勤勉奉无戎作成嘉績

張偉等一百九十人除常侍中丞賓客詹事等

制

勅盧龍軍押衙兵馬使什將隨軍某等夫爵賞行於上

則忠勞勸於下有國之典其可廢乎吾思蒞師自將及

吏合聚衆力鎮寧一方縣以歲年積成勤效今以朝右

貴秩官坊清班舉爲寵章用申酬獎

梁遜

徐醉切

等六人除范陽管内州判司縣尉制

勅盧龍軍節度要籍梁遜等咸以幹能早膺任使各參

軍要同濟戎功言念恭勤宜加優獎郡掾邑佐分而命

之仍兼舊職勉申來効可依前件

渤海王子加官制

勅渤海王子舉國內屬遣子來朝祇命奉章禮無違者

夫入修職貢出錫爵秩茲惟舊典舉而行之

石士儉授龍州刺史制

勅石士儉東川帥涯上言士儉久習武藝兼通吏事可

使爲郡責成其功吾聞江油巴夷雜處勿以遐陋而忘

緝綏奉法愛人無負知巴可龍州刺史

韓萇授尚輦奉御制

勅韓萇局分六尚職奉七輦茲惟優秩列在通班以爾

白集 卷五十三
立身頗恭守事甚謹宜有所獎可升於朝可尚輦奉御
孟存授成都府少尹制

勅孟存嘗參劇務亦牧疲人咸有能名得於主帥三蜀
征鎮屯于成都雖有忠賢委爲尹正至於贊修庶務通
統諸曹承而貳之實資亞理勉勤厥職無累所知可成
都府少尹

杜元穎等賜勳制

勅中書舍人杜元穎等有位於朝有勞於事不加慶賜
何勸恪勤宜各策名列于勳籍可依前件

商州壽州將士等賜勳制

勅某官某等夫勳者所以馭貴叙勞亢身庇族非因大
慶不降殊恩爾皆委質從軍服勤事國宜按勳籍分而
賜之可依前件

內侍楊志和等授朝散大夫制

勅楊志和等咸分要職列在內司愼靜檢身恭勤守事
宜以章綬命爲大夫佩服寵光爾無失墜可依前件

內常侍趙弘亮加勳制

勅內常侍趙弘亮等列名禁籍祇命宮闈多歷歲時積
成勞効宜加勳賞以洽恩榮可依前件

烏行初授衛佐制

勅烏行初重胤之子早稟義方詩禮弓裘式聞不墜賞
延之典本勸忠勲環衛之官兼資慎擇非唯父任亦以
才升可佐衛曹參軍

烏重胤妻張氏封國夫人制

勅古者夫為大夫則妻為命婦况在小君之位未加大
國之封豈唯有廢徽章抑亦無勸忠力也某官某妻某
氏以鳴鳩之德作合邦君輔成勲猷馴致爵位雖從夫
貴未授國封今以南陽本邦善地錫為湯沐加號夫人
茲乃殊榮足光閨闈可封鄧國夫人

白氏長慶集卷第五十二

白氏長慶集卷第五十三

唐太子少傅刑部尚書致仕贈尚書右僕射太原

白居易樂天著

明後學松江馬元調吳甫校

中書制誥六

新體凡四十八道

鎮州軍將王怡判官李序先被賊中誅囚並死

各贈官及優卹子孫制

敕朕常思鎮異之間弔伐之際有仗順死義不吾聞者
因命弘正列狀以聞而某官王怡等頃陷艱虞思伸忠
効或名節將立併命於幽憂或義烈臨奮失身於戮辱

履危如虎尾視死如鴻毛若無褒揚何勸天下既降飾
終之命仍加身後之禮追崇延寵有越常倫冀使死節
之魂忠憤之骨知我憐憫歿無恨焉怡可贈左僕射序
可贈給事中

武寧軍陣亡大將軍李自明贈濠州刺史制

敕王師之討蔡平鄆也自明爲武寧裨將隸於元戎凡
所指蹤必先致命三軍之士于今稱之有勞未圖無祿
早代生不及賞歿而加恩庶使猛將義夫聞而相勸曰
死而不忘况生者乎可贈濠州刺史

裴弘泰可太府少卿知左藏庫出納制

敕前度支河北權鹽使朝議郎檢校尚書刑部郎中使
持節貝州諸軍事兼權知貝州刺史侍御史充本州防
禦使上柱國賜紫金魚袋裴弘泰九土之貢百品之貨
辨其名物謹其出納常在外府統以上卿宜求幹敏之
才以爲之貳而弘泰頃分權務兼撫郡民當軍興之時
法行政立則受藏之府事繁物殷量其器能可以專委
勉膺是任無替前勞可守太府少卿知左藏庫出納散
官勲賜如故

李昌元可兼御史大夫制

敕通議大夫使持節儀州諸軍事儀州刺史兼御史中

白集 卷五十三
承上柱國李昌元弓裘令子疆場勞臣能讀父書甚識
戎事每在戰陣未嘗無功及委藩條亦聞有政而知臣
者君也賞勞者爵也亞相之秩威重寵崇加乎爾身以
勸能者可兼御史大夫

田穎可亳州刺史制

敕正議大夫前檢校右散騎常侍使持節洛州諸軍事
兼洛州刺史御史大夫充本州團練使上柱國賜紫金
魚袋田穎自別屯將壘專領郡城而能勤恤師人與之
勞逸故臨戎則士樂爲用撫下而衆知嚮方忠勲旣彰
能政亦著牧守之選吾所重之譙鄴之間人亦勞止授

爾印綬往勞來之宜推前心佇立後効可檢校右散騎
常侍使持節亳州諸軍事兼亳州刺史御史大夫本州
團練使鎮邊使散官勲賜如故

薛伯高等亡母追贈郡夫人制

敕某夫人某氏等始播婦儀終垂母道教其令子爲我
良臣而皆茂著才名榮居爵位永言聖善宜及顯揚俾
追啓邑之封式表統家之訓可依前件

李佑授晉州刺史制

敕郡守之官與吾共理下之安否繫乎其人必稽前功
方降是命某官李佑夙負材器累經任用常領軍郡頗

著政聲而平陽舊都近罷征鎮上疆事物既廣且殷藉爾良能爲予撫字夫均其征役簡其科禁謹身省事以臨其人而人不安未之有也往弘是道以康晉人可依前件

武寧軍將王昌涉等授官制

敕王昌涉等早以材力召募從軍元和以來南征北伐咸有勞績著于一時主帥上聞乞加褒賞故以寺卿憲職序而寵之無棄前功在申後効可依前件

馬摠亡祖母韋氏贈夫人制

敕某官馬摠亡祖母韋氏播茲懿範貽厥嘉謀施及孝

孫實居貴仕將明餘慶其在追榮不唯垂裕後昆抑亦光昭幽壤宜降封丘之命以慰令伯之心可贈某夫人

路貫等授桂州判官制

敕藩隅之重委以侯伯軍府之要掌在賓寮貫等以文行修身以智謀從事佐廉問澄清之務撫華夷錯雜之人俾其乂安實在叅贊宜及寵命以光所從可依前件

駙馬都尉鄭何除右衛將軍制

敕周設七萃漢列八屯皆以拱衛王宮肅嚴微道統茲騎吏其屬親賢某官鄭何擢秀士林挺質公器以貞和陶其性以禮樂文其身善積德門慶連戚里况久踐名

職累著聲猷念舊獎能宜加榮寵環列之尹不易其人
俾宣力於爪牙不失親於肺腑可右衛將軍餘如故

封太和長公主制

敕公主之封號也或以善地或以嘉名立愛展親茲惟
舊典第四女端明成性和順稟教靜無違禮故組紉詳
切有常訓動必中節故環珮有常聲歲茂穠華日新淑
問乃眷肅雍之德俾開湯沐之封可封某公主

宋朝榮加常侍制

敕河東節度都押衙試太子賓客兼御史中丞宋朝榮
嘗因戰功擢領邊郡揆能適用故有轉遷龍樓上寮衙
門右職雖有兼命未表殊恩宜加騎省之榮不改憲臺
之重以茲寵任足報忠勲爾其敬承無隳乃力可檢校
左散騎常侍餘如故

贈陣亡軍將等刺史制

敕故某官某等王師問罪至于淄青爾等同執干戈親
當矢石忠而盡瘁勇而亡身或退卒于師或進歿于戰
俱死王事深惻朕心念捐軀於軍前宜追命于泉下郡
守之貴以示褒榮可依前件

諸道軍將等授官制

敕平齊之役也諸軍指期衆校合戰某官等各輸戮勇

白集 卷五十三 五
同樹勲勤永思積日之勞頗愧踰時之賞故於獎授有所超遷朝右貴班官坊清秩或叅憲職分以命之庶知我心不忘忠力可依前件

裴度韓弘等各賜一子官并授姪女壻等制

敕某官某等謁廟郊天改元肆眚是爲大慶與衆共之矧股肱心膂之臣與吾同體延賞任子其可廢乎爾等或以文華或以吏職有所修立稟於義方自當褒升况霑慶澤俾舉展親之典用叶推恩之道猶子愛壻各命以官爾其敬承無忝朝獎可依前件

入迴紇使下軍將官吏夏侯仕戡等四十人授

卿監賓客諮議衛佐同制

敕某官夏侯仕戡等前命鄭權之入迴紇也爾等叅護使車用祇王命悉心盡力有恪恭跋滯之勤焉宜以省寺軍衛之班官坊府邸之列舉爲賓典分以寵之辨等旌勞於是乎在可依前件

盧昂可監察御史裏行知轉運永豐院制

請

時王播奏

敕虢州司戶叅軍盧昂前負瑕疵事多曖昧今聞修省善亦昭彰况有大僚同知情狀且明非罪仍舉有才吾信人言遂可其奏爾思自効無辱所知可依前件

張惟素亡祖紘贈戶部郎中制

敕右散騎常侍張惟素亡祖某縣令某德合上玄才終下位命屈於當代慶流於後昆故其孝孫實登貴仕經曰無念爾祖詩曰貽厥孫謀此言孫之謀能顯揚其先祖之德能垂裕于後也不追榮於列宿曷旌德於太丘可贈戶部郎中

興州刺史鄭公達授王府長史李循授興州刺史同制

敕鄭公達等或以行稱或以才舉進修所致班秩不卑改命序遷各適其用且乘朱輪於郡邸曳長裾於王門士子名宦至斯亦不爲不遇也立朝案部各敬爾官可依前件

權知陵州刺史李正卿正除刺史制

敕審材之要考察爲先吾之於人試可乃用李正卿頗闕吏道因假郡符畏法愛人善於其職夫速旌其能則吏勸久於其政則化成未可轉遷就加真秩副吾知獎無怠始終可陵州刺史

知渭橋院官蘇洵授員外郎依前職前進士王

績授校書郎江西巡官制

敕某官蘇洵良以嘗以幹良分領劇務受任稱職主者

上聞績既有成賞安可闕前進士王績亦以藝學籍名太常著其令聞及此慰薦一以課進一以才升咸加班榮同以褒獎臺官校職爾各欽承可依前件

湖南都押衙監察御史王瓘可柳州司馬依舊

職制

敕某官王瓘取猥切郡司馬之官秩祿頗厚凡在戎行有

軍課者多兼命以優寵焉而瓘以鞭弭橐姑勞切鞬經天切

從事征鎮前後主帥咸稱有功宜加新命仍率舊職蓋欲旌往勞而責來効也爾其勉之可兼柳州司馬

安南告捷軍將黃士傑授銀青光祿大夫試殿

中監制

敕某官黃士傑倉台切戎首來降陪臣告捷服勤靡盬將

命無違宜以恩榮獎其勞効貴階崇秩兼而寵之可依前件

王鎰可刑部員外郎制

敕刑曹郎闕朕詔執事擇可以善於其職者而殿中侍御史王鎰自居殿中能察非法連鞠庶獄多協平允加以溫敏靜專可當是選一歲之獄決在秋冬今方其時宜敬乃職

京兆府司錄參軍孫簡可檢校禮部員外郎荆

南節度判官浙東判官試大理評事韓欣四七
可殿中侍御史巡官試正字晁朴可試協
律郎充推官同制

敕某官孫簡等凡使府之制量職之輕重以命官揆時
之遠近以進秩俾等衰有常序遷次有常程勞均而名
分定矣簡自登憲司佐相幕府暨糾天府皆有可稱而
欣等亦以文學發身謀畫効用荆揚浙右實籍賓寮况
今之公卿大夫皆由此塗出慎爾職事爾無自輕可依
前件

冀州奏事官田練可冀州司馬兼殿中侍御史

制

敕某官田練幹敏立身公勤濟事奉州將之手疏達軍
人之血誠念其忠勞宜有寵擢假憲名於殿內遷郡秩
於治中茲謂兼榮爾其敬受可依前件

薛常翹可邢州刺史本州團練使制

敕新授深州刺史薛常翹呼對切平蔡之役常領偏師實
立勲勞遂膺寵任今屬方隅多故將守用能且以翹之
長材居邢之要地故命魚符換郡能軾移轅夫事至而
功成時來而節見此忠良之事業也爾其念之哉可依
前件

牛元翼可檢校左散騎常侍深州刺史御史大夫制

敕某官兼御史中丞權知深州事牛元翼命官之要凡試吏者必俟成效然後卽真而元翼有理戎之才扞城之畧權領軍郡能修武經士樂人安厥有成績是用假威臺憲真拜郡符仍以金貂示其兼寵吾聞忠臣立節烈士垂名其要無他得時而已勉竭才力副予斯言可依前件

王衆仲可衡州刺史制

敕前虔州刺史王衆仲聚學修身由文飾吏累經任使頗著良能前牧南康亦聞有政宜新印綬載領藩條而衡湘之間蠻越雜處無以俗陋不慎乃事無以地遠而怠厥心副吾陟明俟汝奏課可依前件

田盛可金吾將軍勾當左衛事制

敕右金吾衛將軍田盛夫仕官至執金吾古今所榮重也而盛生勲德門有文武略居貴介而無佚領誰何而有勞言念徼巡之功宜及轉遷之命處左攝事以表使能可依前件

陳楚男王府諮議參軍君賞可定州長史兼御史軍中驅使制

白集 卷五十三
敕某官陳君賞夙承義訓幼有令聞專繼弓裘之名通
知軍旅之事因仍憲職兼佐郡符敬服寵章勉從任使

崔承寵可集州刺史制

敕太子左諭德崔承寵早登班級亟換星霜自陳力於
貴朝屢奉辭於外國職因事博績以勞成就列官坊既
申贊諭之美分符郡底佇聞刺舉之能宜勵公心祇承
寵命

前貝州刺史崔鴻可重授貝州刺史制

敕前貝州刺史崔鴻嘗牧貝丘能修其職及辭印綬頗
有去思相時之宜從人之望俾換新命再臨舊邦况聞

貯蓄時材諳詳物務而方州思理侯伯薦能勉勤爲政
之心勿忝知人之舉

前吉州刺史李繁可依前吉州刺史制

敕前吉州刺史李繁累奉藩條皆奏課第故移縉雲之
政俾牧廬陵之人雖降璽書未臨郡邸屬魚章改造熊
軾追還事既謀新職宜仍舊勉率分憂之任庶成來暮
之謠

瀛漢州都虞候萬重皓可坊州司馬制

敕某官萬重皓嘗資武力早備戎行頗歷艱虞亦聞勤
効而洛隅未靖遷轉從宜言念前勞宜加優秩可坊州

司馬

崔墉可河南府法曹參軍制

敕鄆曹觀察判官監察御史裏行崔墉文行飾躬公清奉職士林推美藩府薦能軍旅之間久資其用忠勤之後不殞其名宜拔才於功臣俾試吏於府掾可依前件

前河陽節度使魏義通授右龍武軍統軍前泗

州刺史李進賢授右驍衛將軍並檢校常侍

兼御史大夫制

敕文武之才內外迭用軍國之任出入遞遷斯所以優勲賢而均勞逸也某官魏義通以戎功積久榮委旌旄

某官李進賢以軍課居多寵分符竹各勤其職咸用所長是以河陽三城鎮靜而不擾泗濱一郡緝理而有勞我有禁軍爾宜分領親信則倚爲心膂動用則張爲爪牙苟非其人不付此任咸假貂蟬之貴仍兼憲職之榮勉哉二臣無替一志可依前件

李玄成等授官制

敕黔州觀察使兼度支使李玄成等或蘊蓄能才咨謀是藉或分領劇務課績有成並可奏書各遷憲職勉勤乃事無忝所知可依前件

馬摠準制追贈亡父請迴贈亡祖制

白集 卷五十三
敕夫積善者慶鍾于後顯揚者光昭于先而摠貴爲邦君賢爲國士荷貽謀之訓用率義之文上獻表章有所陳乞朕念其祖德褒以臺郎所以復陳寔必興之言慰范喬泣涕之思庶使幽顯兩無恨焉可贈某官

權知朔州刺史樂璘正授兼御史中丞制

東 樂璘專習武經旁通吏道試補郡守以觀其能連帥上聞果副所舉夫審官之要在因其所長而任之則政速成而化易就也才旣試可官宜卽真何以寵之就加憲職可朔州刺史兼御史中丞

神策軍推官田疇加官制

敕田疇官列環衛職參禁軍慎檢有聞恭勤無怠顧是勞効例當轉遷郡佐官寮以示兼寵

裴敞授昭義軍判官裴佺授義成軍判官各轉

官制

敕裴敞等昭義義成今之重鎮實藉賓介以參謀猷而二帥皆勤於奉公精於辟士度才而授職循序而請官頗合所宜咸可其奏可依前件

雲州刺史高榮朝除太子賓客河東都押衙制

敕高榮朝常領銳師入攻堅寇因累獎賞位至專城才有所長宜遷戎職功不可忘兼進榮班勉事元戎無替

勞効

韋綬等賜爵制

敕韋綬等去年春夏同奉寢園事集禮成副吾哀敬宜加封爵以報恪勤可依前件

烏重明等贈官制

敕故某官烏重明等夫生樹功勤歿加褒飾有國之常典也重明等在興元初常執勤于奉天策勳爲定難無祿卽代有勞未圖星歲屢遷光塵不昧聞鞞蒲糜切之念予心曷忘俾慰幽泉各追顯秩可依前件

羽林龍武等軍將士各加改轉制

敕夫軍衛警則內外嚴爵賞明則忠勤勸爾等咸以材力列于禁營屬去年以來屢陳儀仗雖加賜與未答勤勞因詔有司舉行賞典吾匪虛授爾宜敬承文武班資各從序進可依前件

新羅賀正使金良忠授官歸國制

敕新羅使倉部郎中金良忠等朕以文明御時以仁信柔遠聲教所及駿奔而來况溟漲一隅舟航萬里爾慕我化我圖爾勞隨其等倫命以寵秩無替前効永爲外臣可依前件

誠感通上帝眷祐果賴良弼輔予一人正議大夫行尚書戶部侍郎上柱國賜紫金魚袋裴垍器得天爵文爲國華行有坦源詞無枝葉忠敬恭順貫之以誠心方潔貞廉輔之以通識玉立不倚金扣有聲洎內掌綸言密叅樞務嚴重有大臣之體溫雅秉君子之文每獻納之時動有直氣當顧問之際言無隱情遠圖是經大事能斷匡予不逮時乃之功及領地官且司邦賦會計務劇出納事殷投利刃而皆虛委焚絲而必理歷試已久全才益彰宜登中樞以副僉望夫宰輔者下執邦柄上代大工爲國著龜注人耳目爾尚降乃德以親百姓廣乃志以序九流匡朕心以清化源從人欲以致和氣予欲宣力汝爲股肱予欲詢謀汝爲心膂予違望于汝弼勿謂不從汝言逆干朕心必求諸道獨立勿懼直躬而行明聽斯言敬踐乃位嗚呼罔俾房宋專美于前可中書侍郎同中書門下平章事散官勳賜如故主者施行

除段祐檢校兵部尚書右神策軍大將軍制

門下爲君之心惟功勞是念有國之典以賞勸爲先其有輯睦師徒保綏黎庶盡勤王之節建議護塞之勳則宜進以官常委之軍要兼文武之秩叅內外之榮斯所以彰念功而明懋賞也四鎮北庭行軍兼涇原等州節度

支度營田觀察處置等使光祿大夫檢校工部尚書使持節涇州諸軍事涇州刺史兼御史大夫上柱國鴈門郡開國公段祐早膺事任累著公忠名因義聞位以勤致自分戎閫實控塞門明舉武經大修邊務士卒有勇保障無虞虜不近邊農皆狎野展執珪之勤禮歷戀闕之深誠方圖爾勞且遂其志夫六官普切職大司馬列于前二翼分師上將軍處其右長夏官以率屬領環衛而拱宸苟非信臣安可兼委嘉乃實効副予虛求將慎重其腹心宜進登於喉舌敬服休命勉揚令圖可檢校兵部尚書右神策軍大將軍知軍事散官勳封如故

主者施行

除趙昌檢校吏部尚書兼太子賓客制

門下王者以尚齒尊賢為禮以念功任舊為心况文武之才有以兼備則中外之職所宜迭居所以寵舊勳而優耆德者也前荆南節度管內支度營田觀察處置等使金紫光祿大夫檢校兵部尚書兼江陵尹上柱國天水郡開國公趙昌聚學飾身修誠致用久膺事任累著勳猷統護交州威惠之聲克振鎮臨南海撫循之政有經自移部荆門馳心魏闕增修職貢益勵忠勤爰舉寵章用旌茂績夫望優四皓然後能調護春闈才冠六卿

然後能紀綱會府惟爾年德足尚可以周旋其間宜增
喉舌之榮以崇羽翼之任服我休命其惟懋哉可檢校
吏部尚書兼太子賓客散官勳封如故主者施行

除鄭綱太子賓客制

門下王者重輔弼之任明進退之宜見可卽升知否則
捨茲朕所以推誠不惑與物無私者也銀青光祿大夫
守門下侍郎同中書門下平章事兼弘文館大學士上
柱國陽武縣開國侯鄭綱早以令聞入叅禁署永惟勤
績出授台司期爾有終匡予不逮歲月滋久謀猷浸微
自清淨以慎身每因循而保位既乖素履且鬱皇猷宜
副羣情罷茲樞務朕以其久居內職累事先朝思厚大
臣貴全終始俾就優閒之秩用申寬大之恩可太子賓
客散官勳封如故主者施行

加程執恭檢校尚書右僕射制

門下職叅揆務權摠戎麾必惟其人乃授斯柄自非望
崇垣翰功著旂常則何以副儀形之求稱節制之任我
有休命爾其敬承銀青光祿大夫檢校兵部尚書使持
節滄州諸軍事兼滄州刺史御史大夫橫海軍節度支
度營田滄景等州管內觀察處置等使上柱國邢國公
食邑三千戶程執恭義勇立身忠愨成性聚爲事業發

爲勲猷歷事先朝久專外闡殿邦而山岳比鎮奉國而
金石爲心動修武經居有循化洎執珪入覲班瑞言旋
忠懇內激於心誠恭順外形於詞氣爰舉疇庸之典稍
增命秩之榮方圖前勞且有後命朕思安封域望在勲
賢任旣切於腹心位猶輕於喉舌以守土勤王之効雖
進官封念來朝述職之忠未加寵數特升右揆俾在中
樞勉終永圖無替成績可檢校右僕射餘並如故

除王似

薄密切

檢校戶部尚書充靈鹽節度使制

四年六月十三日進

門下靜邊之要選將爲先夫有統馭之才然後授以節

制之任有撫備之畧然後鎮以夷夏之衝期乎攘遏寇
虞慎固封域今予命爾時謂得人開府儀同三司檢校
刑部尚書兼右衛上將軍寧塞郡王食實封二百五十
戶王似忠厚立誠果斷効用慎始終而行有枝葉踐夷
險而道無磷緇早練武經果從軍職頃逢多壘實佐元
戎節著臨危功參定難位由勞致名以忠聞自列六卿
且司七萃星霜屢變金石彌堅宜申命於北轅俾遏戎
於南牧進地官以崇新命極勲秩以褒舊功中簡朕心
外諧僉議况五原重鎮諸夏長城修戎政莫先於威聲
牧邊民莫尚於惠實師雜昆夷之悍訓必在和地爲獯

虜之隣撫宜以信勉率是道往分朕憂歲時之閒期於
報政委望斯在爾其聽之可檢校戶部尚書兼靈州大
都督府長史御史大夫充朔方靈鹽定遠城節度使知
節度事管內支度營田觀察處置押蕃落等使仍賜上
柱國散官實封並如故主者施行

除閻巨源充邠寧節度使制

四年十月十一日進

門下華夷要地實爲蕃漢鈇鉞重柄必授忠賢况乎倚
角諸軍金湯中夏有坐甲護邊之旅任切於拊循有引
弓犯塞之虞寄深於備禦內作心腹外張爪牙苟非信
臣不在茲選奉天定難功臣開府儀同三司檢校尚書

右僕射兼羽林軍統軍御史大夫上柱國定襄郡王食
邑一千三百戶閻巨源備知虜態明練兵符永惟頗牧
之能宜授須倫切邠之寄長南宮而遷左揆壯西郊而
委中權旣圖前勞且佇來効於戲千聯之帥可以觀政
萬夫之長可以樹勳勉弘令猷副我休命可檢校尚書
左僕射使持節邠州諸軍事兼邠州刺史御史大夫充
邠寧慶等州節度管內支度營田觀察處置等使功臣
散官勳封並如故主者施行

授吳少陽淮西節度留後制

三月十九日

門下議事以制擇善而行是適變通庶臻康濟此王者

所以弘德而息人也况闡外重寄淮右成師建有德以
統藩方擢有才以領留府仰惟令典今舉行之彰義軍
馬軍先鋒兵馬使正議大夫檢校右散騎常侍使持節
申州諸軍事申州刺史兼御史大夫會稽郡王吳少陽
忠勞許國貴介成家蓄武畧於韜鈴宣吏能於符竹屬
元戎旣歿謀帥其難朕將選衆以升試可而用推掌戎
務已逾歲時而能和輯師人勤修土貢布寬簡有恒之
政動悅人情守恭順不踰之心靜俟君命有嘉大節可
假中權宜進列於貂蟬俾增威於貔武仍加勳秩式茂
寵章嗚呼重觀其能我故委之留事載佇其効爾宜勉

於後圖敬思是言往率乃職可銀青光祿大夫檢校左
散騎常侍依前兼御史大夫使持節蔡州諸軍事權知
蔡州刺史充彰義軍節度管內支度營田申光蔡等州
觀察處置等使留後仍賜上柱國封如故主者施行

除程執恭檢校右僕射制

七月十二
日夜進

門下臣之節極乎忠功君之柄先乎爵賞欲忠者之克
懋也故爵有加等欲功者之速勸也故賞不逾時古先
哲王實用茲道今我命爾因其舊章橫海軍節度支度
營田滄景等州觀察處置等使起復冠軍大將軍左金
吾衛大將軍員外置同正員檢校兵部尚書使持節滄

州諸軍事兼滄州刺史御史大夫上柱國邢國公程執
恭業傳將畧名在勲籍蘊天爵以修已忠孝兩全竭臣
節而事君夷險一致紀綱我列郡節制我成師動揚休
聲靜著茂實自合符徵旅奔命出疆暴露歷於三時供
億出於二郡整衆而身作師律伐謀而心爲戰鋒服金
革而無辭當矢石而有勇雨晦識雞鳴之信風高見隼
擊之威遠略旣申茂勲方集朕以恒陽之衆蠢爾無知
毆彼生人致之死地每一念至惻然久之與其傷和而
濟功曷若含垢而修德旣罷師旅爰圖勤勞効且居多
賞宜從重俾自夏官之長特升右揆之崇獎忠勸功於
如故主者施行

除郎官分牧諸州制

是乎在承我休命爾其欽哉可檢校尚書右僕射餘並

漢宣帝云與我共理者其惟良二千石乎誠哉是言朕
每三復安得循吏副吾此心今之臺郎一時妙選嘗經
任歷率有才用雖典曹庀音弭切事其務非輕而卹隱分

憂所寄尤重是用並命分牧吾人歲時之閒期於報政

戶部郎中某可某州刺史兵部員外郎某可某州刺史

云云朕高懸爵賞佇期酬効咨爾夙夜其念之哉無俾

龔黃專美前代

除張弘靖門下侍郎平章事制

夫佐佑天子變理陰陽平章法度登進賢哲外撫夷狄
內安元元使百官修其職一物不失其所此宰相之任
也朕思得良弼馴致此道咨予命汝其殆庶乎某官張
弘靖惟乃祖乃父代居相位咸有成績書于旂常爾有
忠正恭肅文以禮樂日濟其美振揚家聲一時之人謂
之才子亟登清貫益著令聞洎出刺陝部移鎮蒲坂政
不苛細甚得人心寮吏將卒皆樂為用清簡之化聞于
京師由是鄭風緇衣之好漢庭玄成之美朝望時議翕
然與之人謀既同朕志亦定乃用登爾于佐輔授爾以

大政尚克欽乃嘉命業乃代官竭其股肱服我前訓嗚
呼三代為相邦家之光爾其念哉無替乃前人之徽烈

授范希朝京西都統制

閶闔風至太白星高謀帥護邊國之大計某官范希朝
忠貞勤儉以為質惠和智勇以為用一代名將三朝信
臣朕以西邊列鎮三四若有摠統則易成功思得良帥
有威名者并護諸將歲一巡邊乘秋順令揚其威武則
南牧之馬引弓之人知我有備不戰而去誰可任者無
如希朝以爾有朔方之勞有振武之効功在疆場刑狄切
名聞兗戎惟實與聲皆副是選今拜爾為大將尊爾為

白集 卷五十四 九
司徒節制進退一令諮稟倚望如右可不慎與可充京
西都統

贈吉甫先父官并與一子官制

敕某官李吉甫出入將相迨今七載而能修庶職敘彞
倫毗予一人以底于道夙夜不怠厥功茂焉夫忠於君
者教本於親寵其身者賞延于嗣於是乎有飾終之命
有任子之恩所以感人心而勸臣節也惟茲舊典可舉
而行

除李絳平章事制

昔在堯舜聰明文思尚賴良臣實相以濟况朕薄德不
逮先王是用急疾於求賢置之於左右俾承弼納誨以
匡不逮言雖逆耳必求諸道事苟利人咸可其奏茲足
以宣股肱之力成天下之務歷選多士爰得良輔乃降
厥命其聽之哉某官李絳齋莊嚴重內明外直進退舉
措有大臣體自叅內職每備顧問忠讜之操終然不渝
及貳地官專領財賦未逾周月亦有成績歷試多可人
望攸歸俾登中樞無易絳者於戲爾以文學入仕以正
直奉上才膺大用職亦屢遷十年之間位至丞相可以
報國在乎匪躬欽哉懋哉無忝朕命

授韓弘許國公實封制

白集 卷五十四
梁宋之交水陸合會人雜難理軍暴難戢因變肆亂往
往有焉唯此一方朕常憂慮今有良帥鎮而撫之政立
功成宜舉賞典某官韓弘以長材大略作我藩臣本於
忠力輔以政理自分閩寄在浚之郊嚴貞師律恭守朝
憲訓兵積粟明罰信賞軍和食足禮節並行河南晏如
于茲一紀是則有大勲於國有大惠於人會課議功無
出其右夫有過人之効則有加等之命古之王者所以
賞一人而天下勸者用此道也可不務乎是用建于上
公授之真食以示殊寵以旌殊績欽我休命子孫其保
之

除裴度中書舍人制

司勳郎中知制誥裴度以茂學懿文潤色訓誥體要典
麗甚得其宜施之四方朕命惟允况中立不倚道直氣
平介然風規有光近侍臺郎滿歲班列當遷綸閣之職
所宜真授

除蕭俛起居舍人制

左補闕翰林學士蕭俛頃居諫列職同其憂夙夜孜孜
拾遺左右朕嘉乃志選在內庭自叅密近益見忠謹始
終不替尤足多之記事之官一時清選俾膺是命以弘
勸獎

白集 卷五十四
除崔羣中書舍人制

庫部郎中知制誥翰林學士崔羣端厚和敏飾以文學
溫溫忠敬得侍臣之風自列內朝兼司誥命事煩而益
密職久而彌精六年于茲勤亦至矣况小大之事常所
訪問盡規極慮弘益居多所宜寵以正名式光禁職敬
乃嘉命其惟有終

獨孤郁守本官知制誥制

考功員外郎史館修撰獨孤郁爲人沈實敏行寡言粲
然文藻秀出於衆累升諫列再秉史筆洎掌功論率以
直聞求之周行不可多得而掖垣近職綸閣重選俯詢

時議爾宜居之

授沈傳師左拾遺史館修撰制

京兆府鄠縣尉沈傳師庶職之重者其史氏歟歷代以
來甚難其選非雄文博學輔之以通識者則無以稱命
今茲命爾其有旨哉昔談之書遷能修之彪之史固能
終之惟爾先父嘗撰建中實錄文質詳略頗得其中爾
宜繼前志率前修無忝爾父之官之職可左拾遺史館
修撰

除許孟容河南尹兼常侍制

昔吳公袁安爲河南尹守皆能以廉平清肅馭吏教人

孰能繼之我有良吏某官許孟容才志甚大言論甚高
在臺閣閒藹然公望嘗尹京邑觀其器用臨事能守當
官敢言不吐剛以茹柔不附上以急下政無煩碎甚合
衆心及是轉遷頗有遺愛河洛千里都畿在焉凡所選
任必歸望實考言詢事非爾而誰不忘舊政可立新績
仍以騎省申而寵之

除李程郎中制

隋州刺史李程頃以詞學入叅訓命旋以才用出領詔
條漢東大郡委之共理勵精爲政三年有成中外序遷
朝之彝典尚書郎缺爾宜補之

裴克諒權知華陰縣令制

華陰令卒非選補時調租勉農政不可缺前鎮國軍判
官試大理評事裴克諒久佐本府頗有勤績屬邑利病
爾必周知宜假銅墨試其才理待有所立方議正名

贈高郢官制

故尚書右僕射高郢立身從事皆有本末在亂不汙可
以言忠守官不撓可以言直以道佐主可以言正以年
致仕可以言禮有一於此人鮮克舉况備四者不亦君
子乎天不憇遺深用軫悼宜加褒贈以旌其風仍俾善
人聞而知勸可贈某官

貶于尹躬洋州刺史制

中書舍人于尹躬其弟臯謨賊汙狼藉雖無從坐之法合當失教之責然以典職詔命恭勤五年我即念勞爾宜思過俾居近郡茲謂得中

贈裴垍官制

故太子賓客裴垍忠正恭慎佐予為理事君盡禮徇國忘身積憂與勞構成疾恙以至淪逝念之惻然頃屬多故未申禮典永惟褒飾寧忘于心今則命數之間宜從加等庶使忠於君者有以勸焉可贈某官

除軍使邠寧節度使制

金方之氣凝為將星王者法天選命豪傑授之以鉞拜為將軍以威西戎以護中夏而倚望若是安可非其人哉某官某出忠入孝仗信抱義行有餘力學劍讀書鬱然將材用兼文武自領軍衛為我爪牙夙夜警巡不懈于位材官知訓環列增勲服勤五年茲為成績可以移用使之守疆郇須倫切邠大藩控扼胡虜若得良將則無外虞知臣者君非爾不可仍加副相以重是行勉樹勤勞式光寵擢

除韋貫之平章事制

周宣漢宣繼體之主一得申甫一得魏丙咸克致理號

白集 卷五十四 十四
爲中興朕嗣位以來永監前烈惟是賢俊寤寐求思歷
選周行乃獲時彥宜以政柄舉而授之某官韋貫之溫
重明正國之公器當官必守臨事能斷簡在朕志迄今
累年乃者擢居諫司以觀其直出領符竹以觀其理煩
之劇務以觀其用訪之大政以觀其體歷試必中衆望
允屬倚之爲相僉曰宜哉可中書侍郎同中書門下平
章事夫臣事君以忠后從諫則聖靡不有始鮮克有終
理化不成恒由於此今我與爾永終是圖雖休勿休以
臻其極嗚呼二宣之業吾有望焉

除拾遺監察等制

渭南縣尉庾敬休等咸文行清茂士之秀者官從吏列
擢在朝行各隨才用分命以職司諫執憲佇有可稱

除范傳正宣歙觀察使制

古之諸侯三載考績選其賢者命爲長率所以勸功行
而興理化也蘇州刺史范傳正文學政事二美具焉選
自郎署出分符竹江南列郡連領者三所至之部悉心
爲理明諭朝旨恭守詔條謹身省事以臨其下政簡而
速意誠而明吏不能欺人是以息而去思之歎來暮之
謠往復有政聞於人聽雖古循吏蔑以加之朕以陵陽
奧壤土廣人庶其地有險所寄非輕跡其前効可當此

白集 卷五十四
選况黥於宜切歛之遺愛尚在吳興之新政方播升車便道足慰人心固當望風自安計日而理倚注於爾往宜欽哉

邊鎮節度使起復制

執親之喪三年禮也聖人不得已而奪之金革之事無避權也忠臣不得已而從之某官某握我兵要守在塞門忠勇威惠合以爲用師人悅附戎虜畏服迨彼諸部聞其姓名况歲廣屯田日討軍實載陳遠略方集大勳自罹家艱遽致公政茹荼銜恤已過旬時而軍旅不可以無帥疆場不可以無主且慮人慢或生戎心蓋臣節

大於孝思王事急於情禮捨輕從重徇公滅私變而通之正在於此俾加戎秩用護邊封往服舊職無違朕命

除任迪簡檢校右僕射制

書曰德懋懋官功懋懋賞此先王所以匡飾天下也其有忠勞輸于國惠澤及於人高位厚賞朕無所愛某官任迪簡頃以本鎮元戎來朝俾佐師律實掌留務屬偏裨不軌誘動軍部亂行忤命至于再三而迪簡冒白刃於戎首置赤心於人腹挺身誓衆罔不率逆群情既歸因命爲帥况閭閻蕩析思積切倉廩匱竭野有餓殍軍無見糧又能推恩信以結衆心率勤儉以勸生業士旅悅

白集 卷五十四
附流庸思歸周月之間泰然安堵開置幕府叶和親鄰
俾予無憂時乃之力夫爲將守立功如斯不加爵賞何
勸來者建官惟百端揆長之自非勲賢不在此選以是
加等之命寵乃殊常之績俾增威於闔外仍就拜於軍
中爾其欽哉無替厥命

除常侍制

某官某往以強毅剛正見稱於時擢在左曹俾之駁議
旋以言動小有過差左遷遠藩亦聞有政雖經三黜僅
歷二紀而堅直之氣終然不渝人之所難亦足嘉尚宜
可束帶立之手朝正色讜言時有所取俾登西掖仍珥

右貂從容前後以備顧問

除裴武太府卿制

聚九州之賦辯百貨之名按其度程謹其出納孰爲主
者外府上卿務殷秩崇不易其選某官裴武有通敏之
識有倚辯之才以茲器用早膺任使小大之務罔不勵
精累有勤績存乎官次而受藏之府國用所資若非使
能何以集事俾陞顯列仍委劇務爾宜率其官屬欽乃
職司會帑藏出入之要修權量平校之法以遵成式無
使改易謹而守之斯爲稱職

白氏長慶集卷第五十五
翰林制誥二 凡四十三道
杜佑致仕制
敕盡悴事君明哲保身進退始終不失其道自非賢達孰能兼之司徒同平章事杜佑以長才名略為國元臣歷事四朝殆逾三紀出專征鎮為諸侯帥入贊台衮為王室輔嘉猷茂績中外洽聞寵任既崇勤勞亦至頃以

白氏長慶集卷第五十五

唐太子少傅刑部尚書致仕贈尚書右僕射太原

白居易樂天著

明後學松江馬元調巽甫校

翰林制誥二 凡四十三道

杜佑致仕制

敕盡悴事君明哲保身進退始終不失其道自非賢達孰能兼之司徒同平章事杜佑以長才名略為國元臣歷事四朝殆逾三紀出專征鎮為諸侯帥入贊台衮為王室輔嘉猷茂績中外洽聞寵任既崇勤勞亦至頃以

年登致仕退請懸車方深倚注久未得謝勉就牽率迨
茲累年今抗疏披誠至於數四敦諭頗切陳乞彌堅期
於必遂理不可奪守冲知止佑實有焉賢哉大夫今古
同道宜從優異之命式表褒崇之禮尚資耆望俾傳東
朝可太子太師致仕如天氣晴和亦任朝謁昔祁奚申
叔皆就請老國有大事入議否臧忠臣愛君豈必在位
永觀前事期副茲懷

鄭涵等太常博士制

某官鄭涵等並早以文行久從吏職輩流之間頗爲淹
滯况雅有學識進修不已禮官方缺宜當此選凡朝廷
禮制或損益有宜中外謚議或褒貶不決爾爲博士皆
得正之所任非輕各敬乃事並可太常博士

除韓臯東都留守制

國之都府半在東州未遑時巡方委留鎮非位望崇盛
加之勤舊者則不足以允僉屬而副重寄也刑部尚書
韓臯名德之後鬱然公才正行通規貫于終始累遷臺
府連鎮藩維入修職業出樹風聲故多遺愛著聞中外
况一登朝序殆三十年舊德耆望無居其右俾又東夏
僉以爲然乃加冢卿以示崇寵敬服嘉命永孚于休可
檢校吏部尚書東都留守

中書舍人韋貫之授禮部侍郎制

典郊祀之禮獻賢能之書今小宗伯實兼二事非直清明正者不足以處之中書舍人韋貫之沈實賢峻文以禮樂行成於內移用於官公直之聲滿於臺閣頃以詞藻選登禁掖秉筆書命時稱得人久積勤勞宜有遷轉可使典禮以和神人可使考文以第俊秀儀曹之選僉議所歸往修乃官無替厥問可禮部侍郎餘如故

薛存誠除御史中丞制

庶官之政得人則舉況中執憲準繩之司所以提振紀綱端肅內外蓋一職修者其斯任之謂歟給事中薛存

誠選自郎署列于左曹居必靜專言皆謹正章疏駁議多所忠益可以執憲立于朝端况副相方缺臺綱是領糾正百官爾得專之夫直而不絞威而不猛不附上以急下不犯弱以違強率是而行號爲稱職敬服斯命往其懋哉可御史中丞餘如故

前長安縣令許季同除刑部郎中前萬年縣令

杜羔除戶部郎中制

前長安縣令許季同前萬年縣令杜羔等頃自郎署分宰京邑而長吏待之小乖常禮雖同辭託故動未得中然遠恥以退道不失正各從免職亦旣踰時况文行政

能皆推於衆詢諸時議宜有遷授尚書郎缺方選才良
憲部人曹俾膺並命季同可刑部郎中羔可戶部郎中

京兆少尹辛祕可汝州刺史制

京兆少尹辛祕頃守吳興時逢擾亂安人殄寇節効可
稱出倅戎車入貳京輦亦有政績著于官常今以汝邠
軍郡之大方求良吏委之分憂詢事考能爾當其選往
卽乃土以舒吾人可汝州刺史

除李遜京兆尹制

近歲京兆長吏數遷誠不便時抑有其故或鈐其廉鍵
切展不謹吏緣爲姦或鈎距大煩人受其弊既非中道

皆不得已而罷之宜求恬智寬猛相濟者親諭斯旨使
久於其職以息吾人浙江東道觀察使御史中丞李遜
十年以來連守四郡或紛擾之際或荒饉之餘威惠所
加罔不和輯賞其殊績擢在大藩自臨會稽一如舊政
况省科禁以便俗通津梁以息征動遵詔條深副朝旨
江南列鎮良帥則多集課程爾爲稱首而內史之選
久難其人今予所求唯爾可使雖表率州部其委非輕
然尹正京師所資尤急宜輟材於浩壤佇觀政於輦轂
望爾有成無替厥命可權知京兆尹

除孔戣等官制 戣渠爲切

白集 卷五十五
渾金璞玉方圭圓珠雖性異質殊皆國寶也是故能官人者亦辯而用之諫議大夫孔幾靜專貞白不涉聲利執言守事無所依違駕部郎中薛存誠廉潔直方飾以詞藻中立不倚介然風規吏部員外郎王涯端明精實加之以敏懿文茂學尤推於時並歷踐朝行恪勤官次諫垣郎署藹其休聲宜加公獎擢在近侍左右禁闥可以同升必能評奏臺議發揚綸誥臨事有立屬詞可觀各隨所長分命以職祇奉乃事無替厥猷幾存誠並可給事中涯可兵部員外郎知制誥

除李建吏部員外郎制

六官之屬選部郎首之歷代以來諸曹郎之中擇其踐歷久考第高加以有器局律度者遷焉今之選任亦由是矣兵部員外郎李建文行才理公勤課績可謂具美宜居厥官歲調方殷勉勤爾事可吏部員外郎

除劉伯芻虢州刺史制

給事中劉伯芻以文雅才名給事左闥實掌駁議再逾歲時亦謂恪勤宜從遷轉而虢略近郡黎人未康藉爾良能爲予撫字懸賞佇効勉哉是行可授虢州刺史

除周懷義豐州刺史天德軍使制

西受降城尤居邊要西戎北虜介乎其閒委之郡符建

白身 卷五十五
以戎號將守之選宜乎得人前汝州刺史周懷義久列
禁衛嘗從征伐又領軍郡率著勤功宜加獎用可屬憂
寄况茲要鎮實扼戎吭倚角諸軍肩鑄右地牧人訓旅
兼領非輕無替前勞在申後効可豐州刺史天德軍使
除某官王某魏博節度使制

師長之選重難其人况河上列城鄴中雄鎮初喪良帥
思安衆心若親與仁方膺是命某官王某出忠入孝根
乎至性好學樂善出於餘力發自修已施于爲政可以
守土可以長人今兩河之間三軍乏帥是用命爾領茲
大藩澄清魏風輯理相土爲我垣翰永孚于休往其欽
哉無替厥職可魏博等州節度觀察使

除某節度留後起復制

懋勲德者慶鍾于嗣襲忠順者教本於親於是乎有代
及之恩有賞延之命所以光子道而激臣節也茲惟舊
典可舉而行某官某惟乃祖父勤勞王家咸有忠功書
于甲令降及於爾亦克負荷早承義訓久倅戎麾自罹
憫凶能著成敬恭俟朝命靖安人心雖在幼冲足可嘉
獎今屬元戎初喪衆望顯然宜選親賢以爲統帥留府
之事俾爾專之加戎秩以奪哀遷冬卿以示寵奉揚新
命無忘前修爾宜懋哉懸賞佇効可節度留後檢校工

除薛平鄭滑節度制

武牢以東至於白馬形勢之地水陸之會宜擇文武兼備者以爲守臣右衛將軍薛平自司禁旅爲我爪牙訓整警巡能宣其力嘗使于絕國可謂有勞嘗牧于大郡亦聞有政况忠厚爲質通明爲用秉吏道之刀尺襲將門之弓裘可以爲三軍之帥可以理千乘之賦俾輟才於北落往節制於東方爾宜式遏四封輯寧百衆明簡稽以實軍旅信賞罰以勸吏人勉率乃職無忝厥命仍以冬卿副相兼而寵之可檢校工部尚書兼御史大夫

除盧士攻劉從周等官制

君有舉左史得書之政有關諫官得補之二職者歷朝之清選也前侍御盧士攻嘗在西川時爲從事亂危潛伏能潔其身前監察御史劉從周頃佐宣城奉公守政端士之操終然不渝時所稱論並宜甄獎况學術詞藻見推於衆並命清貫僉以爲宜記事盡規各佇能效士攻可起居郎從周可右補闕

張正一致仕制

前諫議大夫張正一學行器用爲時所稱擢居諫官冀効忠讜雖年齒未暮而衰疾有加所宜願養不可牽率

俾移優秩以從致政可國子司業致仕

張正甫蘇州刺史制

浙右列城吳郡爲大地廣人庶舊稱難理多選他郡二千石之良者轉而遷焉鄧州刺史張正甫自領南陽僅經三載廉平清簡以臨其人人安政和理行第一宜以大郡推而廣之用旌前勞且佇來効可蘇州刺史

崔清晉州刺史制

左司郎中崔清以才良行敏補尚書郎頗積公勤宜加獎任頃嘗爲郡亦聞有政平陽舊壤時謂名藩得才與能方可共理安人訓俗佇有成績可晉州刺史

除柳公綽御史中丞制

中憲之設糾謬懲違一引其綱百職具舉非清與直不稱厥官諫議大夫柳公綽忠實有常文以詞學介然端直有古之遺風頃居臺憲累次郎位持平守正人頗稱之擢首諫司器望益重今副相缺位中司專席惟有守者可以執憲惟無私者可以閑邪詢事審官爾當是選光昭新命振起舊章宜一乃心以揚其職可御史中丞除田興工部尚書魏博節度使制

馭下安人其道不一或序能以次用或因效以拔才所命雖殊同歸共理某職某官田興時屬本軍初喪戎帥

亂政咸啓羣心不寧而興列在偏裨奮其義勇謀成必
中事至能斷智畧所及指麾所加一軍獲安百衆附悅
連獻章疏恭俟制命有節有禮朕用嘉之夫以將材如
彼軍情若此允膺不次之舉可貴非常之功是用寵之
冬卿擢爲大將仍以印綬就拜軍中其敬之哉無墮乃
力可檢校工部尚書兼御史大夫魏博等州節度觀察
等使

除鄭餘慶太子少傅制

東朝三少歷代重選不必備位在乎得人吏部尚書鄭
餘慶貞明儉素有古人風發自修身施於爲政出入中
外多歷要重咸有勤績存于官次况動中禮法學綜儒
玄是謂羽儀之臣可居師傅之任輔我元子爾其勉歟
可太子少傅

除裴堪江西觀察使制

江西七郡列邑數十土沃人庶今之奧區財賦孔殷國
用所繫茲爲重寄宜付長才同州刺史裴堪素蓄器幹
久經任遇日者資其忠諫入爲諫議大夫藉其良能出
爲左馮翊曾未周歲政立績成區區一郡未盡其用鍾
陵要鎮可以委之夫簡其條章平其賦役徇公率正以
臨其人而人不安未之有也祇服厥命往修乃官仍兼

中憲以示優寵可江西觀察使兼御史中丞

贈杜佑太尉制

生有爵祿歿有褒贈此王者所以崇哀榮之禮厚君臣之恩况有輔臣所宜加等某官致仕佑以通濟之才公忠之節逢時入用爲國大臣外領藩鎮內參台鉉積勤盡悴迨過三紀左右于位亦旣八年天不憖遺奪我元老憫然興歎實軫于懷永言褒榮俾峻禮命上公之秩用賁幽靈嗚呼錄舊旌勞知予不忘可贈太尉

除孔戢萬年縣令制

京邑令缺多擇尚書郎有才理者補之兵部員外郎孔戢自御史府遷夏官之屬凡所蒞職一心奉公在郎署閒稱有名實加以文學緣飾吏能俾宰京劇佇有成效

除裴向同州刺史制

馮翊之地密邇郊畿分內史之政參京師之化俾善所職其在得人京兆少尹裴向器蘊利用學通政事久試吏治頗著良能累守大郡入亞天府奉上撫下皆有可稱左輔之重爾膺其選况征賦猶重人庶未康實望良才與之共治勉副所舉往修厥官可同州刺史

除武元衡門下侍郎平章事制

朕嗣守丕業迨將十年實賴一二輔臣與之共治故外

白集 卷五十五
鎮方域則仗以爲將有絳侯厚重之質有邴吉寬大之風自登台司克厭人望頃屬巴蜀軍後人殘權委節旄俾往鎮撫信及夷貊恩加疲瘵每因利以施惠不易俗而修教政無苟得人用便安惠茲一方時乃之績報政既久屬望益深宜歸左輔以叅大政夫坦然公道可以敘衆才曠然虛懷可以應群務弼違救失不以尤悔爲慮進善懲惡不以親讎自嫌用此輔君足爲名相欽率是道往復乃官可門下侍郎同中書門下平章事

除李夷簡西川節度使制

征鎮之大實惟蜀川西距於戎南漸於海有重江複山之險有長轂堅甲之旅水陸交會華夷雜居疇能治之我有良帥山南東道節度使某官李夷簡以正事上以簡臨下仗茲器用累當任遇執憲之難也爾爲臺丞其職甚舉司計之重也爾調邦賦其効可稱爰資長才出領重鎮自摠符鉞干漢之南專奉詔條削去敝政均穀籍不一之賦罷舟車無名之征近悅遠來歸如流水俗用丕變人迄小康三載考功爾爲稱首進其右秩遷于大藩以均惠乎四方以旌勸乎羣吏昔文翁明於教化持中種切嵩優於政能巴蜀之間遺美猶在不替前効可以副之佇聞有成用光厥命可檢校吏部尚書劍南西

川節度等使

除袁滋襄陽節度使制

漢以二千石之良者入爲公卿周以六官之賢者出兼侯伯內外之任所命則殊至於治軍國寵忠賢其致一也戶部尚書袁滋奉上甚勤臨下甚簡安人附衆尤是所長須資其能移鎮東郡略其科禁緩其征徭政不滋彰人用休息在部七載績成課高璽書徵還益聞遺愛老幼遮道事鄰古人朕方勤卹疲民褒獎循吏累月再命其有旨哉舉鄭滑之政也故旌武公之美寵以司徒憂襄漢之人也故仗叔子之才委茲征鎮類能而使其

在此乎勉揚厥聲無替前効可某官山南東道節度等使

歸登右常侍制

近侍之列騎省爲貴歷代迄今選任頗重必詢望實而後命之工部侍郎歸登朴忠沈厚心無詭詐介圭不飾止水無波澹然自居以致名稱抱此素行歷踐清貫掌議左掖貳職冬官歲時滋深體望益茂可以備顧問應對之選列言語侍從之臣冠附貂蟬立之于右訪諸時論僉以爲然可右散騎常侍

李程行軍司馬制

隋州刺史李程頃自周行出分憂寄漢南大郡守之五年頗著良能宜當選獎况專習文學通知兵事西南重鎮初委元戎慎選副車爾當此舉三軍之重俾往貳之仍加憲職以示優寵可御史中丞劍南西川行軍司馬

李旣虞部郎中制

金州刺史李旣雅有文藝飾以政事早從吏職久領郡符謹慎廉平頗副所任虞曹郎缺命以序遷敬茲寵名勉守厥位可尚書虞部郎中

牛僧孺監察御史制

河南縣尉牛僧孺志行修飾詞學優長頃對策于庭其

言甚直累從吏職頗謂滯淹訪諸時論宜當朝選俾升憲府以觀其才可監察御史

裴克諒量留制

華州刺史奏華陰令裴克諒在官清白奉法考秩向滿其政如初借留三年用觀成績朕方旌求良吏俾養黎元適副所懷宜可其奏

張聿都水使者制

前湖州長史張聿頃以藝文擢升朝列嘗求祿養出署外官名不爲身志亦可尚喪期旣畢班序當遷俾領水衡以從優秩可都水使者

薛伾

鋪杯切

鄜

芳無切

坊觀察使制

鄜時延安抵于中部羌夷種落散在其間戎夏雜居易
擾難理宜選寬明之使通知邊事者委以符節而糾綏
之右金吾將軍薛伾服勤戎職練達吏道出入中外繇
歷歲年能一乃心以宣其力自加寵遇再執金吾徼巡
有嚴夙夜匪懈在公若是何用不臧况爲人沉靜內肅
外和按俗守封是其所善宜輟務於誰何俾宣風於廉
察庶乎勞俸諸部綱紀列城奉詔條以安人參戎索以
訓旅欽承厥命往復乃官仍踐冬卿式光重寄可檢校
工部尚書充鄜坊等州觀察使

韓愈比部郎中史館修撰制

太學博士韓愈學術精博文力雄健立詞措意有班馬
之風求之一時甚不易得加以性方道直介然有守不
交勢利自致名望可使執簡列爲史官記事書法必無
所苟仍遷郎位用示褒升可依前件

李暈安州刺史制

宿州刺史李暈勲閥之門嗣生才略久參戎衛頗著勤
勞試守列城觀其爲政屬汴泗之右創畫州居府署城
池委之經始一日必葺三年有成且聞公勤宜有遷轉
重分憂寄再佇良能往安吾人無忝厥命可安州刺史

重公爲寶易直給事中制吾人於亦淵命可矣陳史
前御史中丞寶易直器質識智厚重閒敏文合法要學
通政經累踐臺郎擢司邦憲寬猛舉措甚得其中官不
易方府無留事前因病免今以才遷俾升瑣闥以備顧
問夫制令奏議官獄典章苟有依違皆得駁正所任不
細宜敬乃官可給事中

孟簡賜紫金魚袋制

漢制二千石有政績者就加寵命不卽改移蓋欲使吏
久於官人安其化也常州刺史孟簡簡易勤儉以養其
人政不至嚴心未嘗怠曾未再稔績立風行歲課郡政
毗陵爲最方求共理實獲我心宜加命服以示旌寵庶
俾羣吏聞而勸焉宜賜紫金魚袋

盧元輔杭州刺史制

河南縣令盧元輔早以學藝列在周行嘗守商都頗聞
有政再領京縣益見其才江南列郡餘杭爲大征賦猶
重疲人未康藉爾登車往分憂矚勞俸安緝稱朕意焉
懸賞旌能以佇報政可杭州刺史

白氏長慶集卷第五十五

白氏長慶集卷第五十六
唐太子少傅刑部尚書致仕贈尚書右僕射太原
白居易樂天著

明後學松江馬元調巽甫校

翰林制詔三

敕書批答祭文贊
文附凡五十五首

與王承宗詔

敕王承宗朕臨馭天下及此五年三叛誅夷四方清泰
不以功武自負常推恩信為先爾父云亡即欲命卿受
詔而遠近方鎮内外人情紛然奏陳皆云不可朕以卿
累代積勲賢之業一門有忠義之風功著艱危恩連姻

戚雖中心是念而衆請難違可否之間久不能決然亦欲觀卿進退之禮察卿忠孝之心卿自罹憫凶屬經時月待使臣而動皆得禮奉章疏而言必由衷請獻官員願輸貢賦而又上陳密款遠達深誠潔身而謀出三軍損已而讓推二郡斯有以得臣子之大節知君親之大恩卿心旣然朕意亦定特加新命仍撫舊封今授卿起復左金吾衛大將軍檢校工部尚書充成德軍節度使恒州刺史恒冀深趙等州觀察等使兼御史大夫仍賜上柱國并賜告身旌節等社想卿忠孝哀感兼深其德棣兩州以卿進讓尤欲於卿親屬之內選授一人在法

雖有推恩相時亦恐非便今所以除薛昌朝德棣兩州觀察使昌朝昔嘗事卿先父今又與卿親鄰卿宜具以誠懷令報昌朝知委卿今授命之後足得節制三軍使其不失事宜方見卿之忠盡昨者衆情易惑非卿不能効此誠群議難排非朕不能斷此意所宜保持大義勉勵遠圖深念斯言永副予望其當軍大將已下各宜特與改轉卿卽條錄聞奏其官健等亦宜量加優賞想宜知悉

荅李遜等謝恩令附入屬籍表

卿先父頃逢多難嘗立大功每想忠勞豈忘存歿念先

臣之績雖書名于太常推同姓之恩更附籍于宗正俾
增榮於一族兼延寵於九原卿等或詩禮承家或弓裘
奉業咸鍾新命慶屬本枝省所謝陳深嘉誠懇

國朝轉祭盧虔文

維元和四年歲次己丑七月日皇帝遣某官某以清酌
庶羞之奠致祭于故祕書監贈兵部尚書盧虔之靈惟
爾質性端和風猷茂遠名因文著位以才升秉大節而
事君始終一致陳義方而訓子忠孝兩全甲族推華士
林增美久在貂蟬之列近遷圖籍之司方延寵光遽闕
幽窆詳亦褒獎之命雖已表於哀榮遺奠之恩宜再申
於軫悼魂兮不昧鑒此誠懷尚饗

批李夷簡賀御撰君臣事跡屏風表

朕思求理化親閱典墳至於去邪納諫之規勤政慎兵
之誠取而作鑒書以爲屏與其散在圖書心存而景慕
不若列之繪素目覩而躬行庶將爲後事之師不獨觀
古人之象卿詞彰恭順義見忠規省覽再三深叶朕意
所賀知

批百寮嚴綬等賀御撰屏風表

朕烈祖太宗以古爲鏡用輔明聖實臻理平垂作孫謀
每懼乎失墜取爲殷鑒遂飾丹青至若明君直臣前言

往事森然在目如見其人論列是非既庶幾爲座隅之
誠發揮獻納亦足以開臣下之心况卿等職在儀刑政
當補察各勤所任共副茲懷所賀知

謝授河南尹表

卿文通吏道學達政源凡歷官常輒聞績効觀能以授
俾亞理於三川見可而遷宜專臨其一府盡委封畿之
政仍兼運漕之權歲時之間佇有勤効勉恭爾職重副
予懷所謝知

與茂昭詔

敕茂昭盧校等至省所奏恒州事宜并別論情陳獻者
具悉卿望重勲賢寄崇藩鎮謀參廟筭寵接國姻累上
表章繼陳誠欵永言智畧已見匡濟之才載念公忠益
表感知之志若非勞瘁憂國義勇忘家則丹赤之心不
能至此想風興歎至于再三所緣恒州事宜朕亦思之
甚熟但以武俊率身仗順於國有功忠勲所延宜及俊
嗣承宗又密陳深欵遠獻忠誠既念舊勞已降成命計
其奉詔必合感恩如或乖違續有商議卿宜以睦隣爲
事體國爲心想卿誠懷當悉朕意

與師道詔

敕師道省表具悉卿業重相門位崇戎闡忠輸于國行

著于家久而益彰嘉歎無已所奏亡兄師古請列于私廟昭穆者此乃心推孝友誠切恭敬覽表見情深足嘉尚但以祠廟所見貴於禮成師古雖則始營至卿方行祔禮卽卿爲廟主固合其宜况師古爵位尊崇弘選自合祔廟別立祠宇使其主之奉以蒸嘗亦非乏祀也已令有司重議如此頗謂得中且叶禮經卿宜知悉

與於陵詔

敕於陵省所賀安南破環王國賊帥李樂山等三萬人者具悉卿蠻夷犯疆方鎮致討兇徒喪敗荒徼清平卿素蘊忠誠又連封壤疾旣同於山藪勢益壯於輔車想

聞捷書當倍慰愜載省所賀深見乃懷

荅段祐等賀册皇太子禮畢表

朕祗膺統序恭守典常爰推至公乃命長子使主國鬯用貞邦家册畢禮成良增感慶卿等各司軍衛同奉表章備見忠誠益深嘉歎所賀知

荅李詞賀處分王士則等德音表

朕臨馭天下以懲勸爲先有惡必誅無功不念顧承宗之罪誠合討除思武俊之勲宜令嗣襲况墳墓禁其剪伐將校許以歸降庶明用師蓋非獲已卿職修卿寺誠奉本枝省茲賀章備見忠藎

與吐蕃宰相鉢闡布敕書

敕吐蕃宰相沙門鉢闡布論與勃藏至省表及進奉具
悉卿器識通明藻行精潔以爲真實合性忠信立誠故
能輔贊大蕃叶和上國弘清淨之教思安邊陲廣慈悲
之心令息兵甲旣表卿之遠略亦得國之良圖况朕與
彼蕃代爲甥舅兩推誠信共保始終覽卿奏章遠叶朕
意披閱嘉歎至于再三所議割還安樂秦原等三州事
宜已具前書非不周細及省來表似未指明將期事無
後艱必在言有先定今信使往來無壅疆場音彼此不
侵雖未申以會盟亦足稱爲和好必欲復修信誓卽須

重畫封疆雖兩國盟約之言積年未定但三州交割之
後尅日可期朕之衷情卿之志願俱在於此豈不勉歟
又緣自議三州已來此亦未發專使今者贊普來意欲
以再審此言故遣信臣往諭誠意卽不假別使更到東
軍此使已後應緣盟約之事如其間節目未盡更要商
量卿但與鳳翔節度使計會此已處分令其奏聞則道
路非遙往來甚易頗爲便近亦冀速成更待要約之言
皆已指定封疆之事保無改移卽蕃漢俱遣重臣然後
各將成命事關久遠理貴分明想卿通才當稱朕意曩
者鄭叔矩路泌因平涼盟會沒落蕃中比知叔矩已亡

路泌見在念茲存沒每用惻然今既約以通和路泌合
令歸國叔矩體骨亦合送還表明信誠兼亦在此其論
與勃藏等尋到鳳翔舊例未進表函節度不敢聞奏自
取停滯非此稽留昨者方進表函旋令召對今便發遣
更不遲迴仍令與祠部郎中兼御史中丞徐復及中使
劉文璨等同往其餘事宜已具與贊普書內卿宜審於
謀議速副誠懷兼有少信物賜卿具如別錄至宜領也
冬寒卿比平安好遣書指不多及

與希朝詔

敕希朝省所奏請自部領當道兵馬一萬五千人取蔚

州路赴行營并奏土門及承天軍各添兵士備禦者具
悉卿武毅雄才忠貞大節出爲良將倚作信臣約已徇
公忘身許國忿違命不恭之寇激勤王自効之心親統
銳師率先群帥况又周知要害備設防虞計其威聲已
振兗醜有臣如此朕復何憂佇建殊功以副深重所有
動靜宜數奏聞想當知悉

與師道詔

敕師道朱何至省所奏當道赴行營兵馬取正月過渡
河逐便攻討并奏兵馬出界後請自供一月糧料又奏
待收下城邑若有軍糧一月已後續更支計并陳謝慰

問者具悉卿文武閒生忠貞特立動有所効知無不爲
昨獻帛助軍極盈數於萬疋今又賫糧出境減經費於
三旬此乃力之所任無不罄竭慮之所及無不經營因
時見憂國之心臨事識忠臣之節詔書慰諭未盡朕懷
章疏謝陳益嘉乃至再三興歎寤寐難忘其所奏聞並
依來表想宜知悉

與劉濟詔

敕劉濟李臯至省表及露布十二月十七日劉緄部領
當道行營兵馬收下饒陽縣城破賊衆三千人并擒斬
將校收獲馬畜器械等無送賊將朝履清等四人又進

所收饒陽縣等者具悉卿盡忠伐叛發漁陽精統之師
緄仗順臨戎討冀方昏狂之寇詔下而父子戮力鼓行
而將卒齊心先群帥以啟行首諸軍而告捷連擒逆將
併下賊城歸獻罪之俘囚進已收之縣邑可謂忘身徇
國盡禮事君疾風知偃草之心大雪見貞松之節况表
章之內益歎恭勤而眷想之間如覩風采計茲兇醜當
已震驚破竹之勢可乘覆巢之期非遠佇清大憝重副
深懷其饒陽縣卿宜且令鎮守稍加存撫用勸將來宋
常春卿所密奏具委事情且宜叶和以體朕意故令宣
慰想當知悉

祭吳少誠文

維元和五年歲次庚寅二月辛未朔二日壬申皇帝遣
內侍省內府局丞賜緋魚袋孫士政以清酌庶羞之奠
致祭於故彰義軍節度使贈司徒吳少誠之靈曰惟爾
武毅挺質韜鈴拔身負勇果之雄才蓄變通之明識自
察廉列郡節制成師貞且有爲勤而不擾軍戎輯睦封
域底寧從義而致誠仗順而保福旣延寵渥方茂輝榮
遽此幽淪深用傷悼逝波不捨去日苦多想松楸以軫
懷聞鼓鼙而興歎恩加遣奠禮舉褒崇念爾有靈知予
此意尚饗

與季安詔

敕季安省所奏當道行營兵馬今月十七日已收棗強
縣其賊棄城夜走者具悉卿輸忠報國嫉惡忘家遣無
敵之師伐不襲之寇軍聲遠屆先路以風行逆黨潛知
棄城而宵遁已收縣邑益振兵威此皆卿訓練所加指
麾有素永言明効實屬深懷固可乘勢應機逐便進討
以卿忠盡當副朕心

與希朝詔

敕希朝張嘉和至省初奏前月二十六日破逆賊河湟
鎮六千餘人具悉卿親領統師誓誅逆黨張軍心以吞

敵奮士力而指蹤潛戒偏裨先攻險阻伐謀而事有成
筭剋日而動不愆期果敗兇徒遂據要地况殺傷既重
收獲頗多益壯軍威可奪虜氣佇聞掃蕩以慰衷懷

與從史詔

敕從史曹公又至省所奏今月三日柏鄉縣南破賊衆
約三萬人并擒斬首級收獲器械及馬等又奏當軍所
傷士馬數并量事優卹事宜具悉卿外揚武畧內竭忠
謀率有名之師深入其阻遇無狀之寇大挫其鋒兵刃
屢加捷書頻至殺傷數廣績効居多非卿悉力摧兇誓
心報國則何能指麾之下勤必成功表奏之間事皆審
實既光重委益副深懷嘉歎再三不忘寤寐所奏承
出軍合陣并續發露布事宜具委所陳想當知悉

與季安詔

敕季安許峯至省所奏具悉卿勲親重德台輔元臣竭
誠信以戴君弘識度而體國謀能極慮言必盡忠周覽
表章益增寤歎吳少陽自參軍務頗効恭勤豈待奏陳
已有處分想宜知悉

與昭義軍將士詔

敕昭義軍節度下將士等卿等當軍將士與諸道不同
自經艱難多易將帥而忠順之節未嘗有虧朕每思之

無時暫忘盧從史爲卿主將作朕藩臣權位尊崇恩寵
優厚而乃外示恭順內懷姦邪刻削軍中暴殄境內朕
以君臣之道未忍發明爲之含容頗有年月近又苟求
起復請討恒州與賊通謀爲國生患自領士馬久屯行
營收當軍賞設之資加本道芻粟之估不爲公用盡入
私家此則主將之恩於卿何有臣子之分負朕日深卿
等辨邪正之兩端識逆順之大義抱忠勇者恥居其下
守名節者憤發於中失三軍之心已聞大去犯衆人之
怒果見不容遠察事宜備知誠欵興言嘉歎至于再三
其當軍將士等賞設已有處分上自將校下及士卒各
勵爾志再思朕言卿等承前以來常保忠貞之節自今
以後永爲心腹之軍宜念始終副茲矚望故令宣慰宜
並悉之夏熱卿等各得平安

與承瓘詔

敕承瓘

取畏切

卿摠領禁軍控臨戎境見敵每彰其勇敢

因事益表其忠勤言念在懷發於寤歎昭義軍將士等
去邪遠惡仗義保忠統其成師宜得良帥孟元陽夙懷
武毅累著功庸威名甚彰人望所屬以之爲帥必愜軍
情以之討賊必有勲績今授元陽檢校尚書右僕射充
昭義軍節度等使未到行營聞其昭義軍卿宜切加宣

撫務使安寧烏重胤職在偏裨保於忠正宜從獎擢以表殊恩今授烏重胤河陽節度使兼御史大夫卿亦宜諭此恩意令知朕心兼恐河陽無人速宜進發想當知悉

與元陽詔

敕元陽澤潞全軍方討恒冀盧從史虧失大節包藏二心姦迹邪謀日已自露軍情物議俱所不容尋追赴朝今已在道朕以昭義將士忠順成風况在行營久勤戎事今欲使其戰者奮發居者悅安共成大功必在良帥以卿有澱水之勲効有河陽之政令思之甚熟無以易

卿宜領重藩仍遷宗秩今授卿檢校尚書右僕射充澤潞節度等使并賜旌節告身等往卿宜速發先到潞府上訖便赴行營慰安軍心宣諭朕意烏重胤徇忠守節宜加獎用今便授重胤河陽節度使兼御史大夫想宜知悉

與昭義軍將士詔

敕昭義軍節度下將士等卿等久在行營乍無主將而士旅輯睦軍壘安寧足彰守正之心尤見盡忠之節以此歎矚勞於寢興孟元陽是朕信臣爲國良將威略可以攝兇孽慈和可以牧師人累著忠勤克諧朕命爲

其主帥必副群情况卿等同嫉姦邪久困貪暴宜以仁
賢之帥撫卿忠義之軍靖思元陽無出其右今授元陽
檢校尚書右僕射充卿等當道節度使勉同王事以慰
朕懷烏重胤特効忠誠深宜獎擢今便授河陽節度使
兼御史大夫故令宣慰並宜知悉

與師道詔

敕師道林英至省所陳奏并進王承宗與卿書者具悉
王承宗童騃無知兇囂有素雖籍祖父之寵曾微分寸
之勞但以武俊勲在冊書姻連戚屬朕獨排群議特降
殊私未卒父喪使承祖業卽加新命仍撫舊封則朕於

承宗恩亦至矣而僞陳誠欺欺誑使臣假託軍情拒違
詔命則承宗於朕罪莫大焉悖禮亂心暴於天下此乃
承宗干國家之紀非朕忘武俊之功遂至用師蓋非獲
已仍開生路許以自新而梟音不悛鴟張益熾人情共
棄國典不容在於朕心安敢輕捨卿旣膺注意義感酬
恩所獻表章具已詳覽慮深遠計詞切謹言在忠謀而
則然於事體而未可誠嘉勤至難允懇懷今諸道將帥
親領士馬深入寇境頻奏捷書四面合圍一心旅進窮
迫已甚覆滅非遙况卿同遣師徒已收縣邑冀清氛孽
佇見功名勉於今圖副此矚望

白集 卷三十六
與師道詔

敕師道任文質至省表具悉盧從史頃者請率全師誓清妖孽推誠待物許之不疑而背恩於上結怨於下邪謀貳志日以彰聞虧大節而自絕於君積群怒而不容於衆因以邀命幸而脫身屈法申恩已有處分昨者詔旨已明示卿卿體國爲心事君盡力固宜有聞必薦有見必陳竭其忠諒之誠濟其獻替之美省閱章奏嘉歎良多

與茂昭書

敕茂昭王日興至省所奏今月十八日大破賊衆一萬七千人并擒斬收獲訖者具悉卿親率勁兵誓平妖寇竭股肱之力中有奇謀勵父子之軍前無強敵故能深入賊境大破兇徒殺傷旣多俘獲亦廣具詳奏報備見忠勞眷屬之懷發於寤歎將士等各懷勇烈同忿寇讎激於衆心致此殊効况荷戈於炎暑之際奮身於鋒刃之間永念於茲未嘗暫忘故今宜慰宜並悉之

與昭義節度親事將士等書

敕昭義軍節度下親事將士等盧從史受恩至重負國至多衆所不容追今赴闕朕以誤曾任使貴全始終今則止於貶官此蓋曲從寬典卿等抱忠懷義朕所素知

頃以詣營同事從史三軍一體俱是王臣既不相干又能自効朕方優賞以酬功勳何至不安有此疑懼必恐從史已追之後元陽未到之間卿等當營乍無主將或被外人扇誘令衆意憂疑勢使之然事非獲已朕雖在此遠有軍情料卿本心必無此意况元陽勤儉恤下寬厚愛人久在河陽甚近澤潞元陽臧否卿等合諳以卿忠義之軍故擇仁賢爲帥已有詔示宣諭元陽若到行營一無所問乃至將士家口亦令優卹安存卿復何憂必得其所况昭義將士艱難以來保守忠貞未嘗虧失天下稱歎卿亦自知又卿父母妻兒家田墳墓一物以上並在潞州頃刻之間豈忍便棄朕之此語卿宜細思各相勉諭同保忠順計元陽已合到彼卿等便取元陽指麾想卿等心必副朕意故令宣慰並宜知悉

與執恭詔

敕執恭王克謹至省所奏今月八日進收平昌縣已令鎮守并奏劉濟欲與卿約義事者具悉卿奉辭伐罪仗節啓行指顧偏裨收復城邑已令鎮備兼務緝綏威惠之方旣明弔伐之義斯在永言倚任彌注衷情劉濟將相大臣與卿先父同列欲求契約固合允從豈惟繼好私情亦足叶心王事載省來奏深鑒乃誠至於寢興不

忘嘉矚

與恒州節度下將士書

敕成德軍節度下將士等朕以王者之道與物無私若違命執迷則罔有容捨若知非改悔則無不含弘不窮無告之人不塞自新之路頃屬姦臣從史謀構異端致使恒陽隔於恩外六郡之地皆廢農桑三軍之人並懼鋒鏑每一念至中心憫然今卿等繼獻表章遠輸誠款省承宗之勤懇難阻其情思武俊之功勞不能無念况事因註誤而理可哀矜今已降制書各從洗雪承宗仍復舊官爵充恒冀深趙德棣六州觀察使成德軍節度使將士等官爵實封並宜仍舊付之如初卿等各宜協力同心知恩感德共保終始稱朕意焉故令宣慰宜並知悉

與承宗詔

敕承宗頃者盧從史包藏姦詐矯示公忠下誣物情上惑朝聽使卿陷於違命使朕至於用兵交亂君臣罪有所在今從史已正刑典遠棄驩州已構亂者既就屏除誘陷者自宜明白况卿代連姻戚朕豈不思祖有功勞朕豈不念事不得已勢至如斯棄絕以來常懷憫惻卿今既陳章疏懇獻衷誠請進官員願修貢賦誓心以納

白集 卷五十六
欵歸罪而責躬情可哀憐法存開釋朕託于人上及茲
六載體天地含弘之德厚君臣終始之恩常以人安爲
心豈欲物失其所今所以開獨見之路降非常之恩卿
及將士等已具制書並從洗滌卿仍復舊官爵便充恒
冀深趙德棣等州節度觀察等使并賜旌節告身等往
爵土仍舊君臣如初想卿中懷當自知感所宜追補前
悔勉勤後圖夙夜思之永副朕意想當知悉

批宰相賀赦王承宗表

先臣武俊功不可忘後嗣承宗過而能改朕所以捨其
罪悔議以勲親垂宥過之恩尚宜及爾十代引泣辜之
責誠合在予一人與其黷武而取威不若匿瑕而務德
卿等重居台輔密贊謀猷發於衷誠有此稱賀省閱章
奏嘉歎久之

與劉濟詔

敕劉濟省所謝男紹及孫景震等授官并謝賜器仗弓
甲刀斧等者具悉卿文武全才將相重任本於忠諒成
此勲勞尚德尊賢位已極於台輔念功懋賞寵宜及於
子孫時論允歸朝章斯舉至於出茲戎器賜我元臣但
可以申朕恩私未足以表卿功績載覽來表備見乃誠
併此謝陳益嘉勤蓋

代王似答吐蕃北道節度論贊勃藏書

奉敕撰

大唐朔方靈鹽豐等州節度使檢校戶部尚書寧塞郡

王王似

薄密切

致書大蕃河西北道節度使論公麾下遠

辱來書兼蒙厚貺慰悚之至難述所懷國家與彼蕃代

為舅甥日洽恩信雖云兩國實若一家遂令疆場之臣

得以書信相問况麾下以公忠之節雄勇之才翊佐大

邦經畧北道似近蒙制命守在邊陲慰望之情一二難

盡皇帝以贊普頻遣和使懇求通好凡此邊鎮皆奉朝

章但令慎守封陲不許輒令侵軼至於事理彼此宜然

且如寔

都項切

項久居漢界曾無征稅既感恩德未嘗動

搖然雖懷此撫循亦聞闕

缺規切

彼財貨亡命而去獲利

而歸但恐彼蕃不知大為寔項所賣其中亦聞誘致事

甚分明不能縷

盧舉切

陳計已深悉今請去而勿誘來而

勿容不失兩境之歡不傷二國之好在此誠為小事於

彼即是遠謀幸履坦途勿遵邪徑今聖上德柔四海威

及萬方雖外國蠻夷尚皆率伏况中華臣妾敢有不恭

豈假彼蕃欲相借助誠愧厚意終訝過言承去年出師

討逐迴紇其閒勝負此亦備知不勞來書遠相示及所

蒙寄贈並已檢到似為邊須守常規馬及胡瓶依命已

受其迴紇生口緣比無此例未奉進止不敢便留今却

分付來人至彼望垂檢領有少荅信具如別數幸恕寡
薄也初秋尚熱惟所履珍和謹因譯語官馬屈林恭廻
不具似白

與吉甫詔

敕吉甫韓用政至省所奏陳謝具悉卿忠貞立身文武
爲德志惟經國謀不忘君才可以雄鎮方隅故委之外
闡智可以密參帷幄故任以中樞而能一其衷心再有
冲讓雖勞謙彌切每陳丹府之誠而憂寄方深難輟紫
垣之務勉諭已伸於前詔忠勤載露於來章今征討已
停方隅稍泰克清之日雖則不遙難奪之心亦宜且抑

重此宣慰當體朕懷是推至公煩有陳謝

與吐蕃宰相尚綺心兒等書

敕吐蕃宰相尚綺心兒等論思諾悉至省表并進奉具
悉卿等才器特茂識略甚明仗義立身資忠事主上佐
贊普下康黎元以尋盟納款爲謀繼好息人爲請是卿
上策叶朕中心每覽表章輒用嘉歎朕與彼蕃國代爲
舅甥日結恩信自論盟會頗歷歲時常欲速成以爲永
好雖誠明之內彼此無疑而言約之間往復未盡今故
略收來意重示所懷想卿通明當所鑒悉河隴之地國
家舊封論州郡則其數頗多計年歲則沿來甚近旣通

和好悉合歸還今者捨而不言豈是無心愛惜但務早成盟約所以唯言三州則沒於彼者甚多歸於此者至少猶合推於禮讓豈假形於言詞來表云此三州非創侵襲不可割屬大唐來且此本不屬蕃豈非侵襲所得今是却歸舊管何引割屬爲詞去年論與勃藏來卽云覆取進旨贊普便請爲定今兩般使至又云比之小務未合首而論之前後既有異同信使徒煩來去雖欲速爲盟會其如無所適從靜言二三固不在此若論和好卽今各無侵軼已同一家若議修盟卽須重定封疆先還三郡若三郡未復兩界未分卽是未定封疆憑何以

爲要約彼若吝惜小事輕易遠圖未能修盟且務通好至於信使一往一來但令疎數得中足表情意不絕彼有要事卽令使來此有要事亦令使往若封境之上小事意但令邊頭節度兩處計會商量則勞費之間彼此省便前般蕃使論悉吉贊至緣盟約事大須審商量未及發遣後使雖是兩般所論只緣一事故令相待今遣同歸在於日時亦未淹久所送鄭叔矩及路泌神枢及男女等並已到此良用惻然厚贈遠歸深嘉來意其劉成師原非劉闢子侄本是成都郡人已令送還本貫其餘事目並在贊普書中卿等宜審參量以副朕意使

白集 卷五十六
迴之日可備奏聞今遣兼御史中丞李鈺及中使與迴使同往各有少信物具如別數至宜領之秋涼卿等各得平安好遣書指不多及

荅王承宗謝洗雪及復官爵表

帝者之道蕩然無私唯推赤心以牧黔首故一夫不獲若納之於隍一物歸誠則容之如地况卿家聯懿戚寵自先朝祖立茂功賞延後嗣因人誑誤不染疵瑕滌以恩波煦之寵澤撫舊封而廉察六郡進新律而統制三軍蕩穢加恩何以過此及覩來表乃見深誠言必由衷事皆知感承家襲慶誓繼力於前修補過酬恩願指期於後効永言爾志甚叶朕懷勉思始終用副眷矚所謝知

與鄭綯詔

敕鄭綯省所奏邕管黃少卿及子弟等事宜具悉卿望重中朝寄深南服誓敷惠政佇化遠人言念忠勤不忘監寤山洞夷落易擾難安比來撫之未及其道覽卿所奏頗合其宜歲時之間當革前弊勉於招諭以副朕心

荅高郢請致仕第二表

卿有忠貞之節立於險中有清重之名鎮於朝右而能始終有道進退有常援禮引年遺榮致政人鮮知止卿

獨能行不唯振起古風亦足激揚時俗於卿則確然難奪在朕則情豈易忘誠鑒乃懷未允來表

與劉總詔

敕劉總卿業繼將門才兼武畧累臨軍郡悉著良能襲以弓裘宜加旌鉞仍舉奪情之典以昭延賞之恩今授卿起復雲麾將軍檢校工部尚書充范陽節度等使并賜旌節官告往想宜知悉

荅裴均讓中書侍郎平章事表

卿自登台輔每竭忠貞一身秉彝百度惟序致君盡力久積股肱之勤憂國勞心微生媿理之疾暫從休告遽獻表章所陳雖是卿心所請殊非朕意宜加調攝速就平和以副虛懷無爲固讓

荅劉總謝檢校工部尚書范陽節度使表

卿幼承義訓長有令聞能遵忠孝之風不墜弓裘之業朕所以命加異等寵冠常倫特授雙旌超登八座豈唯延賞亦在任能將懋前修勉申後効載省章疏深鑒誠懷所謝知

與茂昭詔

敕茂昭王日興至省表陳讓檢校太尉者具悉卿文武大僚勲戚重望累展朝宗之禮足表恭敬之心况多戰

白集 卷五十六
伐立功彌彰勤蓋言念及此每用嘉焉宜加寵榮已降
新命何至謙讓仍辭舊官眷倚之懷並具前詔想宜知
悉

荅任迪簡讓易定節度使表

卿修文立身經武致用每誓心於忠勇常濟事以智謀
自副戎車已屬時望及分旌鉞果愜軍情况武義之師
輸忠仗順所期慰撫以就輯寧何至撝謙有茲陳讓所
進官告今却賜卿宜體朕懷卽斷來表

荅裴垵讓宰相第三表

卿疾病已來表疏相繼雖辭乞之誠頗切而注望之意
方深所以來章久而未報然念卿勤懇之請至於再三
若心不甚安卽疾難速愈是用輟樞劇之務加崇重之
官稍遂優閒佇期痊復勉從爾志深抑予懷

荅裴垵謝銀青光祿大夫兵部尚書表

卿自居鈞軸日獻謀猷戴君常竭其股肱憂國每形於
顏色及嬰疾病益不遑安未踰四旬以至三讓撝謙秉
易退之道堅懇陳難奪之詞遂抑朕心俯從卿請而七
命印綬五兵尚書官秩甚崇事務稍簡就以優養冀乎
和平載省表章深見誠意

與劉總詔

白集 卷五十六
敕劉總康志安至省所謝陳具悉卿之先父爲朕元臣
大節殊功歿而不朽宜加恩禮俾洽哀榮故命宰臣爲
之撰錄卿義深報國孝重承家旣感顯親之恩願竭載
君之節遠有奏謝益用嘉之想宜知悉

與房式詔

敕房式卿以良才尹茲東洛公忠無怠聲績有聞嘉歎
之深寧忘寤寐宣城重寄深在得人藉卿政能往就綏
撫今授卿宣州刺史兼御史中丞充宣歙等州都團練
觀察處置等使并賜告身往卿宜便起赴本道勉修所
任以稱朕懷想當知悉

與盧恒卿詔

敕盧恒卿累登朝序皆著公方自領藩條益彰理行恪
恭而奉上勤儉以牧人不加寵榮何勸來者朕以擢管
漕運軍國所資其務甚殷所寄尤重以卿有忠勞之前
効幹濟之長才常簡朕心宜授此職今除卿尚書刑部
侍郎充諸道鹽鐵轉運使并賜告身往宜卽赴闕庭想
當知悉

與新羅王金重熙等書

敕新羅王金重熙金獻章及僧冲虚等至省表兼進獻
及進功德并陳謝者具悉卿一方貴族累葉雄材仗忠

孝以立身資信義而爲國代承爵命日慕華風師旅叶
和邊疆寧泰况又時修職貢歲奉表章進獻精珍忠勤
並至功德成就恭敬彌彰載覽謝陳益用嘉歎滄波萬
里雖隔於海東丹慊一心每馳於闕下以茲嘉尚常屬
寢興勉弘始終用副朕意今遣金獻章等歸國并有少
信物見如別錄卿母及妃并副王宰相已下各有賜物
至宜領之冬寒卿比平安好卿母比得和宜官吏僧道
將士百姓等各加存問遣書指不多及

荅文武百寮嚴綬等賀御製新譯大乘本生心
地觀經序表

朕勤求道本廣挹教源以真如不二之宗助清淨得一
之化况斯經典時爲大乘名理精微翻譯成就雖契心
則離於文字而得意亦假於筌蹄庶使發揮因爲述序
卿等精通外學懇竭忠誠引經贊揚奉表稱賀再三省
覽嘉歎久之

荅孟簡蕭俛等賀御製新譯大乘本生心地觀
經序狀

大僊經典最上法乘來自西方闕于中禁將期利益必
在闡揚遂命僧徒譯其句偈兼詔卿等潤以文言昨因
披尋深得真諦悟本生不滅之義證心地無相之宗方

勤護持聊著序引永言述作猶愧聖明卿等賀陳良深
嘉尚

荅元應授岳鄂觀察使謝上表

夏口重鎮屬在時賢非明肅不能理其軍非簡儉不能
阜其俗以卿有仁厚之質蹇直之風累踐班行皆著名
節遂輟中憲往臨外藩知已下車深慰人望佇茲報政
用副朕懷所謝知

荅李鄘授淮南節度使謝上表

卿抱兼人之才秉徇公之節每登要職悉著能名若刃
發劘投而不滯如玉在佩動必有聲朕以距淮而南人
物繁會非廉明何以貞師察俗非簡惠何以通商綏農
前勞旣彰後效何遠載省來表知已下車勉副虛懷佇
觀新政所謝知

畫大羅天尊贊

歲正月十九日順宗仙駕上昇之日月也皇帝嗣位六
載每及茲晨齋居孝思明發不寐以爲玄祖之教本乎
道先帝之神在乎天故畫大羅天尊像者欲以最上勝
因而成本功德也然則知之者不如念之者念之者不
如仰之者是用諦念真力虔仰尊儀命設色之工圖其
儀形命掌文之臣贊其功德達孝誠于天上致孝理於

域中斯蓋弘願發於我皇景福薦於先后稽首奉詔跪
稱贊云

維大羅今天上天維天尊今仙上仙高真之鑒照下界
孝敬之心達上玄每一念今以一仰感罔極今福無壅

白氏長慶集卷第五十六

白氏長慶集卷第五十七

唐太子少傅刑部尚書致仕贈尚書右僕射太原

白居易樂天著

明後學松江馬元調巽甫校

翰林制誥四

凡六十八首

荅元義請上尊號表

朕自君臨運逢休泰時歲豐稔兇醜殄夷此皆宗社降
靈忠賢宣力顧惟寡德敢受鴻名卿中發懇誠上尊美
號雖屬人望難貪天功宜悉所懷勿固為請

荅薛萃賀生擒李錡表

朕自嗣耿光每多惕厲念必先於除害志無忘於安人
李錡大負國恩自貽天罰師徒未動於疆場音亦父子俱
肆於市朝信上天之禍淫與率土而同慶省視來表深
鑒乃誠所賀知

與薛萃詔

勅薛萃楊君靖至省所陳謝具悉卿勤王之節徇公滅
私事主之誠移忠資孝苟非褒贈何以顯揚且清白之
風旣自家而刑國則寵旌之澤宜因葉以流根式遵道
遠之經用表教忠之訓是爲禮典煩致謝章

與嚴礪詔

勅嚴礪薛光朝至所陳謝具悉卿徇公竭誠臣節克著
揚名濟美子道有光教忠旣本於義方追遠宜崇於禮
命俾優褒贈爰慰孝思秩貴冬官以表過庭之訓封榮
石窳居效切用旌徙宅之賢雖示新恩允符舊典遠煩陳
謝深見懇誠

與餘慶詔

勅餘慶省所謝陳具悉卿累居袞職時謂盡忠自尹洛
師日聞報政臣節旣彰於宣力子道莫大於揚名俾光
孝思爰舉禮命榮褒冢宰寵賁幽靈式是彝章豈爲私
渥有煩陳謝深見誠懷

答黃裳請上尊號表

朕以薄德嗣守丕圖不敢荒寧以弘理道幸屬歲時豐稔兇寇梟夷風雨不愆禮圓丘而報本雷霆未震豐許切與太社而服刑斯皆十聖降靈幽贊寡昧百辟叶德豐同馴致和平永惟弘名實懼虛美卿上稽祖訓下酌羣情陳獻表章請加徽號暨于王公卿士降及耆艾緇黃咸一乃心各三其請朕嘗以宰元化者曲成於物法天道者從欲於人雖恤隱泣辜未臻三五之化而樂推欣戴難違億兆之心德非稱焉讓不獲已勉從所請深愧于懷

與從史詔

勅從史楊幹至省所奏今日七日到路城縣降雪尺餘兼奏耆老等詣闕請欲立碑并手䟽通和劉濟本末事宜者具悉卿分朕之憂求人之瘼時降大雪豐年表祥豈惟澤及土田將使物無疵厲休慶斯在慰望良深耆老等遠詣闕庭請立碑記尋已允許當體誠懷以旌政能無至陳讓知卿協比其鄰翼戴爲意陳此手䟽發於血誠忠懇彌彰嘉嘆不已永言臣節何日忘之想宜知悉

與韓臯詔

勅韓臯省所陳賀具悉卿朕自守睿圖每思寬政慮先
禁暴念在措刑李錡負國反常阻兵干紀未勞師旅已
就誅夷卿宣力納忠秉心嫉惡遠陳慶賀深見懇誠想
宜知悉

與元衡詔

勅元衡卿立身許國竭力匡君人之具瞻予所嘉賴凋
殘是卹遠藉宣風之能利澤所資暫輟爲霖之用慈和
旣敷於兵後惠信當洽於言前永念忠勤豈忘寤想計
卿行邁已到西川涉遠冒寒固甚勞頓勉加綏撫以副
朕懷想宜知悉

荅李扞等謝許上尊號表

朕自臨萬邦僅經三載位雖託於人上化未洽於域中
永念眇身敢當大號卿等義深宗室忠盡君親一其情
誠三有陳獻迫以人望厭于天心遂抑所懷勉從其請
固辭而事非獲已撫德而何以堪之再省謝章彌增惕
厲

荅馮伉請上尊號表

朕統承大寶時屬小康伐謀而吳蜀克清示信而華夷
有截斯皆宗社坐祐天地降和非予冲人所能馴致卿
上稽十聖之訓下酌萬人之心以爲不讓強名未傷於

白集 卷五十七 四
體道屈已循物何爽於至公遂抑素懷俯從衆望雖鴻
名未稱每勞躋地之心而人欲下從卽爽法天之德勉
依勤請良用愧懷

荅長安萬年兩縣百姓耆壽等謝許上尊號表
朕每念雍熙慙未及於億兆永言徽號讓已至于二三
而文武具寮緇黃庶老懇陳誠欵明引訓謨開予以天
地無私之心起予以聖宗不易之訓以大道者無求於
物物尊而不辭至公者非欲其名名立而不讓迫於固
然之禮不得已而許之卿等誠至感通義深欣戴再煩
陳謝益用愧懷

荅元素謝上表

卿用兼文武識合變通輟綱領於中朝授麾幢於外闡
吏能足以惠物將略足以董戎人望所歸予心是賴知
卿已到本鎮當慰疲人深藉撫綏之方以安凋弊之俗
日期報政歲望成功勉勤所圖用副朕意

荅韓臯請上尊號表

銷疹致和幸逢昌運加名建號豈稱眇身而文武具寮
黎獻庶老引古今之明訓陳億兆之懇誠謂德有所歸
謳謌不可以苟讓謂功有所獻徽號不可以固辭遂抑
中懷俯從衆望庶增修乎茂實冀克副於鴻名卿發誠

自中歸美于上勉依所請彌愧于心

荅馮伉謝許上尊號表

朕以眇身嗣于丕業心雖勞於惕厲化未及於雍熙永惟強名實懼虛美上自一二元老下及億兆黎人大洽詢謀明徵典訓增予以巍巍之號感予以顛顛之誠既迫所懷俯從其請卿義深奉上志切戴君再省謝陳彌增愧惕

與顏証詔

勅顏証戴岌至省所賀及謝王國清充五嶺監軍具悉卿職在撫綏任兼備禦公勤夙著聞望日彰言念于懷

豈忘寤寐乾象昭感壽星垂文與時相膺有道則見顧慙菲德何以當之卿戎旅事殷宜有監領蓋爲常例煩至謝陳想宜知悉

與從史詔

勅從史省所陳謝追贈亡母并舉薦韋悅具悉卿推誠奉國積慶成家旣彰盡節之忠宜洽流根之澤雖祿難逮養已闕靈於九原而孝在顯親宜旌賢於三徙俾崇封贈以極哀榮韋悅旣有才能又所諳委卿卽發遣令赴闕庭卿之忠誠朕所識察豈待陳露然後知之載覽來章益嘉懇切想宜知悉

白集 卷五十七
與季安詔

勅季安省所陳請具悉卿朕纂承鴻業司牧蒼生僅致
小康未臻大化實慙薄德未稱崇名而華夷兆人內外
羣后屢有勤請難於固違卿遠獻表章明徵典訓納忠
於歸美於君勉從懇誠良用愧悵儲貳者上繼宗祖下
貞邦家心豈暫忘事或未暇尚阻來請當體所懷

與高固詔

勅高固卿奉國戴君必竭忠節統戎護塞克著勲勞自
領藩垣委之心膂忠慤之志久而益彰欽歎在懷何嘗
暫忘以卿一從軍旅多在邊陲歲月積深勤勞滋久所

宜出入中外周旋寵光今授卿檢校尚書右僕射御史
大夫兼右羽林軍統軍以端揆之崇兼環衛之帥遂卿
望闕之戀表朕念功之心仍賜卿官告卿宜卽赴闕庭
想宜知悉

祭故贈婕妤孟氏文

維元和二年歲次丁亥十二月甲寅朔十九日壬申皇
帝遣某官某以庶羞之奠致祭于故婕妤之靈曰惟爾
和順積中柔明奉上動靜合肅雖之體進退得婉變之
儀選自良家備茲內職修令顏以顧德蘭幽有香守明
節而保身玉潔無玷方資懿範以茂嘉猷彼美有聞于

白集 卷五十七
何不淑遽茲淪逝深用惻傷旣十日晨爰申奠醑以爾
有班氏之明智故贈以婕妤以爾有宓妃之姿容故葬
於洛浦魂兮不昧歆此誠懷尚饗

洛浦原在
長安界

季冬薦獻太清宮詞文

維元和二年歲次丁亥十二月甲寅朔二十六日巳卯
嗣皇帝臣稽首大聖祖高上大道金闕玄天元皇大帝
伏以今年司天臺奏正月三日祀上帝于南郊佳氣充
塞四方溫潤祥風微起廬州申連理樹一株彰義軍節
度使進白鳥一鄭滑觀察使奏瑞麥五科司天臺奏六
月五日夜鎮星見河陽節度使進白雀一荆南節度使

申連理樹一本山南西道觀察使申嘉瓜一枚司天臺
奏六月十三日夜老人星見河南府申芝草兩莖司天
臺奏冬至日佳氣充塞瑞雪祁寒者臣嗣承丕圖肅恭
寅畏祖宗坐慶佳瑞薦臻虔奉禎祥伏深祗惕今時惟
玄律節及季冬仰薦明誠敬率恒典謹遣攝太尉司徒
平章事杜佑薦獻以聞謹詞

與茂昭詔

勅茂昭盧校至省所奏請上尊號及建儲闈賀誅李錡
并進馬者具悉卿朕以寡德祗嗣丕圖雖致小康豈稱
大號迫於人望遂抑予懷永惟強名實愧虛受儲貳者

白集 卷五十七
上繼宗祖下貞邦家心非斃忘事或未暇尚阻來請宜
體所懷李錡包藏亂心奮發兇德不勞征討自就誅夷
想卿忠誠倍以爲慰所進馬馴良可尚服御且閒取其
戀主之心足表爲臣之節再三省覽嘉歎久之想宜知
悉

荅百寮謝許追遊集宴表

在昔哲王居于人上推其憂樂與衆共之頃屬三兇薦
興二載連獲凡百有位咸一其心誠念嘉謀共致昭泰
今四表無事三農有年思與羣情同其具慶是宜削苛
察之前弊煦寬裕之新恩仁及下而啓迪歡心澤先奏
而導迎和氣昨逢多故主憂且使臣勞今致小康上安
則宜下樂庶欲解人之愠粗伸推已之恩豈曰殊私煩
於陳謝

荅李扞謝許遊宴表

朕自御萬方僅經三載運逢休泰俗漸和平當朝野無
虞之時見君臣相遇之樂是故去滋彰之化弘優貸之
恩近自宗親下及士庶賜其宴衍遂以優遊益以已之
所安思與人之共樂雖夕惕而若厲每戒志於無荒賜
春遊以發生宜助時而有慶卿等榮崇宗寺恩重本枝
省所謝陳彌嘉誠懇

荅劉濟詔

勅劉濟省所奏茂昭送卿管內百姓殷進能等七人奏
 前後事由具悉卿為國大臣與君同體寡而得衆忠以
 忘身每循公而滅私能虛懷以容物與茂昭疆場音之亦
 事小有違言曲直是非朕已明辯卿外崇藩翰內贊謨
 猷念屈已以為心或難容忍思戴君而是力宜務叶和
 勉卿寬裕之懷助朕含弘之化想宜知悉

與柳晟詔

勅柳晟上英琦至省所奏慶雲并進圖者具悉昌運將
 開祥符先見發自和氣聚為卿雲捧日而五色相宣坐
 天而萬物咸覩斯為嘉瑞宜契昇平朕方致小康未臻
 大化受茲方貺祗惕良深卿以誠事君推美奉上獻輪
 困於圖畫陳懇款於表章披閱再三彌增嘉嘆

荅薛萃謝授浙東觀察使表

卿久踐吏途累聞能政及居藩鎮尤見忠勤訓導而羣
 黎向方廉察而列郡承式實嘉乃績每簡予心宜遷雄
 劇之藩以廣循良之化勉於為理副朕所懷所謝知

上元日嘆道文

道本無象功成強名生一氣之先為萬物之母吹煦寒
 暑陰陽節而歲功成輔相乾坤上下交而生物遂故能

白集 卷五十七
阜蕃動植啓迪雍熙邦家保安夷夏咸若今以時殷獻
歲節及上元女道士某等奉爲皇帝焚香行道敬修功
德伏願聲聞紫極丕降玄休大庇羣生永康四海流光
垂慶億萬斯年

畫大羅天尊讚文

道用無窮統之者大聖神化不測感之者至誠非圖像
無以示儀形非供養無以展嚴敬故一念一禮而福隨
之畫大羅天尊者奉爲順宗至德大聖大安孝皇帝忌
辰之所造也皇帝祖玄元之風嗣清淨之理志在善繼
心惟孝思申命工人彰施繪事粹容儼若真相炳焉憑
志誠而上通垂景福而下濟詞臣奉詔恭爲讚云
真通之象孝感之心率土瞻仰在天照臨蓄爲精誠發
爲圖畫如從大羅應念而下

荅朱仕明賀冊尊號及恩赦表

朕以寡德嗣承睿圖俯從衆誠勉受鴻稱慶之大者豈
在予一人推而廣之宜及爾萬姓爰因受冊之禮遂施
作解之恩俾與羣生同斯大慶卿盡忠訓旅推美奉君
省茲賀陳深見誠至

祭咸安公主文

維元和三年歲次戊子三月癸未某日皇帝遣某官某

白集 卷五十七
以庶羞之奠致祭于故咸安大長公主親濬毗伽可敦
之靈曰惟姑柔明立性溫惠保身靜修德容動中規度
組切五切紉切詳倫之訓既習於公宮湯沐之封遂開於國
邑及禮從出降義重和親承渥澤於三朝播芳猷於九
姓遠修好信既申協比之姻殊俗保和實賴肅雍之德
方憑福履以茂輝榮宜降永年遽歸長夜悲深計告寵
極哀榮爰命使臣往申奠禮故鄉不返烏孫之曲空傳
歸路雖遙青塚之魂可復遠陳薄酌庶鑒悲懷嗚呼尚
饗

與仕明詔

卿久鎮邊防初膺闡寄式旌勤効俾洽恩榮褒德念功
故進封以示寵忠誠亮節宜因實而錫名既表新恩亦
惟舊典今改封卿丹陽郡王仍改名忠亮勉勤乃事以
副所懷想宜知悉

與崇文詔

勅崇文段良玘至省所謝亡妻邑號具悉卿有濟時之
勲寵居袞職士政承積善之慶列在王官俾洽恩光故
加褒贈念梧桐之早落不及夫榮追芣苢之遺芳宜從
子貴式崇寵命以賁幽靈省茲謝章良用嘉嘆

祭張敬則文

維元和三年歲次戊子七月辛巳朔二十七日丁未皇
帝遣某官某以清酌之奠致祭于故鳳翔節度使贈某
官張敬則之靈惟爾挺武毅之質負將帥之才名以忠
聞位由勤致自膺閫職益茂勲猷惠葺疲氓威吞黠虜
一方膏雨千里長城繼博望之功勞能恢代業傳子房
之籌略不墜家聲方誓山河遽捐館舍逝川無捨遠日
有時徽績空存書旗常而播至音容不見聽鞀鼓而增
思永念忠勤彌深軫悼往陳遣奠庶鑒悲懷嗚呼尚饗

與希朝詔

勅希朝劉忠謹至省所奏沙陀突厥共一千八百七十

人并駝馬器械歸投事宜具悉卿以將帥之才鎮華夷
之要憂勞爲國忠勇忘家聲動寇戎塵清封略突厥等
嚮風輸款率屬來賓雖慕我懷柔遠無不至亦因卿威
惠導之使來念其歸投宜有優賜今賜衣服及匹段等
自首領已下卿宜等第給付其部落家口等遠經跋涉
宜稍安存以勸歸心用副注意

與元衡詔

勅元衡省所奏當管南界外生蠻東凌六部落大鬼王
苴春等以所管子第百姓等二千餘戶請內屬黎州并
奏南路蕃界消息者具悉卿以文武之才兼將相之任

仁和下布黎庶獲安威惠旁流蠻夷率附勲勤斯著倚
賴彌深欽矚之懷豈忘寤寐生蠻部落苴春等久阻聲
教遂此歸投願屬黎州請通縣道勉於撫慰以勸將來
所奏蕃界事宜具已知悉戎虜雖聞喪敗封疆不可無
虞亦宜隄防用副憂矚

與陸庶詔

勅陸庶省所奏當管新開福建陸路四百餘里者具悉
卿望重周行寄分越徼嘉聞素著茂政累彰况勤可使
人智能創物廢驚波之路開砥石之途捨舊謀新以夷
易險財力不費商旅斯通惠既及人動非擾下績用可

尚欽嘆良深

荅盧虔謝賜男從史德政碑文并移貫屬京兆
表

卿男從史爲國重臣自領大藩厥有成績公忠茂著政
理殊尤勒石所以表勲賜文所以褒德惟功是念有善
必旌是國舊章非予私渥昨又請移鄉貫願隸京邑家
聲益振臣節逾章雖清望標門崇冠山東之族而丹心
戀闕恥爲關外之人載省懇誠彌深嘉嘆所謝知

與宗儒詔

勅宗儒卿邦家楨幹班列羽儀嘗作股肱弼諧無怠及

白集 卷五十七
司管篤鎮靜有方欽重之懷寢興不捨春宮之長非賢
不居既簡朕心亦符人望今授卿禮部尚書并賜官誥
往除餘慶東都留守卿宜便與交割卽赴上都想宜知
悉

與希朝詔

勅希朝省所奏党項歸投事具悉卿邊隅寄重闡外事
繁威行而軍聲外揚信及而戎心內附動皆展効進必
盡忠勞績彌彰倚望尤切党項拓跋忠敬等頃雖爲盜
今已經恩懼而歸投情可容恕許其後効以補前非卿
宜安存無使疑懼其磨梅部落等尚能繼至亦許自新

宜加招諭令知朕意

與韓弘詔

勅韓弘任光輔至省所陳請具悉卿文武全畧邦家重
臣自居大藩厥有成績輯寧百姓嚴整三軍使予無憂
惟爾之力省茲章奏懇願朝宗誠嘉深衷難遂勤請朕
以梁宋之地水陸要衝運路咽喉王室藩屏人疲易散
非卿之惠不能安師衆難和非卿之威不能戢今衆方
悅附人又知歸鎮撫之間事難暫輟雖戀深闕積十
年而頗勞然倚爲長城捨一日而不可勉卿忠力布朕
腹心宜體所懷卽斷來表

白集 卷五十七 十五
荅杜佑謝男師損除工部郎中表

卿道贊謨猷功成輔弼師損克承訓義雅有令名豈惟
賞延兼以能選班行久次頗積功勤郎署稍遷未爲渥
澤省茲章奏深見懇誠所謝知

與嚴礪詔

勅嚴礪省所奏進蒼角鷹六聯具悉卿任重列藩寄兼
外閫事皆奉上動必竭誠時屬勁秋致茲鷺鳥調習成
性進獻及時取其效用之能足表盡忠之節

與韓弘詔

勅韓弘卿苦心奉國極慮撫人惠彼一方于茲十載歷
展勤王之効累陳戀闕之誠才以任彰節因事著不加
殊寵何表成功夫外擁旌旄爪牙之任重內參台衮股
肱之寄深以爾一心授茲二柄永言倚賴當副誠懷今
除卿同中書門下平章事依前宣武軍節度等使餘金
如故并賜官告往想宜知悉

荅王鏐陳讓淮南節度使表

卿自領大藩累彰殊効惠安百姓表正一方雖戀闕誠
深然殿邦寄切旣執圭而肆覲宜返旆而勞旋況淮海
要衝旌旄重任永言共理已有成功方注意於撫綏何
瀝誠而陳讓難允來請宜體所懷

白集 卷五十七
答韓弘讓同平章事表

致理之道審官爲先以卿有文武之才故授卿以將相之任所異外爲藩翰張爪牙之威內贊謨猷宣股肱之力僉諧允屬衆望攸歸方注意於安危何執謙而陳讓所進官告今却賜卿無或再辭卽斷來表

畫大羅天尊讚文

唐元和己丑歲四月十四日畫大羅天尊一軀成奉爲睿聖文武皇帝降誕之辰所造惟歲之春惟月之望誕千年一聖之始降百祥萬壽之初電繞樞而夜明雷出震而時泰皇帝孝敬寅畏憂勤勞謙以謂無疆之休雖

肇自於元聖莫大之慶思廣被於羣生爰命國工俾陳繪事真相儼若玄風穆如疑從大羅感聖而降至誠上通於一德景福旁濟於萬靈休命耿光自茲無極詞臣承詔恭爲贊曰

大羅天兮高不測浩無倪兮杳無極中有聖兮無上尊惟玄德兮可升聞圖相好兮仰高真誠上感兮福下臻俾百祥兮與萬壽配聖日兮而長新

荅韓弘再讓平章事表

將相兼委實難其人非其德不可謬承當其才不在懇讓朕非虛授卿勿固辭宜斷來章卽奉成命已具前詔

白集 卷五十七
當體朕懷

畫元始天尊讚 并序

元者諸天之先始者萬靈之母混而成一強以爲名至哉無上尊得以是爲號正月二十有三日德宗神武孝文皇帝在九仙之月遇八音之日也皇帝教弘玄訓業奉真宗承文祖之貽謀申孝孫之誠敬以謂元始天尊者真儀不遠隨相而生神用無方應念而至故命設繪素展儀刑五彩彰施七寶嚴飾所以表當宁之瞻仰感在天之聖神通玄應於希夷集靈祐於盼嚮詩兩切詞臣承命跪唱讚云

玄聖何在天上天欲往從之宵無緣命工設色五彩宣忽如真相見於前聖應聖今玄又玄薦百福兮垂萬年

北齊驃騎大將軍高敖曹讚 并序奉勅撰

高昂字敖曹渤海菑他歷切人也姿體甚異膽力過人累

經戰伐皆著功績官至驃騎大將軍儀同三司冀州刺史其勇敢忠壯冠于一時時稱爲名將後竟以攻戰死於王事年四十八贈太尉謚曰忠武贊曰
敖曹之容好配子羽生揚勳烈死謚忠武武不顧身忠不忘主誠哉選士無以貌取

與驃國王雍羗書

勅驃國王雍羗卿性弘毅勇代濟貞良訓撫師徒鎮寧
邦部欽承王化思奉朝章得睦鄰之善謀秉事大之明
義又令愛子遠赴闕庭萬里納忠一心稟命誠信彌著
嘉想益深今授卿檢校太常卿并卿男舒難陀那及元
佐摩訶思那等二人亦各授官告往至宜領之此所以
表卿勲勤申朕恩禮敬受新命永爲外臣勉弘令圖以
副遐矚今有少信物具如別錄想宜知悉也冬寒卿比
平安官吏百姓等並存問之遣書指不多及

與季安詔

勅季安劉清潭至省所奏貝州宗城縣百姓劉弘爲母

病割股充祭事宜具悉卿任重弼諧寄深鎮守勤撫綏
之政贊燮理之功至使部人忘身展孝雖因心有感誠
化我之時風而率下可知足表卿之理行省茲陳奏欽
嘆良深

荅杜兼謝上河南少尹知府事表

三川封畿實重其任貳職綱紀亦難其人卿素懷器能
累著聲績亞理以明慎選專領以展長才知已下車當
親綏撫佇聞報政用副憂勤所謝知

代忠亮荅吐蕃東道節度使論結都離等書

撰

奉
勅

大唐四鎮北庭行軍涇原等州節度使檢校工部尚書
兼御史大夫丹陽郡王朱忠亮致書大藩東道節度使
論公都監軍使論公麾下專使辱問悚慰良深國家與
吐蕃代爲舅甥日修鄰好雖曰兩國有同一家至於封
疆尤貴和叶忽枉來問稍乖素誠雖有過言敢以衷告
來書云頻見燒草何使如然者至如時警邊防歲焚宿
草蓋是每年常事何忽今日形言况牛馬因風猶出疆
以相及草木延火縱近境而何傷遽懷異端未敢聞命
又云去年忽生異見近界築城者且國雖通好軍不徹
警近邊修緝彼此尋常况城是漢城地非蕃地豈乖通

王何致深疑靜言思之誰生異見頃當報牒彼已息訟
今又再言寧無慙德又云皇天無親有德卽輔者皇帝
君臨萬方迨及四載道光日月德動乾坤南北東西化
無不及若非皇天輔德明神福仁北虜何爲歸明南蠻
何爲慕化風雨何因大順歲時何因屢豐則神助天親
可明驗矣彼若無故生疑無端結怨但思小利不務遠
圖則咎孽之生恐不在此未言取笑却請三思又云漢
之臣下頻有叛逆者近以吳蜀小寇暫肆猖狂未及討
除尋以殄滅皇威不露妖沴自清豈假彼蕃遠思傍助
忠亮謬蒙恩渥叨在藩垣恭守邊隅幸鄰封壤縱未能

白集 卷五十七
為漢名將亦不可謂秦無人輒獻直言以祛深惑願推誠信同保始終各勉令圖以求多福歲暮嚴寒惟所履安勝遠垂惠貺愧佩殊深今因押衙迴亦有少荅信具如別紙恕輕渺也不具忠亮敬白

與南詔清平官書

勅南詔清平官段諾突李附覽爨何棟尹輔首段谷普李异傍鄭蠻利等段史倚至知異牟尋喪逝朕以義重君臣情深軫悼卿等哀慕所切當何可任又知閤勸繼業撫人輸誠奉教蒸黎咸又封部獲安皆是卿等同竭忠謀佐成休績永言及此嘉慰良深勉終令圖以嗣遐矚今遣諫議大夫兼御史中丞段平仲持節册命閤勸想當悉之卿等各有所信物具如別錄至宜領也春寒卿等各得平安好遣書指不多及

荅王鐔賀賑恤江淮德音表

水旱流行江淮艱食朕明申詔旨親遣使臣蠲其逋租賑以公廩爰與利物之利用表憂人之憂庶俾疲氓均霑惠澤卿克勤乃職共理為心省茲賀陳深見誠意

與茂昭詔

勅茂昭盧校至省所陳奏具悉卿翼戴君親出入將相久專戎閫累覲王庭忠勞必竭其智謀誠懇每形於章

白集 卷五十七
表近者志在憂國慮及安邊請率精兵親防黠虜朕以卿當管軍鎮寄重事殷實藉撫綏用安封部雖未允所請而深嘉乃誠今又密奏恒州具申事體曲盡忠勤之節備知丹赤之心言念再三發於嗟嘆眷重之至併在予懷想宜知悉

與潘孟陽詔

勅孟陽卿夙懷才畧早振聲猷歷踐班行累彰績効自守關輔克舉藩條惠及蒸黎威行軍鎮永言所任未展其能朕以東川蜀門重鎮弊承軍後雄壓險中思得忠勤之臣撫此凋殘之俗量才注意無以易卿今授卿劍南東川節度觀察使并賜官告往想宜知悉

荅宰相杜佑等賀德音表

古先聖王託于人上與百姓同其欲與天下共其憂唯推是心可底于道朕臨御萬國迨茲五年惕厲之懷雖勤於夙夜愆伏之候猶害於歲時思革弊以救災在濟人而損已是用欽刑緩死責已卹貧罷郡國之貢珍省宮殿之煩費延春令而布仁行惠先南風而解愠阜財庶憑歡心以召和氣卿等或匪躬獻替或悉力弼諧啓沃之間已申霖雨之用燮理之際佇見陰陽之和各宜勉之以輔予理所賀知

白集 卷五十一
三三
答宗正卿李詞等賀德音表

朕統承鴻緒子育蒼生累歲有秋今春不雨在陰陽之數雖有盈虛爲父子之心敢忘惻隱俾除人弊以盪歲災卿等任重宗卿恩連屬籍省茲陳賀深見忠誠

八
答將軍方元蕩等賀德音表

朕以時陽舛候春澤愆期思備旱之方無如貶省務動天之德莫若精誠是以修己卹人去煩節用興答天戒以致時和卿志竭邦家職修軍衛省茲表章深用嘉之所賀知

與迴鶻可汗書

皇帝敬問迴鶻可汗夏熱想比佳造可汗有雄武之姿英果之畧統制諸部君長一方纂承前修繼守舊好故得邑落藩盛士馬精強連挫西戎永藩中夏况嚮風之義每勤於朝聘事大之敬常見於表章動皆由衷言必合禮朕所以深嘉忠欵遐想風規至於寢興不忘嘆矚勉弘令德用副誠懷達覽將軍等至省表其馬數共六千五百匹據所到印納馬都二萬匹都計馬價絹五十萬匹緣近歲以來或有水旱軍國之用不免闕供今數內且方圓支二十五萬匹分付達覽將軍便令歸國仍遣中使送至界首雖都數未得盡足然來使且免稽留

貴副所須當悉此意頃者所約馬數蓋欲事可久長何者付絹少則彼意不充納馬多則此力致歉馬數漸廣則欠價漸多以斯商量宜有定約彼此爲便理甚昭然况與可汗禮在往來義存終始親鄰旣通於累代恩好益厚於往時所以萬里推誠期於一言見信遠思明智固體朕心其東都太原置寺此令人勾當事緣功德理合精嚴又有彼國師僧不必更勞人檢校其見撚拓勿施鄔達于等今並放歸所令帝德將軍安慶雲供養師僧請住外宅又令骨都祿將軍充檢校功德使其安立請隨般次放歸本國者並依來奏想宜知悉今賜少物不多及

與韋丹詔

敕韋丹竇從直至省所陳賀并奏江饒等四州旱損其所欠供軍留州錢米等並已放免又奏權減俸及修造陂堰并勸課種蒔粟麥等事宜具悉朕頃緣時早慮害農功雖推咎已之心敢望動天之德而未逾浹日膏澤霈然仰荷玄休俯增祗惕卿喜深稱慶忠切分憂旣覽賀陳兼詳奏請至如蠲逋以卹人隱減俸以濟軍須抑

白集 卷五十七
末業而移風務茲菽麥防旱年而歉雨修利陂塘皆合
其宜並依所奏非卿公勤奉上仁惻發中則共理之心
不能至此再三興歎一二難申勉於始終以副朕意想
宜知悉

與從史詔

敕從史史澣至省所陳謝具悉卿亡父早踐班榮久著
聲績永言褒贈自叶典常况卿孝友承家勤勞事國念
茲忠節皆稟義方將慰匪我之心宜流自葉之澤豈爲
殊渥頻至謝草

答宰相杜佑等賀德音表

朕以春候發生歲功資始順陽和而布政賑貧乏而勸
農載念罪人因除弊事隨其所利施以爲恩富庶之端
實漸於此卿等義敦宗戚誠竭君親省茲賀陳用增嘉
歎

與孫壽詔

敕孫壽劉德惠至省所進隴右地圖兼進戰車陣圖車
樣及奏陳收復河湟事宜者具悉卿尹茲右輔固乃西
疆創制戎車繕修軍實思收故地誓立殊勳載覽陣圖
兼詳所奏誠得開邊之畧益加報國之心斯謂盡忠彌
增注意眷言所至無忘于懷

與李良僅詔

敕李良僅卿久在軍門習知邊事居常恭恪動必忠勤
眷乃才良可分憂寄今授卿延州刺史兼安塞軍使并
賜官告往延州既兼軍鎮且雜蕃戎防遏撫綏兩須得
所宜勉所任用副朕懷

答京兆府二十四縣耆壽謝賑貸表

朕勤求人隱恤卹農功念播種之時必資首種慮懸磬
之日多乏見糧將便公私宜從歛散卿等名登庶老業
守先疇各勉農人以副朕意所謝知

白氏長慶集卷第五十七

